

家具別意方畱江上杯離心已挂雲間樹如此風流
一使君文章政事更何云絕憐退食兼榮養不向
望白雲

送王孝廉遊京歸錢塘

江南草長蝴蝶飛玉缸碧酒流春輝相逢上客同買
醉白馬新自燕山歸燕山歸來不堪說易水寒風薊
門雪朝邸空隨使者車帝闈不受書生謁笳聲杳渺
歌苦辛短衣笑拂京華塵不畱東閣觀奇士還覓西
湖別故人此行莫歎知音寡曾到黃金舊臺下荒臺
遺址今已平更有何人致賢者

望月臺

臺前夜半烏啼時起望明月彈商絃月來照見臺上
影松桂滿山風露冷

愛竹軒爲陳維寅賦

匡山老客何清真自繞園屋栽蒼筠年來無肉雖苦
瘦家有萬玉誰言貧一竿護惜不忍剪何以持釣橫
江鱗僮來掃葉自可喜客至踏筍長遭嗔輶軒啼罷
結遠夢碧雲忽墮湘南春涼陰脩脩潤琴硯落翠冉
冉沾衣巾詩成時向節下寫醉墨點破煙痕新風來
清嘯與相荅若聽金奏怡我神知無顏色媚兒女自

古相愛惟幽人洛陽陌上花易過歌鐘競賞勞車輪
何如此君最耐久歲晚結托同情親亂聲朝送簾外
雨疎影夜拂窗前塵我嘗種此欲免俗亂後伐盡惟
荆榛故園咫尺未能去移家幸得爲子鄰往來儻許
如二仲敲門借看毋嫌頻

釣雪灘

江流欲漸魚不起一蓑猶釣寒蘆裏漁邨茫茫煙火
微雪滿晚蓬人獨歸

幻住精舍尋梅

郭西雪後尋僧院短竹穿沙水如練梅花有待我來

催十日春寒未開遍忽思前日渡江水夜解征帆宿
山縣偶逢一樹在官廨爲寫新詩冰滿硯關山夢別
今五年縞袂誰家月中見自慙喪亂尚飄泊淚眼如
看故人面黃昏酒醒逐寒影繞樹千迴意無倦南枝
北枝亂如雪未許東風吹一片名園桃李盡荆榛空
谷獨開君莫怨重來省視兩何如惆悵歸時有餘戀

北郭秋夜喜徐卿遠來兼南遊

東海徐君我同里日共周旋接冠履斯人自是真可
人不見心憂見之喜豈容遠別間山岳兩歲僅收書
一紙頗聞微祿不自養霧雨南方疫時起誰能忽送

千里來應有飛鴻渡江水蟲聲今夜空館涼秉燭相
看疑夢裏瓊枝何以失舊色客路風塵亦勞矣我今
不解出門行病眼流眇肉生髀與奪得喪未足較惟
有一貧聊復爾暫來即去何使然撫琴東西覓知己
當時結交豈不多下車相揖今無幾願君窮達存此
心勿使千年笑餘耳

次韻荅朱冠軍遊城西之作

前年城西作冶遊桺條拂蓋花迷舟笑看明月問狂
客我舉大白君當浮去年城西復偶佳酒伴家家邀
即去東鄰寺裏花正開半醉半醒遊幾度今年有花

愁獨尋閉門三日卧春陰將軍小隊遊何處日暮空
聽車馬音臯橋秦娘殊窈窕爲我喚來歌永調客愁
草草不易除世事茫茫本難料玉壺一雙秋露傾唯
此可以忘吾情醉歸共射草中石笑劈弓弦霹靂鳴

贈步鍊師禱雨

白頭道士騎一鶴手把青蓮下寥廓人間又見海田
枯十丈黃塵沒城郭昔年服事茅長君能役鬼神呼
風雲下爲羣生掃旱沴雨工驅起如羊羣陰雷填填
天欲怒靈飈吹旗紫壇暮書入重關虎豹開僻沉古
井蛟龍護須臾甘澍何滂沱十日不雨應無禾祠官

空爲大雩舞，覩女羞作迎神歌。明朝師歸定何許，雲裏懸珠火如黍。更煩夜起把天瓢，翻作東南洗兵雨。
題朱澤民荆南舊業圖

睢陽醉磨一斗墨，夢落荆南寫秋色。大陰垂雨尚淋漓，哀壑回風更蕭瑟。楓林思入煙霧清，湖水愁翻浪波白。谿上初逢野老航，山中遠見先生宅。秫田半頃連芋區，茅屋三間倚蘿薜。僧來看竹乘小輿，客去尋苓借高屐。任公臺下石可坐，周侯廟前路曾識。虎迹時留暮苔紫，蛟氣或化秋雲黑。城郭當年別已久，風塵此日歸不得。落日書齋半壁明，圖畫卧對空相憶。

月支王頭飲器歌

磧中萬騎驕，嘶雪頭挂金鞍。敵初滅歸來，添作太白盃。胡酒寒凝色如血，故國無榮歸夢迷。朽骨飲恨空如泥，琵琶聲中鬼語雜。酥燈照夜風淒淒，崑崙倒瀉黃河入袍汗。淋漓疑淚溼，部落誰酌國士恩。尊前一夜無聲泣，烏縣降王猶疾首。起奉單于千萬壽。

海石爲張記室賦

大星墮水聲若吼，祖龍夜叱神羊走。誰將五色補天餘，屹障狂瀾歲時久。空憐山頭精衛鳥，身墮風波銜不了。媧皇去後幾桑田，鼇背靈峰一拳小。

張中丞廟

延秋門上烏啼霜
羯奴曉登天子牀
江頭老臣淚暗
滴萬乘西去關山長
公卿相率作降虜
草間拜泣如羣羊
當時不識顏平原
豈復知有張睢陽
孤城落日百戰後
瘦馬食尾人裏瘡
男兒竟爲忠義死
碧血滿地嗟誰藏
賀蘭不斬上方劍
英雄有恨何時忘
千年海上見祠廟
古苔叢木秋風荒
摩挲畫壁塵網裏
勇氣燁燁虬髯張
巫歌大招客酹酒
忠魂或能來故鄉







高季迪先生大全集卷之十一



長短句體

青丘子歌

江上有青丘予徙家其南因自號青丘子閒
居無事終日苦吟間作青丘子歌言其意以
解詩淫之嘲

青丘子臞而清本是五雲閣下之仙卿何年降謫在
世間向人不道姓與名躡屩厭遠遊荷鋤懶躬耕有
劔任羞澀有書任縱橫不肯折腰為五斗米不肯掉

舌下七十城但好覓詩句自吟自酬賡田間曳杖復
帶索傍人不識笑且輕謂是魯迂儒楚狂生青丘子
聞之不介意吟聲出吻不絕呀呀鳴朝吟忘其飢暮
吟散不平當其苦吟時兀兀如被醒頭髮不暇櫛案
事不及營兒啼不知憐客至不果迎不憂回也空不
慕倚氏盈不慙被寬褐不羨垂華纓不問龍虎苦戰
鬪不管烏兔忙奔傾向水際獨坐林中獨行斲元氣
搜元精造化萬物難隱情冥茫八極遊心兵坐令無
象作有聲微如破懸蝨壯若屠長鯨清同吸沆瀣險
比排崢嶸靄靄晴雲披軋軋凍草萌高攀天根探月

窟犀照牛渚萬怪呈妙意我同鬼神會佳景每與江
山爭星虹助光氣煙露滋華英聽音諧韶樂咀味得
大羹世間無物爲我娛自出金石相轟鏗江邊茅屋
風雨晴閉門睡足詩初成叩壺自高歌不顧俗耳驚
欲呼君山老父攜諸仙所弄之長笛和我此歌吹月
明但愁歛忽波浪起鳥獸駭叫山搖崩天帝聞之怒
下遣白鶴迎不容在世作狡獪復結飛珮還瑤京

登陽山絕頂

我登此山巔不知此山高但覺羣山總在下坐撫其
頂同兒曹又見太湖動我前洶湧三十萬頃煙波濤

長風吹人度層嶂不用仙翁赤城杖峰迴秋礙海鶻
飛日出夜聽天雞唱中有一泉長不枯乃是蜿蜒神
物之所都老藤陰森洞府黑樹上不敢畱棲鳥常年
禱雨車來此投金符靈旗風轉白日晦馬鬣一滴露
三吳巖巒蒼蒼境多異樵子尋常不曾至探幽歷險
未得歸忽聽鐘來澗西寺此時望青冥脫略塵世情
白雲冉冉足下起如欲載我昇天行古來名賢總何
有只有此山長不朽欲呼明月海上來照把長生一
瓢酒浮丘醉枕肱洪崖笑開口秋風吹落浩歌聲地
上行人盡回首

張節婦詞

靈壽張明府嫡母早寡守志

誰言妾有夫中路棄妾身先俎誰言妾無子側室生
兒與夫似兒讀書妾辟纊空房夜夜聞啼鳥兒能成
名妾不嫁良人瞑目黃泉下

與客飲西園花下

一壺酒正滿一樹花仍新傾壺對花樹日暮西園春
不愛枝上花愛此花下人相逢莫學花無賴明日分
飛隨路塵

吳中逢王才隨朝京使赴燕南歸

江南草長蝴蝶飛白馬新自燕山歸燕山歸不堪說
易水寒風薊門雪朝邸空隨使者車禁闈不受書生
謁一杯勸君歌莫哀歸時應過黃金臺不見荒基秋
來土花紫伯圖已歇昭王死千載無人延國士

白雲泉

白雲不爲雨散在清泉流泉氣復成雲山中同一秋
巖前石竇幽寒處雲自長浮泉自注潛龍未起出深
泓渴鳥時來下高樹雲應無心飛上天泉亦不肯隨
奔川老僧愛此不復下山去因雲飲泉終歲年

戎王追彘圖

前騎脫兔奔後騎驚鴻急火燒秋草獵場空一彘窮
追勢難及大小當戶左右賢單于勇銳闕支妍雕戈
白羽謾爭發衆中得雋知誰先君不見天策將真天
子馳一馬殪四豕

茅山陳道士卧雲所

不逐雲渡海寧隨雲出山但邀雲共宿日夕三峰間
細縷枕席潤晻靄房櫳閒聽松閣前風滿耳吹盡白
雲應睡起

贈醉樵

川釣已遭獵野耕終改圖不如山中樵醉卧誰得呼

采山不采松松花可爲酒酒熟誰共斟木客爲我友
木石已去空石牀舉杯向月邀吳剛借汝快斧斫大
桂要令四海增清光林風吹髮寒擁耳獨枕空尊碧
巖裏此時忘却負薪歸猛虎一聲驚不起世間萬事
如浮煙看碁何必逢神仙青松化石鶴未返酒醒又
是三千年

雷雨護嬰圖

兒衣寒母衣溼風雨蒼黃歸意急雷忽鳴兒忽驚抱
兒與兒同死生樹聲吹迴水聲注田家尚遙無避處
看圖誰念亂離人白日青天棄兒去

南園

君不見平樂館古城何處寒雲滿君不見奉誠園荒
臺無蹤秋草繁白日沉山水歸海寒暑頻催陵谷改
皇天大運有推移富貴於人豈長在請看當年廣陵
王雙旌六纛何輝光幸逢中國久多故一家割據誇
雄強園中歡游恐遲暮美人能歌客能賦車馬春風
日日來楊花吹滿城南路壘石爲山引泉爲池辟疆
舊園何足奇經營三十年欲令子孫永保之不知回
首今幾時繁華掃地無復遺門掩愁鴟嘯風雨種菜
老翁來作主空餘怪石卧池邊欲問興亡不能語春

已去人不來一樹兩樹桃花開射堂鞠圃俱青苔何
須雍門琴但令對此便可哀人生不飲胡爲哉人生
不飲何爲哉

滄浪亭

滄浪平無風波之驚滄浪廣有風月之賞吳興長史
舊遷謫買得此水自號滄浪客乘釣在北渚榜船臨
西洲白鷗不來往遣興誰同遊發清歌弄清景醉入
荷花夢魂冷天念儒臣去國冤故與無塵水雲境斯
人去已遠我來空復情滄浪水雖在不似昔年清躋
躋獨過亭前路疎葦寒煙沙鳥鳴

石射棚

石射棚張石城石鼓響或發石騎勢欲行彷彿古戰
場上有愁雲生餓鷓嘯寒風砉砉箭鏃鳴何人作此
畱山中鳥獸欲過膽盡驚疑是神禹治水時來教鬼
射降妖精至今風雨夕猶聽人馬聲嘗聞父老言鼓
鳴則有兵方今瘡痍民脫命見太平我願碎其鼓隳
其棚人安四海清自此萬年無戰爭

走狗塘

春堤長春草淺此地吳王曾走犬獵場四面圍畫旗
紅炬照輦還宮遲割鮮夕宴誰共食臺上妃子非樊

姬春苑年來草仍綠韓盧已去多麋鹿君不見漢皇
縱狗殊有功逐兔直到烏江東

清冷閣

臨清池敞華閣明月入綺疏微風沾羅幙白波連遠
洲竹冷芙蓉愁客聽秋聲起魚驚星影流冰絃彈罷
鷓鴣曲天河墮水涼宵促試問西園閣上遊何如南
浦舟中宿

烏夜邨

荒邨烏夜棲忽繞月明啼生得東家女身為萬乘妻
至今種高樹不遣烏飛去居人凡幾家愛聽啼啞啞

啼啞啞勿驚怪婦開門向烏拜

醉贈宋卿

勸君歸來休莫作澹蕩遊黃雲已蔽燕國晚白露正
滿梁園秋千石酒萬戶侯請君論此誰當優吳門日
出花滿樓小婦喚客不解羞君畱綠綺琴我脫紫綺
裘今朝春好能飲否東風吹散江南愁

潘隱君月樓歌

樓高高月皓皓容月多得月早朝看西墮江夕見東
生鳥我歌烏飛向穹昊樓中之人須醉倒人長閒月
長好月中藥成人不老

約諸君看范園杏花不果後偶獨遊而杏已
盡落惟桃數樹盛開感而有賦因寄諸君
久欲與君往那期成獨來參差二月暮過却杏
花開杏花雖好今無在只有桃花笑相待杏
白桃紅何淺深春還不負看花心看花心君
更劇莫爲不來空歎息世間萬事盡如花著
意相尋應不得

番人移帳圖

懸爾弧韜我弓拔帳何徒榆林東顧語勿驅日暮中
野兒未十歲不能騎馬

夜間謝太史誦李杜詩

前歌蜀道難後歌偏仄行商聲激烈出破屋林鳥夜
起鄰人驚我愁寂寞正欲眠聽此起坐心茫然高歌
隔舍與相和雙淚迸落青燈前李供奉杜拾遺當時
流落俱堪悲嚴公欲殺力士怒白首江海長憂飢二
子高才且如此君今與我將何爲

贈金華隱者

我聞名山洞府三十六一一靈蹤紀真籙金華秀出
向東南遠勝陽明與句曲樓臺縹緲開煙霞天帝賜
與神仙家靈源有路不可入但見幾片流出雲中花
子房之師赤松子三千年前亦居此飛行恍惚誰解

尋漫說至今猶不死松花酒熟何處遊瑤草自綠春
巖幽羣羊卧地散如石老鹿耕田馴似牛聞有隱君
子乃是學仙者自從入山中不曾到山下世人莫知
其姓名以山呼之不敢輕樵夫忽見苦未識只疑便
是黃初平嗟我胡爲在塵網遠望高峰若天壤茯苓
夜煮儻許餐鐵杖來敲石門響

春初來

春初來柳條欲舒花未開曉日窗前鳥聲喜似報春
來喚人起東風吹煖入煙痕綠遍江南幾千里去年
春六憶愁人倏忽今年又見春但欲逢春醉杯酒不

管相思成白首

題黃大癡天池石壁圖

黃大癡滑稽玩世人不知疑似阿母傍再謫偷桃兒
平生好飲復好畫醉後灑墨秋淋漓嘗爲弟子李少
翁貌得華山絕頂之天池乃知別有縮地術坐移勝
景來書帷身騎黃鵠去來遠縞素飄落流塵緇潁川
公子欣得之手持示我請賦詩我聞此中可度難玉
枕秘記傳自青牛師池生碧蓮花千葉光陸離服食
可騰化遊空駕雲螭奈何靈蹟久闕藏荒竹滿野啼
猩猩尋真羽客不肯一相顧却借釋子營茅茨我昔

來遊早春時雪殘衆壑銷寒姿磴滑不敢騎馬上青
鞵自策桃筇枝上有煙蘿披拂之翠屏下有沙石蕩
漾之清漪晴天倒影落明鏡正似玉女曉沐高鬟垂
飲猿忽下藤裊裊浴鶴乍立風澌澌匡廬有地我未
到未省與此誰當奇掃石坐其涯浴洄引流卮醉來
自照影俯笑知爲誰落梅撲香滿接籬暮出東澗鐘
鳴遲歸來城郭中復受塵土欺十年勝賞難再得恍
若清夢一斷無由追朝來觀此圖惻愴使我悲當時
同遊已少在我今未老形先疲人生擾擾嗟何爲不
達但爲高人嗤漢南已老司馬樹峴首已仆羊公碑

惟應學道悟真訣不與陵谷同遷移仙巖洞府孰最
好東有地肺西峩嶺高崖鐵鎖不可攀援以逕上仰
望白雲樓觀空峩巍此山易上何乃遺便與猿鶴秋
相期欲借太乙舟夜卧浩蕩隨風吹洞簫呼起千古
月照我白髮涼絲絲傾玉醪薦瑤芝招君來遊慎勿
辭無爲漫對圖畫日夕遙相思

書夢中

夢行塞下沙無水無蒹葭牧羊人歸霜草短平地鴈
羣棲不煖騎馬茫茫入遠煙一行衝起上秋天我夢
驚回鴈飛去角聲吹斷江城曙

媯蜚子歌

為友王常宗作蓋其號也

媯蜚子乃是軒轅之裔虞鯀之孫混沌既死一萬年
獨抱大樸存竊伏在草野冥心究皇墳蚤逢三光五
嶽之氣乍分裂天狼下地舐血流渾渾鹿走秦中原
蛇鬪鄭國門俎豆棄草莽干戈歛崩奔媯蜚子便欲
東遊渡弱水沐髮滄海朝陽盆又欲西行沂河漢踰
崑崙山橫川阻兩地俱不可以往兮歸來掩戶卧旦
昏蒔黍一區注醪一樽妻給井臼兒牧雞豚不詰曲
以媚俗不偃蹇而凌尊作為古文詞言高氣醇溫手
提數寸管欲發義理根上探孔孟心下弔屈賈魂其

質耀金石其芳吐蘭蓀叩虛答有響蹶險成無痕陸
珍雜水怪變狀弗可論幾年兀兀不肯出坐待真主
應運九五開乾坤鶴書自天來幽隱初見拔使者遠
造廬雞鳴起膏轄興纂金匱編尚書為給劄奸魂泣
幽塚下恐遭誅殺書成一代進紫宸鸞旗羽衛夾陛
陳閣門導謁稱小臣麻衣不脫拜聖人捧函近前殿
龍顏喜回春勅賚內帑之金與綺段其文織作銀麒麟
麟蒙恩乞還家以奉白髮親戴古弁垂長紳自號山
澤之臞民媯蜚子幸際明良時無為寂默坐老東海
湄青丘有客鈍且癡與汝欲結同襟期左鼓清瑟石

吹鳴篴作歌共祝天子壽五風十雨萬國赤子同熙
熙

贈劉生歌

生善鍛為李鍊師製三
隅鐵判藥刀求歌贈之

君不見歐冶子金鑄魚腸照吳市君不見徐夫人藥
淬七首驚函秦奇鋒當年非不利氣奪秋雲愁白帝
伯圖恃此竟無成良冶徒為殺人器何如劉生獨煉
昆吾鋼大爐夜鍛騰虹光神鍼妙刃兩如水提出二
豎皆奔藏利器之功有如此特為醫仙起人死囊中
長得伴刀圭海上何須剗犀兕我看十年太白西方
明銅山尋鑿兵縱橫幸逢聖人生干戈戢四海清願

生但制此器勿制兵民無疫癘樂太平

登金陵雨花臺望大江

大江來從萬山中山勢盡與江流東鍾山如龍獨西
上欲破巨浪乘長風江山相雄不相讓形勝爭誇天
下壯秦皇空此瘞黃金佳氣蔥蔥至今王我懷鬱塞
何由開酒酣走上城南臺坐覺蒼茫萬古意遠自荒
煙落日之中來石頭城下濤聲怒武騎千羣誰敢渡
黃旗入洛竟何祥鐵鎖橫江未為固前三國後六朝
草生宮闕何蕭蕭英雄來時務割據幾度戰血流寒
潮我生幸逢聖人起南國禍亂初平事休息從今四

海永爲家不用長江限南北

春日客園無花偶感

荒園多青草而無一樹花東風吹春來只向何人家
南池舊日花滿煙美人夜彈蜀國絃亂枝迷眼歸不
得醉帶月露花陰眠無花雖足歎無酒更可悲如今
但得一壺滿何用紛紛紅紫爲

白下送錢判官岳

白門有垂楊復有春酒香此地逢君誰乃是錢少陽
相逢旣沽白門酒相送還攀白門柳不向公車更上
書却趨官署初垂綬日落淮水頭送君去悠悠梁王

苑裏花飛盡明日相思過汴州

贈錢文則琴呈良夫

古樂久不聞古器亦殘缺惟有朱絃琴韻與箏瑟迴
殊別此夜聽君彈四座寂不喧古人有遺恨似向絃
中言初調乍冲融再弄忽悽惋秋猿春鳥相間啼夢
遶瀟湘碧雲遠怒濤勢出峽鬪石轟奔雷漫流入滄
海悠然去無回銅瓶一墮井汲引不可上離車軋軋
曉出關欲行未行苦惆悵夜深庭樹風雨驚恍疑鬼
神入蒲城須臾響靜月照席玉壺凍破冰崢嶸我心
正如水萬籟不到耳無端聽此聲雙淚迸落百感生

起請且莫彈胡笳文姬思家意咨嗟請莫彈履霜孝
子在野愁彷徨願君拂拭登高堂先彈南風後文王
美哉大雅聲洋洋使我坐聽憂俱忘

雪齋為述上人賦

君不見韓刺史疲馬度關愁欲死君不見党將軍美
人擁帳飲正醺憔悴豪華兩何有世人徒勞競奔走
雪深三尺坐寒龕誰似西齋衲衣叟開門一笑定起
遲虛空大地皆春熙松梢一片忽墮響夜靜山空人
不知此地應憐無熱惱尋梅莫若尋詩好便穿蠟屐
踏瓊瑤曉徑從埋不須掃

燕覆巢

雙燕生五雛怡怡向高屋雛飢母出風雨來新作深
巢竟傾覆主人念雛不解飛移之別壘待母歸雛雖
得壘燕勿喜相逢主人亦偶爾明年作巢當更好須
信安居最難保

五禽言和張水部

泥滑滑啼空山行人愁道路難高天浮雲自多雨人
不知還空怨汝
提壺盧趣沽酒杏花邨中媪家有君如不飲過却春
此鳥枝頭應笑人

郭公郭公天寒水空朝飛暮棲蒹葭中蒹葭中啼不
息千載魂應怨亡國
婆餅焦婆去餉孫田隴遙隴頭小麥穗已搖但願好
收食自饒爾莫憂婆餅焦
脫却破袴脫却破袴谿深無船滇涉渡亦思脫舊復
換新春機已空愁殺人

約王孝廉看梅

君莫憶東閣吟我莫憶西湖見兩地年來信不通塵
埃正滿春風面不知山中三日雪掩扃修竹斜倚愁
娉婷讀書屋空滿梁月夢斷冷落畱餘馨相尋定有

迎船鶴煙霧籠寒綈衣薄一尊好共煖花魂明日關
山笛中落

題滕用衡所藏山水圖

滕君興在煙霞間遠遊十年今始還畫圖示我有層
嶂竟似何處之名山君言我初適東越酒船橫渡鏡
湖月醉詠謫仙天姥吟海光欲曙清猿歇瑤草春已
生便入金華行道逢牧羊兒疑是黃初平從此西遊
楚江水大帆如雲掛空裏柁樓醜酒喚長風一日看
山一千里不聞東林鐘但見香爐峰波迷洞庭闊樹
隔瀟湘重白沙翠屏經過好就中幾度曾幽討麻姑

壇上掃落花堯女祠前薦芳藻晚客湖南逢鴈回登
臨長上楚王臺天從朱鳥峰頭轉江自黃牛峽外來
蒐奇歷險今應倦默坐舊遊空數遍時向明窗看此
圖好山一一皆重見我聞君言自歎嗟身如處女愁
離家閉門讀書無半車髀肉漸生空鬢華牀前塵土
蔽雙屐何不踏之踐苔石幸逢盛世道路平五嶽尋
真皆可適便當往抱綠綺彈松風行盡萬壑千巖中
仙書探得金匱空歸來誇君重相逢握手一笑吳門
東

余未有嗣海雪道人以張仙畫像見贈蓋蘇

老泉嘗禱而得二子者予感其意因賦詩以
謝

我年已及壯吉夢未兆熊雖有三女兒豈足慰乃公
每聞鄰家子夜雨誦經史起坐秋燈前顧影長嗟不
能止道人念我書無傳畫圖卷贈成都仙云昔蘇夫
子建之玉局禱甚虔乃生五色兩鳳鸞和鳴上下遂
與夫子相聯翩勸我勤禮之當有明珠出深淵我感
道人意捧觴拜其前君不見東家翁力耕積多田平
生辛苦立門戶兩兒棄擲如浮煙惡兒亦何須願得
一子賢上以承吾宗下以與我玄仙乎有驗看明年

請君更賦懸弧篇

五言古詩
請君更賦懸弧篇
...

高季迪先生大全集卷之十二

五言律詩

草堂夜集

山家具雞黍夜與故人期
暫喜逢歡會都忘在亂離
火寒移坐密燭盡得詩遲
莫聽高城角明朝別又悲

過胡博士郊居

胡善筮

頭白蘭陵客幽居共一邨
老來吟力退貧去告身存
夕吹鳴梨葉秋泉注稻根
時因來問筮獨叩樹間門

送茅侯

欲知難別意孤棹去還停候吏分遙邇離人雜醉醒
城臨秋水渡樹帶夕陽亭後夜看吟燭憐君宿郡廳
衡陽初失伴歸路遠飛單度隴將書怯排空作陣難
呼羣雲外急弔影月中殘不共息鷺宿蒹葭夜夜寒
髮隨秋葉落心共曉雲舒稍改新題句渾忘舊讀書
林爭移樹鳥池響食萍魚無限悠然意涼天獨步餘

次韻過建平縣

縣雖三戶小地僻罷兵防茶市逢山客楓祠祭石郎

雲埋鳴澗斧沙膠度谿航應愛青山好經過駐旅裝

鵲軒

金華朱少府生時有鵲集於庭後樹每歲生
日輒一來其母將死鵲悲鳴久之而去因以
名軒識其思母之意云

神鵲曉鳴枝飛來自期門前懸矢日堂上捧樽時
詎信填河事寧歌繞樹詩只憐君望斷風木助餘悲

寄杜二進士

花開寄別離花落正相思交誼多年見鄉愁近日知
我方淹上國君豈老明時試問江干閣同登復共誰

雨篷

楚雨滿汀洲
瀟瀟灑灑客舟夢驚孤枕夜愁掩一篷秋
葦葉寒相戰
灘聲暗共流此時湘浦上同聽只沙鷗

西澗秋聲起涼風助振號
數禽翻樹裏萬葉下亭臯
初訝來山雨還疑捲浪濤
老僧方入定終夜任蕭騷

杏花飛燕圖

雙飛如鬪捷終日幾西東
尾拂花稍露身翻柳絮風
入簾時趁蝶歸壘每銜蟲
何處長相見佳人院落中

扇

皎皎復團團何人剪素紈
驅螢臨几席撲蝶近闌干
似月驚朝見生風變夏寒
時移當日棄莫怨網乘鸞

新荷

如蓋復如鈿初生雨後天
葉低浮水上莖弱裊風前
乍覆遊魚戲難藏宿鷺眠
佳人休便折畱蔭採蓮船

鷺

雪羽獨修修閒情戀遠洲
聲沈煙浦晚影度月灘秋
避棹驚時起窺魚立未休
蒹葭同夜宿應只許沙鷗

馬

名駒產渥洼牽出萬人誇
逸足輕千里高鬣散五花

城南遊紫陌塞上踏黃沙不受蠻奴策驕嘶向日斜

梧桐

井邊雙玉樹高結自生涼影散秋雲薄聲喧夜雨長
疎英飄碧簾亂葉響銀牀綠綺誰能斲持將奏鳳凰

圍碁

偶與消閒客圍碁向竹林聲敲驚鶴夢局罷轉桐陰
對坐忘言久相攻運意深此間元有樂何用橘中尋

池上晚酌

夕陽初雨過團扇送涼過竹裏方歸鳥沙邊尚浴鷺
脫巾懸峭壁流筇逐回波六逸當年樂何如此處多

簾

蠻藤巧織成乍展覺涼生紋感寒波細光搖夜月明
坐令葵扇棄眠稱石牀平須信南軒下炎天夢亦清

射柳

風煖畫旗張將軍集射場馬驕嫌轡急人勇喜弓強
但見青條折那知白羽翔三軍歡笑處巧中勝穿楊

流螢

熠燿復青熒流光不自停暗飛如避月遠墮欲隨星
穿樹臨幽檻綠莎集小庭莫將羅扇撲囊取照遺經

水殿圖

波影繞闌干清虛似廣寒荷香臨檻挹月色捲簾看
夜靜聞清吹涼多却素紈冥酣思薦鱸銀縷簇金盤
翾翾乍離脫咽咽試初鳴隔葉棲身穩移柯忽意驚
亂催窗日墮微喚浦風生何待當秋聽今朝已感情
風熟書林間避暑
自愛蠻藤滑閒舒卧石苔松風催暑去竹月送涼來
石氣生琴薦泉香入茗杯却憐行路子愁喝向黃埃
送劉省郎出佐邊郡
符券前軍重衣冠上客才地圖連異壤星次出中台

暮雨車投峽秋風扇却埃省中梧樹在鳴鳳會重來

湓浦琵琶圖

秋夜相逢處閨愁雜宦情四絃風共拂兩棹月同明
司馬青衫溼佳人白髮生至今湓浦上楓葉尚哀聲

金人馬圖

名王愛遊獵初試射鵬弓白草秋原曠黃沙晚塞空
琵琶應漢女騷裊是胡驄歸醉葡萄綠穹廬在月中

夜訪芭蟾二釋子因宿西澗聽琴

清夜獨幽尋巖扉落葉深許攜陶令酒來聽穎師琴
人醉月沉閣烏啼風滿林應畱西澗水千載寫餘音

錢塘送馬使君之吳中

樟亭離席散遙發畫幡車飛雉新阡麥啼鶯故苑花
望山登郡閣行水到田家莫道凝香句前人獨可誇
與劉將軍杜文學晚登西城

木落悲南國城高見北辰飄零猶有客經濟豈無人
鳥過風生翼龍歸雨在鱗相期俱努力天地正烽塵

和周山人見寄寒夜客懷之作

亂世難爲客流年易作翁百憂尋歲暮孤夢怯山空
門掩雲峰裏燈明雪竹中無因乘夜訪相慰一尊同

哭臨川公

身用已時危衰殘况病欺竟成黃犬歎莫遂白鷗期
東閣圖書散西園草露垂無因奠江上應負十年知

一窗秋影

修竹與疎桐秋陰接桂叢竝生金井側同映綺疏中
隱匿纔籠霧交橫忽颭風不須懷故館月落并成空
早春侍皇太子遊東苑池上呈青坊諸公

銅輦出紆徐春宮晝講餘戟煩郎將衛簡授大夫書
草長園鳴鹿冰開沼躍魚從遊伴商皓忝竊愧何如

題谿山小隱

何處谿山隱衡門對野橋晚風攜鶴子春雨種魚苗

小徑斜通竹疎籬曲護蕉人生閒自足不問楚辭招
城西客舍送周著作砥

客中寒食後惆悵送君違花隱歸城旆風吹渡水衣
夜窗炊黍散春苑鬪茶稀誰念西齋雨相思獨掩扉
兵後出郭

俯仰興亡異青山落照中民歸鄰樹在兵去壘煙空
城角猶悲奏江帆始遠通昔年荆棘露又滿闔閭宮
謝賜衣

臚呼遙捧賜服拜望蓬萊香帶爐煙下光迎扇月開
奇紋天女織新樣內工裁被澤徒深厚慙無奪錦才

西清對雨

楚臺雲起遠漢苑雨來微曉溼宮城旆寒霑陛楯衣
溝中隨葉墮爐畔帶煙飛坐詠西清暇君王召對稀

夜宿太廟齋宮

鳥散廟堧空清香肅闕宮太常齋禁密列祖享儀崇
井叩銅瓶月墀鳴玉佩風聽鐘候車駕庭燎已燿燿

送秦主客遷侍儀使

蕃客來曾識衣冠上國風承恩趨北闕罷直出南宮
導駕爐煙裏催班漏點中時清多奏頌還向閤門通

春日退直呈禁署諸公

待詔直東華歸休每日斜職連詞客苑俸入酒胡家
檐網長縈絮庭磚欲過花知君未出院應草侍中麻
蕃客來送張司勳赴寶慶同知
乍出司勳幙還乘別駕車按圖猶漢地輸布盡蠻家
山熱蛇懸樹江晴鶴浴沙郡樓回首處北斗近京華
魚鱗寓天界寺
雨過帝城頭香凝佛界幽果園春乳雀花殿午鳴鳩
萬履隨鐘集千燈入鏡流禪居容旅跡不覺久淹留
禁臺雲送前進士夏尚之歸宜春

淒涼庾開府老去復如何故國歸鴻少新朝振鷺多

菊荒應自歎麥秀竟誰歌相送堪愁思蕭蕭楚水波

早出鍾山門未開立候久之

關吏收魚鑰趨朝阻向晨忘鳴雞睡熟倦立馬嘶頻
拆靜霜飛堞鐘來月墮津可憐同候者多是未閒人
雪夜宿翰林院呈危宋二院長

偶伴王摩詰寒宵宿禁林院鈴風外靜宮漏雪中沈
絳蠟銷吟燭青綾擁賜衾明朝陪賀瑞銀闕曉光深

自天界寺移寓鍾山里

移寓鍾山里開軒見翠微寺僧違乍遠鄰父識猶稀
愛讀明開牖防偷固設扉誰言新舍好畢竟未如歸

夜逢故郡賀冬至使胡普二博士同宿

會宿本無期忻逢兩舊知問年驚別久候曉畏朝遲
寒澀高城漏陽迴上苑枝明朝使事畢歸騎又天涯

至日夜坐客館

久客漸忘家今宵忽感嗟旅蹤猶泊梗陽氣又吹葭
巷屋門封雪鄉關路遶沙閨中想逢節也解憶京華

送鮑翰林遷官陝右

鑿坡初罷直西去惜離羣載筆唐供奉褰帷漢使君
濁流河驛雨高樹嶽祠雲公暇應懷古登臨賦夕曛

送姚架閣

芳晨悵別筵新柳驛亭前客散春城酒人登暮雨船
江樓先見日郡界遠臨邊到後安民俗應知從事賢

送曾主簿之平樂

路出桂江東鄉音想未通蛇飛山苦霧鵬運海多風
木魅長欺客花蠻少學農縣廳何處在柳葉晚陰中

桓簡公廟

荒林慘淡中石馬欲嘶風功在山畱碣威存廟挂弓
飢鴉迎祭客走鼠駭巫童千載宣城道人憐內史忠

送陳則

挾策去誰親侯門不禮賓愁邊長夜雨夢裏少年春

樹引離鄉路花驕失意人一杯歌短調相送欲沾巾
暮春送陳郎中出守樵李

出幙方爲郡行車動畫輪圖書歸省吏風俗問州人
塘水龍鱗細城槐兔目新莫言花已盡君到自陽春
送楊從事從軍

南風動燕麥送子悵如何迢遞戎車役淒涼橫笛歌
天籠平野迴山繞古關多莫笑書生怯能當曳落河
送王員外遷崇教

能書晉公子清宦稱高情海樹潮帆遠江風夏服輕
官從三省去僧出萬山迎誰說簪纓累名林得按行

吳中送顧生歸海陵

涼風初變柳歸興片帆孤家向三秋到田經幾歲蕪
舊音猶帶楚新夢未離吳明日江南北相思有鴈無

園中

席煖林中憩衣涼水上歸腐瓜蟲食徧空樹鶴巢稀
邂逅幽尋得參差薄願違喜無來往者秋草沒園扉

送前國子王助教歸臨川

去國獨依依羈臣淚滿衣夢中燕月遠望裏楚山微
世變人驚老身全詔許歸舟前楓葉落應到故園扉

送潘巡檢之閩中

京師到閩海秋色幾程餘
莎柵山兵守榕林島戶居
曉衙雞應鼓晚邏騎隨車
清世元無盜將軍好讀書
送思上人

名林雖盡廢南去只隨緣
野飯晨留鉢城鐘夜到船
虎馴應畏法鳥喚不驚禪
他日期相見高峰舊塔前
宴王將軍第

流水通侯第行雲傍妓臺
雨催牙仗散風引羽觴來
曲學移聲按詩隨得韻
裁莫令遊宴歇次第過花開

送朱從事之吳興

釋褐方從宦青山故郡鄰
草深湖帶雨花暗驛藏春

鼓聚祈蠶女舟逢射鴨人
幙中應待久徒此惜離辰

和友人過采石

山暝斷磯頭猿聲兩岸愁
柳間娼女酒月下估人舟
擒虎嗟橫渡騎鯨憶醉遊
停撓正懷古風急葦花秋

詭柳

何恨苦長顰纖姿嫵媚春
慣愁行路客羞比舞筵人
亂葉斜斜雨狂花袞袞塵
殘蟬來噪日應落漢潭濱

無題

顧影出中堂長眉學內妝
本爲戚里婦不是狹斜娼
扇撲園中蝶箏彈陌上桑
相逢不敢笑只恐斷君腸

京師寓廨三首

誰言舊隱非靜里且相依綠樹城通苑青山寺對扉
官閒休直早客久夢還稀是物春來典唯存舊賜衣

其二

幾夜頻聽雨經春不見花
藤蕪青渚燕楊柳白門鴉
拙宦危機遠工吟癖性加閒坊車馬少不似住京華

其三

寂寞過芳時幽懷只自知袖無投相刺篋有寄僧詩
鼠跡塵凝帳蛙聲雨到池疎慵堪置散不敢怨名卑

送舒徵士考禮畢歸四明

寄語關門吏休輕尚布衣叔孫聊應召周黨竟辭歸
赤日京塵遠蒼煙海樹微送君還自歎老却故山薇

陪客登陶丘

相逢俱失意此地偶同遊獨樹邀人去斜陽爲客畱
依邨煙景夕近水竹聲秋設有歸歎歎何山是故丘

王公子宅五月菊

秋英忽夏發宛在阿戎家細認驚初見高吟喜共誇
不依寒竹雨欲映午榴霞我旨甘遲暮尊前有此花

送周復秀才賦行李中一物得紈扇

不畫乘鸞女應憐素質新霜機驚落早風塵讓揮頻

席上曾歌怨窗間或掩顰何如爲君子遠路障埃塵
送流人

漢條應偶觸蠻俗未能諳海近風多颶山昏瘴似嵐
行衝哀甸虎食畏蠱家蠶鄉國何年返縣知老日南

贈張省郎

漢署早爲郎長遊鳳沼傍雞知壺水候馬識火城光
每載趨曹筆時熏直省香邊書無一羽冠蓋得翱翔

送瀚公住靈巖

離宮遊路絕名寺道場開我昔題詩去師今說法來
茱萸垂澗戶菡萏發池臺興壞俱空幻登臨不用哀

送宿衛將出守鄧州

中郎身領仗宿衛在承明舊射雙鵬落新乘五馬行
紅雲遙魏闕白水近穰城好勸諸年少春來賣劒耕

甘露寺

勝地江山壯名林歲月遙刹藏京口樹鐘送海門潮
月黑龍光發天清蜃氣銷何當尋狼石閒坐話前朝

送張羽後夜坐西齋

閒齋聽鐘坐憂緒悵多端鳴鴈雨中急離人江上寒
秋燈下木葉夜艇隔風湍別後情蕭索方知舊會歡

徐山人別墅

茶香孤野發竹色四鄰分掃地侵蟲字開窗散鳥羣
樹涼池過雨苔潤石生雲我出無車馬偏宜訪隱君
客館秋懷

獨卧愁空館牆陰野豆開暑將潮氣斂秋與竹聲來
身賤多違志時清少棄才慙非張仲蔚門戶有蒿萊

秋夜宿周記室草堂送王才

相別還相戀秋宵暫對牀人情貧後見客况醉中忘
池柳疎含吹江雲薄護霜離舟待明發愁思劇茫茫

江上雨

冥冥衆樹昏浩浩一江渾急有迴風韻輕無入霧痕

鳥啼叢竹嶺人卧落花邨門巷春泥滑誰來共酒尊

送賈二進士歸省

年少擅詞華曾看手八叉晨裝歸路雨春酒別筵花
馬帶雲過嶺人同燕到家罷官趨覲好不是謫長沙

贈演師

石橋尋禮罷歸住白雲層法悟經慵讀年衰塔倦登
青苔生砌錫黃葉翳龕燈我欲相依老前身恐是僧

送錢氏兩甥度嶺

吏送投荒去應歸下瀨營一家十口散萬里兩身行
洞獠欺商市山魃喚客名江邊南望泣不盡渭陽情

送客歸閩省觀

秋城聞暮砧歸思忽盈襟客久依人遍親衰念子深
青山多嶺路紅荔到鄉林菽水還堪樂何須季子金

圓明佛舍訪呂山人

憐君不出院結夏與僧同陰竹行廊遠香花掩殿空
飯分齋鉢裏書寄藏函中茶宴歸來晚西林一磬風

答宋人廉夜飲王氏池亭見懷

遙聞池上酌涼夜失炎天酒碧傾當竹衣香坐近蓮
浴波人弄月翻樹鳥鳴煙座上誰相憶惟應是惠連

賦得蟬送別

疎槐細柳中涼占一枝風蛻出形猶弱驚飛響未終
雨來林館靜日下驛門空離管尊前發淒涼調正同

何隱君小墅

移家營別墅一逕竹扉開泉滿疏渠放花多借地栽
僻間田器挂窗裏浦帆來自戀幽居樂誰言是棄材

贈張明府

聞道彈琴處門前柳帶沙海珍通估市湖稅減漁家
暮港迷荷葉秋田間豆花亂來無此地君政亦堪誇

送唐博士肅移家樵李

楊柳發初齊春陰廢苑西故人乘醉別新鳥傍愁啼

舟重全家去詩多一路題杏花開北郭誰復共招提
贈妓

樂籍小名收侯家舊主謳笑能撩客喜醉肯逐人畱
蝶識薰香氣鶯慙度曲喉更憐諳酒令少日住揚州
送顧侔之錢塘

之官即勝遊送別漫多愁草色荒宮燕槐陰達遠騶
湖通朝汲井潮動夜眠樓早向臨平過荷花已欲秋
荅高廉同飲後見寄

竹林清暑宴客散獨歸時愁寄歡餘別醒慙醉後詩
蟬催斜景急鳥度廣川遲何事聞鐘處勞君尚遠思

沈徵士鉉野亭

清時猶在野獨卧見高情移艇聞煙唱鉤簾看雨耕
江晴雙鶴下樹晚一牛鳴回首徒相憶柴車不入城
題醫師王隱君墓表後

贈朱山人

孤舟別楚水客鬢已蒼蒼竟賦招魂些虛傳續命方
悲風柏隴小積雨藥園荒生滅雖能悟看碑亦感傷
老來嫌衆累依澗獨開房積雨苔生桁迴風葉滿牀
學僧持淨律遊客錄奇方若問塵中事無聞不是忘

谿上

秋色共谿長遊人語笑涼萍開天倒影蓮墮水流香
魚罾和星漉禽罾帶雨張從今搖桂棹不必問瀟湘
次韻楊儀曹雨中
雨中池閣曉清簟薦文漪陰恐晴期遠寒疑暑候遲
荷高擎欲折柳重舞難欹應阻陪高詠開簾看散綵
年少客名都狂遊每共呼荷深箏在舫竹靜矢鳴壺
明月潮千里殘陽雨半湖故人能念否歡意近來無

送烏程馮明府

青山若下南一騎入晴嵐縣治琴聲古泉香酒味甘

竹欄春護鴨葦箔夏分蠶大小馮君後傳家爾最堪
喜了上人見過

幾時西澗別忽喜過家園澹泊林間供虛空世外言
豆花零晚架瓜蔓絡秋垣莫厭頻相過衡門久息喧

病目

閉目洗黃連深窗坐兀然未忘聽鳥興暫絕看花緣
問女知檐日嗔奴畏竈煙願因無見處得證定心禪

病目不飲

患目未全明醫教謝麴生暫從彭澤止恐學左丘盲
屏下蘭尊掩林間藥臼鳴坐聽連日雨何物慰閒情

賦得蟹送人之官

吐沫亂珠流無腸豈識愁香宜橙實晚肥過稻花秋
出籩來深浦隨燈聚遠洲郡齋初退食可怕有監州

江上早發

蒼蒼汀霧起何處望高城游子曉初發居人寒未耕
犬鳴林月落魚躍浦風生已有先行者煙中聞棹聲

客舍喜姪庸至

客裏逢人喜相過况阿宜遠游驚歲晚多難惜門衰
帆落江橋近鐘來野店遲一杯燈下語渾似在家時

哭周記室

萬里一羈臣悲歌楚水春漫期重會面竟作永傷神
主祭唯孤姪收詩有故人獨揮聞笛淚斜日下西鄰

過永定廢寺

亂後僧何去門閒落葉時晝昏秋蠹老齋斷午禽飢
罷說傳心法猶看賜額碑不知興壞理來此豈無悲

楓橋送丁鳳

紅葉寺前橋停君晚去撓醉應忘世難歸不計程遙
山隱初沉日風催欲上潮離魂來此處還似灞陵銷

盜發漢侍中許或墓

古墓竟誰穿虛傳錮最堅玉魚宵已出石獸曉猶眠

長夜俄看日幽臺不掩泉須知摸金者亦到漢陵前
過海昌贈李侯

閒廳晝下簾秋色滿疎髯久戍殘兵老多貧長吏廉
陰風潮動郭晴日地生鹽三老相逢說年來戶牖添
送易從事祖飲南渚

疎楊映老荷別處最秋多送客年年路愁人日日波
霞明添醉色風急斷離歌莫爲官程促青山易看過
題張靜居畫

楚客寫荆岑秋雲隔浦陰人家連橘塢水廟映楓林
亂後清遊歇愁邊遠色深相看休向晚怕有峽猿吟

夜懷王校書

燈暗獨吟餘疎桐月滿除蟲寒初入戶鼠餓欲侵書
河漢三更望江湖兩地居相思無去夢今夜恨何如

荅陳則見寄

何由慰遠思獨詠寄來詩行路方難日清秋欲盡時
江多驚鴈火樹少宿烏枝早晚如相見應憐有鬢絲

煮藥

葉燥井泉清山窗藥在鐺燈前看火候枕上聽潮聲
味熟吟方就香來病已輕何時采芝朮養得羽翰成

夜投西寺

江月上秋衣來敲遠寺扉
栖禽驚客至睡僕訝僧歸
鐘度行廊盡燈留浴院微
非無招旅館禪寂願相依
送石明府之崑山
茂苑行春罷攜琴又向東
潮聲數里外山色半城中
帆帶桃花雨衣翻柳葉風
鳥夷聞善政爲有舶船通
過城西廢塢
亂前遊最熟亂後問都迷
園散栽花戶林荒采菊蹊
廢泉流圃淺斜日下城低
唯有煙中鳥迎人似舊啼
送范架閣赴嘉禾兼簡李使君
陸相祠前路孤舟欲上時
空江難晚別荒郡易秋悲

月送潮生早雲隨鴈去
遲幙中知有子太守只題詩

喜呂山人見過江館

非君憐夙契誰肯顧柴門
日短清江路風高大樹村
交呈新著稿同發舊藏尊
莫便尋歸棹心懷未盡論

贈鄰友

同居一塢中只隔水西東
林近書燈露溪迴酒舫通
放鳧長合隊移竹每分叢
只恐君徵起難期作兩翁
雨中就陳卿飲酒醉歸聞
丁二卧病客樓酌
慰之

我醉聽歌後君愁卧病中
山雲秋郭暗江雨夜樓空

短燭知頻剪清樽恨不同題詩非撒手那得愈頭風

送醫士宋君之江上

詩瓢與藥囊此去即行裝跡隱名猶在交親意未忘
剔芸繙舊帙嘗草識新方春水孤舟起還來問竹房

屏居

飲水依道者心清無衆喧幽花落半樹疎雨過荒園
看山易云夕尋澗偶窮源欲喻靜中趣居然忘我言

立秋日

碧天收夏色節氣變清商暑自今宵伏風從此日涼
金莖初有露玉氣未成霜暝日并淒雨潛催草木黃

效唐人贈邊將

翩翩越騎將負勇出山西射虜誇猿臂封侯賭馬蹄
候烽河外暗伏幟草中低欲雪憑陵恥須禽左谷蠡

送董湖州

五馬貴專城花兼赤綬明政條民乍識賦籍吏初呈
山籠輸茶至溪船摘芰行非將茗雪水誰比使君清

晚次西陵館

匹馬倦嘶風蕭蕭逐轉蓬地經兵亂後歲盡客愁中
晚渡隨潮急寒山舊驛空可憐今夜月相照宿江東

送顧別駕之邊郡

故人雖盡別相去獨君賒
緣路雲千埃臨邊樹一家
渡江船載馬到館燭驚鴉
莫歎孤城廢春來尚有花
送僧恬歸靈隱

遊方應未久桺色變新年
在路逢春雪還山訪冷泉
鐘催投寺錫燈照泊江船
法意休多問無言即是禪
江上寄王校書行

寥落舊歡違江邊獨掩扉
鄰家聞暮笛客舍試春衣
宿鳥歸山亂行人渡水稀
相思比花絮斜日繞城飛

送越將罷鎮

楚客佩吳鴻臨邊最有功
讀書圍僻裏賭酒射堂中

旆出莎城雨笳吹桺浦風
越人相感意應與暮潮東

送王稹赴大都

王郎歌莫哀且酌姑蘇臺
獨客自傷別諸侯誰愛才
關河千里去宮闕五門開
未肯輕齊虜新從下土來

送孫主簿之德清

孫善琴

山水匝秋城君行思已清
道逢迎吏拜田雜戍人耕
地遠知邊信家貧稱縣名
應攜一琴去相和長官鳴

留別李侯

梅發津亭北春隨使節廻
線多遊子服酒滿故人杯
鐘送橫江雨車盤出峽雷
平生感知已臨別更徘徊

寄熹公

禪居紫閣陰欲去問安心野岸隨流曲山門隱樹深
千燈燃雨塔一磬出風林想見跏趺處雲多不可尋

送王才歸錢塘

南歸猶落魄北上已蹉跎草草官亭酒勞勞客路歌
親知今日少山水故鄉多七首空畱在酬恩竟若何

送長洲周丞陞吳縣令

青山隔苑橋改邑去非遙官食新添俸民傳舊布條
稻花迎午放荷葉待秋凋寂寞長洲路空聞五袴謠

冬至夜喜逢徐七

君來同客館把酒夜相看動是經年別能辭盡夕歡
雪明窗促曙陽復座銷寒世路今如此懸知後會難

送史丞之海門史淮東

黃茅連霧雨此地久荒涼日出嵎夷邇江通渤海長
改官非謫宦到邑是還鄉海上遙聞說歸人已裹糧

夜雨

砌冷一蛩急窗虛諸葉稀蕭條風雨夜幽卧掩牀幃
鄰杵聽初歇齋燈看尚微忽憂歲暮事聊食故山薇
師山周君客濠上思歸未得因畫舊隱圖求

余賦詩

幾年畱客舍千里念家山得向圖中見猶勝夢裏還
菊畦經雨廢薜屋帶雲關楚奏無窮意相忘賴此間

微恙江館夜作

寒燈坐江館愁逼歲闌珊苦恨應催老微疴似忌閒
雞前星列屋鴈外月臨灣明日將求藥身猶懶入關

逢李止冰道人

吹簫月滿舟何處昔頻遊后土瓊花觀仙人黃鶴樓
別來應未老道在復何求相見俄還去江城楓葉秋

冬至夜雨感懷

節序關何事徒令百感生升沉當世事存歿故人情

寒壯微陽氣風疎緩漏聲他年說今夜聽雨宿南城

過戴居士宅

江邊戴顓宅地好愜幽尋高樹藏早屋新篁補舊林
鳥成畱客語雲作護花陰不負滄洲約重來論夙心

歸鴉

啞啞噪夕輝爭宿不爭飛未逐冥鴻去長先野鶴歸
荒村流水遠古戍淡煙微借問寒林樹何枝最可依

晚坐南齋寫懷

鴈過南齋暮魂消默坐中賤貧長作客愁病欲成翁
窗灑侵燈雨庭翻走葉風山妻猶解事未遣酒樽空

其二

歲景看垂暮羈踪歎屢遷有身能去俗無術但論天
菊老江城酒牀寒客舍羶愁中還一策兒女滿燈前
廿四日雨中夜坐
不興貧後歎每動醉中吟涉難知承意居閒長道心
鴈聲隨雨到鬢色與年侵獨想平生事蕭然坐夜深
其二
身退惟宜靜謀疎且任真樓空三日雨書亂一牀塵
丘隴多良友江湖獨放臣莫嗟華景暮轉眼是新春
書曹谷才世訓詩後爲其子季常作

綠野高人第清門舊相家篇章存月露翰墨走龍蛇
作戒言惟切詒謀歲已賒過庭雖有訓得與共傳誇

題畫爲僧賦

行負貝多書青山別舊廬亂尋安土避貧借破菴居
吟苦非愁裏禪癯似病餘思歸休看畫來去盡空虛

題華氏瑞檜圖

誰指牛眠處江山地最靈氣鍾孤檜碧祥表五芝青
影動春雲亂香敷曉露零知君家種德曾讀墓前銘

樵

山中朝佩斧遠路入煙蘿伐木驚禽起穿雲畏虎過

石根供倦憩谷口應高歌莫看仙人奕歸來恐爛柯
牧

自誇黃犢健登壠共揮鞭笛弄將斜日蓑披欲斷煙
歸鴉流水外疎樹舊莊前應笑侯門客騎驢走歲年
賦得銅人贈醫士

舊鑄明堂像新圖太史書體成金冶內穴試石砭餘
摩狄年空老求仙事亦虛君懷濟人意爲此竟何如

夏景園廬

門掩一齋空幽懷獨坐中本同趨府客偶似灌園翁
魚闖萍溪雨蟬嘶柳巷風未須論夙志聊復去樊籠

寄題崇明學宮天水面軒

夜氣虛明際齋宮息衆喧詠餘風度瑟坐久月當軒
雲盡無畱意池清有活源心知此時意欲論竟何言

送柔上人得船字

叢林初結夏東去又飄然罷說天台講行參雪竇禪
殘經松下几遠磬月中船不用空悲別師今絕妄緣

中秋琵琶洲宴集得紅字

香霧夕濛濛孤高桂樹東影疎林際月涼近水邊風
重露流盃綠繁星亂燭紅明年江海上高會與誰同

悼女

保養常多闕艱難愧我貧悽悽臨歿語的的在生親
遺佩寒江月殘燈夜室塵中郎他日藁畱付與何人
亂後經婁江舊館

此地昔相依重來事已非新年芳草遍舊里熟人稀
遠燕皆巢樹閒花自落磯遺蹤竟難覓愁步夕陽歸

悼故顧宜人

避亂應千里悲離復幾年塵埃初嫁鏡雨雪未歸船
有子隨行旄無人與葬錢束芻何處弔衰草暮江邊

過劉山人園

欲問幽棲處花蹊逐澗迴夕煙羅幙卷春雨藥房開

野鶴知琴意山蜂給酒材城中少閒客誰解引車來

次韻楊禮曹移疾之作

養疾深扉掩還應謝俗交鳥多風和語葵晚雨緘苞
印向閒廳鎖鐘聞近寺敲相思愁莫遏高樹古城坳

送周履道入郭

離羣方感愴况復與君違花隱歸城旆風吹渡水衣
須知喧寂異莫訝往來稀今夜空齋雨誰憐獨掩扉

雨齋獨坐寫寄友

動與世相妨端居學坐忘雨來池上樹煙起竹間房
屋鳥非晴弄闌花是晚芳尋山期已阻遙望奈蒼蒼

次韻酬西園公

休驚綠樹鼠池響食萍魚月戶雙砧落風亭一簞舒
體便清夏健髮映早秋疎本自無愁事何煩酒破除
聞鄰家琵琶有感

清唱合琵琶當年碧玉家弄殘催酒急抱重向燈斜
久別愁江樹重聽隔院花淚多思舊事不是客天涯

書王生扇

素質粉藤光蒲葵詎可方當懷驚抱月灑面怯沾霜
宜助驅蠅用羞隨走馬狂過時甘自棄不怨井梧黃

送胡鉉遊會稽

山水獨行遍茗溪仍剡溪衣逢新火減舟渡雜花迷
黃絹尋碑讀紅裙賭墅攜清遊不能共腸斷聽猿啼

送陳少府赴嘉定

雨歇桑陰路爭迎紺幃車湖多田水滿城小井煙疎
夜戶猶聞犬春濤欲上魚期君布新政去卜海濱居
報恩寺逢蔣主簿就送還如臯

貧語酒寒頻新年見故人別時煙寺晚歸路雪江春
造次燈前面蒼茫舶上身明朝楚花發莫歎縣廚貧
贈姚東曹

爐氣拂春衣分曹直省闈相門旄節重郎舍簡書稀

夜直聽鐘度晨朝策馬飛共憐王掾少粉署有光輝

鍾山雲霽圖

山勢識龍蟠香臺擁翠巒草堂猿嘯晚蕙帳鶴驚寒
雲擁梁僧塔苔封宋帝壇昔年遊歷處今向画中看

白蓮寺池上

月出露已白荷花香滿池高僧愛清夜畱客坐題詩
竹動鳥驚夢草涼蟲語悲閒齋一瓢酒應不負幽期

高季迪先生大全集卷之十三

五言律詩

送吳縣令遷松陵

山縣彈琴罷江城露冕初夏霖湖更闊朝日市長虛
柳下催耕鼓桑間問俗車秋風莫思去客館有鱸魚

寄沈校理

風雨清明後春寒未袂衣閉門聽鳥盡入寺看花稀
獨酌愁難去相思夢欲飛艱難宜數見何事却長違

贈呂醫

藥院閉閒朝煙生積券燒求真遊嶽遍訪病出城遙
收穀寧煩僕尋苓或遇樵世方多內熱一七儻能消
次韻陳畱公見貽湖上行屯之作
湖陰巡壘罷緩服上仙舟景好看宜晚詩清賦爲秋
葉應隨鳥散山欲趁波流亦有東遊興空憐未得酬
雨後飲西園偶然亭

晚酌櫻桃下歡來不奈春那知醉後客猶是亂中人
雨霽飄還細花寒破未勻江臯舊遊處回首莫沾巾

鄰家桃花

春色東家出相窺似有心曲垣遮自短別院閉還深

影動疑人折香搖妒蝶尋好風時解意吹片拂羅襟

和王校理夜坐

池暝花如霧蒼蒼月照開梁空雙燕睡簾暗一螢來
兵散誰家笛人違此夜杯如何對清景愁思却相催

荅陳校書客懷

同患君尤甚時難覺意真愁邊長夜雨夢裏少年春
遊遠荒家業交疎困露塵一杯歌短調誰聽不沾巾

酬余左司

門巷接垂楊同鄰忘異鄉兒親欣見熟僕立厭言長
讀借風牀簡炊分雨碓梁亂來成久別能不爲情傷

宿道王蘭若

借榻到僧扉雖安未是歸暝禽愁雪意夜篠助風威
燈盡思燃帶衾寒起覆衣不知孤棹去明夕更何依

與詩客七人會飲余司馬園亭

居皆在北郭

情與酒兼和園亭駐晚珂家同榆社近人比竹林多
短景催長宴醒吟雜醉歌亂離歡易失無厭數相過

登西澗小閣

層檻構雲牢清寒灑客袍石稜添澗險閣勢借峰高
風竹驚棲鳥霜藤縋飲猿欲題因境勝不致易揮毫

江上荅徐卿見贈

煙樹近松陵扁舟晚獨乘江黃連渚霧野白滿田冰
往事愁人問虛名畏客稱無才任蕭散敢望鶴書徵

除夕客中與家兄守歲

雨雪遠村中猿鳴旅館空守爐銷夜漏停燭待春風
有恨能催老無文解送窮却憐今夕酒還得弟兄同

南溪晚歸

流水出雲根遙通古寺門山深僧少俗人靜市如村
馬渡知長淺魚行見不渾多情溪上月歸路照黃昏

丁孝廉惠冠巾

知試山人服冠巾遠寄重佳名因子夏舊製學林宗

裏映秋吟鬢歆宜晚醉容朝簪今已解期上華陽峰

西園閒興

看到竹過鄰園林獨卧身鳥聲閒似野人意倦如春
殘雨驚池樹斜陽照隙塵如何堂上客不及燕來頻

其二

當路闕追攀端居自掩關聽鐘知近寺看畫憶登山
曉櫛風林下宵吟雨閣間天應憐我懶獨與少年閒

送謝恭

涼風起江海萬樹盡秋聲搖落豈堪別躊躇空復情
帆過京口渡砧響石頭城爲客歸宜早高堂白髮生

步至東臯

斜日半川明幽人每獨行愁懷逢暮慘詩意入秋清
鳥啄枯楊碎蟲懸落葉輕如何得歸後猶似客中情

郊墅雜賦

江水舍西東鄰家是釣翁路痕深草沒井脉暗潮通
籬隔蔬邊雨門開竹下風不因時賣畚何事入城中

其二

此鄉堪避地亂後戶翻增俗美嫌欺客年豐愛施僧
帶星耕處輒照雪紡時燈且作求田計元龍豈我能

其三

幽事向誰誇孤吟對晚沙浣衣江動月繫艇岸垂花
行蟻如知路歸鳥自識家一尊茅屋底隨意荅春華
其四

春泥桑下路孤策自扶行身賤知農事心閒見物情
魚鳴風欲起牛飯月初生漸喜無人識何煩易姓名
其五

移家到渚濱沙鳥便相親地僻偏容懶村荒却稱貧
犬隨春盃女雞喚曉耕人願得無愁事閒眠老此身
其六

紛紛謝人役寂寂戀吾居細雨春零後斜陽社飲餘

岸花飛趁蝶池葉墮驚魚好了公家事休令吏到廬

其七

路迂橋斷處門靜犢眠時孤墅藏羣柳諸田灌一陂
僮閒春作少婦懶午炊遲誰道花源好還令太守知

其八

虛閣近鳴湍應宜把一竿雨傷春麥爛風折晚蒲乾
抱甕臨江汲攜書入寺看自慚何獨幸世難此偷安

其九

亂渚交交白平蕪漫漫青賣薪沙店遠祈穀水祠靈
密雨侵蓑重微風過網腥江邊多酒伴春去不曾醒

其十

入夜潮侵戶經秋雨壞垣里人淳少訟田父醉多言
稻蟹燈前聚莎蟲機下喧自應耽野趣不是戀鄉園

其十一

欲沽嗟市遠煙火隔江波客到寒齋少人歸晚渡多
汗書燈燼落驚枕櫓聲過豈敢愁荒寂時危免負戈

其十二

野色迴蒼蒼開門葉滿塘僧來雙屐雨漁卧一船霜
靜裏修香傳閒中錄酒方平生當世意到此坐成忘

其十三

紅樹南江近青山北郭遙江清目渺渺林冷髮蕭蕭
食鱸知晨釣聽歌識暮樵尋常送歸客不過水西橋

其十四

何處可徘徊林間共水隈夜歸家犬識春睡野禽催
有地唯栽藥無村不見梅興來慙獨飲時喚老農陪

其十五

狂多愛出遊日日問江頭小草皆春意遙山自晚愁
酒中時有得物外復何求不詠騷人調薜蘿任滿洲

其十六

居似臨邛宅耕非鄠杜田已償輸稅米未覓賣文錢

把卷憐長日看花愧少年
翛然閉門處楊柳枯槁邊
采香逕

晨妝出采芳零露溼紅裳
種徙山中品熏傳海外方
抱筐歸蕙逕焚鼎薦蘭堂
未足娛君寢西施體自香

響屨廊

廊虛應屨鳴響細識腰輕
誰道吳強國唯銷舉足傾
苔間滅古跡月下歇餘聲
此夕人空聽山僧曳履行

臨頓里

聞說橋東地高人舊隱居
養生應有道覓舉絕無書
愛救粘絲蝶嗔驚出水魚
時尋戴顓宅自駕短轅車

其二

應愛山齋好秋風不捲茅
鑿渠侵螿穴移樹帶禽巢
人世真浮梗吾生豈繫匏
不逢皮從事誰結歲寒交

其三

載酒攜山榼安琴製石牀
息眠皆傍母蜂去自從王
穀雨收茶早梅天曬藥忙
不扶靈壽杖筋力老能強

其四

自少圖名意誰言世不知
僧求開寺記客送買山資
細雨魚生子斜陽燕哺兒
平生無事迫心苦為尋詩

其五

斬伐憑樵斧經綸在釣車薄雲還露月小雨不妨花
酒債應多處詩名自一家虛煩時主召懶脫故衣麻
其六
長物元無有何勞犬護扉借看高士傳學製道人衣
窗破容螢入船空載鶴歸定緣幽事繞不是宦情微

其七

澹泊心情在蕭疎髣影殘引泉規作沼畱筭待成竿
自洗沾泥屐誰收掛鉞冠毛公新有約月夜禮天壇

其八

沐罷便輕幘消搖詠晚天清風蘇病鶴驟雨集鳴蟬

舊史堆緗素新經錄洞玄誰知城郭裏別自有林泉

其九

汨汨泉通圃蕭蕭柳映門折花搖樹影踏藕損蓮根
饑鴨呼歸艦新蠶試浴盆屋前高石在知是鬱林孫

其十

茶租催未得菊餌服還能行古時人笑文工造化憎
貧畱漁艇載老謝一書徵誰識先生樂悠然卧枕肱

春申君廟

封吳開巨壤相楚服強鄰名重三公子謀疎一婦人
畫幃畱古像珠履絕遺塵簫鼓時迎祭還憐舊邑民

吳女墳

魚燈照艷魄，夜冷珠衣薄。白玉土中埋，紅蘭霜後落。
不乘臺上鳳，空舞橋邊鶴。韓重未歸來，泉宮秋寂寞。

真孃墓

金釵葬小墳，楊柳寺前村。已斷花間信，空歸月下魂。
山鶯畱曲韻，草露帶啼痕。車馬逢寒食，還來酌酒樽。

鱸鄉亭

獨上鱸鄉亭，秋風南浦生。載送黃花句，遙思張步兵。
天空白水遠，日墮赤楓明。我亦東歸客，一壺宜醉傾。

堯峰院

堯帝何年到，名猶在此峰。巖畱千尺井，寺廢兩時鐘。
僧出因尋菌，人來爲看松。白雲深洞裏，聞有聽經龍。

慧聚寺次張祐韻

煙斂城初出，潮來野欲吞。危樵緣磴角，倦衲憩松根。
剝表藏林寺，鐘聞隔水村。畫龍飛去久，空掩殿堂門。

石屋

雙崖立幽關，一洞開深宇。青嶂近爲鄰，白雲閒作主。
不受杜陵風，可避河朔暑。華棟幾回新，渠渠獨千古。

贈竹里子

弭楫望迷林，閒爲淇澳吟。君家不可見，但聽煙中禽。

日落浦雲遠雨餘江水深非同抱清節歲晏後誰尋
送金判官之吳江

送客常苦愁送君愁最劇為江上縣近我鄉中宅
霜晴橘熟秋水冷楓飄夕難逐去帆東京華坐微役

漁

泛泛滄波裏全家寄一船曾來屈澤畔或到杏壇邊
蓑帶春江雨柳鳴晚浦煙得魚尋水店換酒不論錢

樵

慣識山中路崎嶇每獨尋穿雲衝過虎伐樹起棲禽
斧礪溪邊石衣懸谷口林逢仙休看奕甲子易駸駸

耕

江臯聞布谷荷耜出柴門春暖烏犍快朝晴綠樹繁
深耕行別隴侍饁望前村自得龐公計遺安與子孫

牧

一笛去茫茫平郊綠草長但知牛背穩應笑馬蹄忙
度隴衝朝雨歸村帶夕陽相逢休挾策回首恐忘羊

夜起觀月

一春夜多雨今宵初月明窗間幽夢覺起憶故園行
露下花微委煙中鳥忽鳴誰同賞清景惆悵倚前楹

贈劉醫師

君有抱朴意高齋長晏如壺中仙姥酒案上神農書
蒸木曉煙裏斲苓春雨餘起疾多傳妙慚予才自疎
舟中早行

隆隆津鼓動江火畱餘閃人家未起耕近水寒扉掩
船開鳧鴨散樹吐煙霏斂東郭去方遙青山見孤點

春日懷諸親舊

楊柳燕差差鄰家換火時春寒添客思夜雨減花枝
涉世悠悠夢懷人的的思出遊無舊侶空館獨題詩

江上見逃民家

清時無虐政何事竟拋家鄰叟收饑犬途人折好花

林空煙不起門掩日將斜四海今安在歸來早種麻

晚晴東臯步眺

江明片雨收樹暗一村幽籬落疎麻長田畦曲水流
禽聲初變夏麥氣欲成秋閒步看時物今朝散旅憂

賦得戟門送陳博士

聖廟儼王宮重關盛衛同儒冠趨內外武仗列西東
乍啓鳴鐘始將扃徹俎終莫言牆九仞還有此能通

櫻桃

密綠暎圓紅枝頭的的同熟迎梅實雨落值柳花風
美女名偏稱流鶯啄未空憶曾春薦後捧賜出深宮

金進士葵軒

幽園夏雨歇葵綠乍翻風獨向羣芳後閒依萱草叢
數榮午簟側流馥夜窗中應有傾陽意將軍心正同

次倪雲林韻

雲林已白頭猶有晉風流愛寫滄州趣閒來玄館遊
茶煙秋淡淡竹雨暮修修欲向南池水長流清翰舟
登南樓看雨有懷

清曉看江雨獨登江上樓人煙與草樹蕭瑟滿城秋
砧響寒稍急鴻聲哀更流故人隔楚塞西望忽成愁
晚霞獨酌南樓

倦客豈遷客故鄉非異鄉鱸肥蓴菜紫鴈到柳條黃
湖濶已秋雨樓高猶夕陽登臨何必賦把酒據胡牀

耕

春郊起東作耒耜出柴荆柳下烏犍健桑間布谷鳴
家人供遠餉刺史勸深耕已卜豐年候朝來好雨晴
追挽恭孝先生二首

閩洛遺風在河汾舊業傳書攻藏簡後易究出圖先
曉禁辭持橐寒廳戀坐氈臨危誰復似身與勅俱全
其二

北闕書空上東川教自陳可當衰亂日復喪老成人

堂靜懸魚絕墳荒下馬頻傳家欣有子執筆際昌辰

漁

浮生何處好只在水雲鄉柳起鳴秋月綸收向夕陽
箬篷幽夢熟銅斗醉歌長不是煙波樂那能與世忘

題宋迪晚煙歸舍圖

落日下嵐嶺行人逢已稀隔煙望田舍映水掩荆扉
鳥亂夕林暗草多秋逕微家人應候我賣畚郭中歸
贈東菴道者

雙樹夾成戶一溪流繞家掃林畱遊筍汲水帶浮花
經勸里人讀藥從仙客賒已無喧寂念默坐對鳴鴉

五言排律

月夜遊太湖

欲尋林屋隱還過洞庭遊遠水初涵夜長天盡作秋
湖如青草闊月似白蓮浮萬壑風傳笛三更斗挂舟
葉應隨鳥散山欲趁波流浩蕩吾何適鷗夷不可求
詠夏冰

寒收凝凍井晚薦納涼宮抱潔存天質銷炎奪化工
氣蒸金盃潤色映玉盤空弱藻含猶在纖塵隔未通
非山寧可倚是水復當融照夜何須月驚秋詎待風
製屏應不穩作珮定難攻客貌清誰竝仙肌瑩自同

宜涵筠簟素愁逼桂爐紅願解行人渴分貽道路中

題黃鶴山人畫

何處畫相同湘南與峽東江來落日外山出杪秋中
綠桂騷人宅青蓮釋子宮鐘鳴樵谷暗船散市橋空
風樹驚猿落煙蕪去鳥通平生遊楚興對此轉無窮
賦得履送衍上人

穩稱遊方脚新編楚岸蒲滑欺峰頂石危怯世間途
輕曳愁妨蟻高飛笑化鳧上堂聲每衆度嶺影還孤
著處朝行道拋時夜結趺空山欲相訪落葉去踪無

聞蛙

何處多啼蛤荒園暑潦天股跳泥活活形蔽草芊芊
野遠呼相應窪深樂自專斜陽魚罩外細雨客燈前
莫問官私地聊占水旱年晴思蒲葉渚涼憶稻花田
高士聽空愛遷人食未便灑灰誰解去安我夜窗眠

聖壽節早朝

天啓聖圖昌流虹叶夢祥飛龍起江左戰馬放山陽
御柳垂閭闔仙桃熟建章遠人陳貢篚近侍浥爐香
金鏡千秋錄瑤池萬歲觴小臣歌拜手堯日正舒長

洪武二年十月廿露降後庭柏樹上出示侍
從臣啓獲預觀嘉瑞因賦詩頌之

和氣融爲液中宵墜碧天光溥高柏上瑞發內庭前
見日朝還法經風晚盡堅芳穠蜂蜜滑的皜蚌珠圓
厚澤歌難喻沉疴飲易痊願言同聖德濡沃遍周埏
冬至車駕南郊
駕動百靈訶齋宮午夜過禮行因日至樂奏合雲和
配祖崇周典祈年陋漢歌璧陳孤月滿燎發衆星羅
秩秩威儀盛穰穰福祉多慶成應預喜四海沐恩波
禁中雪

君王元尚儉臺殿忽瓊瑤環素凝宮沼飛花綴苑條
坊雞驚曙早仗馬喜寒驕金扇開時看丹墀掃後朝

台司呈賀表樂部奏仙謠須信陽光近都先別處消

封建親王賜百官宴

漢運初興日周藩竝建年辨方分社土當陞列宮縣
上相傳金冊中官闢綺筵誓期山作礪恩瀉酒如川
仙季千枝茂天潢幾派連百僚咸醉喜拜舞赤墀前

送安南使者杜舜卿還國應制

安南初入貢朝廷遣翰林學士張以寧齋詔

冊其主爲王及境而薨其世子遣舜卿來告

哀且請命及還命朝臣賦詩送之

南粵知文化來庭喜最先地書通漢日貢紀入周年

號冊纔臨境容衣忽掩泉使蒙天語言嗣許國封傳
曉闕晴飛鳳炎溪晚墮鳶往來時物異存歿聖恩全
詔去開蠻霧帆歸望海天但修忠順節世業自綿延

送高麗賀正旦使張子溫還國

丹鳳雲中闕玄菟海外城新陽初獻歲遠使盡朝京
卉服充王貢珠旒仰聖明花飛辭上國日出指歸程
車餞都亭曉帆開島嶼晴莫辭頻入賀寶曆萬年盈

送鮑修撰出官關中

辭朝西入陝車發動征塵小麥行時熟啼鶯別處頻
關前周故尹灞上漢遺民直院青綾舊臨川赤組新

山連樂遊苑樹繞富平津君去方年少還能論過秦

送恩公還江心寺

上人居寶地勝處似金山樓閣開天界波濤隔世寰
鐘聞孤嶼外刹出亂雲間螺女晨修饌龍君夜叩關
遊方來暫會辭闕去難攀舊業菱生沼離城柳映灣
衣霑爐氣出船載磬聲還施具來江估持經化鳥蠻
諸緣除未早半偈悟猶艱安得如康樂登臨此共閒

喜楊榮陽赴召至京過宿寓館

忽作天涯會渾銷歲暮哀高城三鼓動虛館一尊開
鄰馬嘶空櫪江鴻過廢臺飲餘寒色退談絕雨聲來

涉患功名倦忘歸故舊猜闕前新應召須讓子雲才

戲嬰圖

芍藥風欄側梧桐露井傍嬌嬰爭晚戲少婦鬪春妝
共詫珠生蚌還憐玉產岡半披文錦祿斜佩紫羅囊
額髮葳蕤短胸胞細膩光庭前王氏子陌上衛家郎
弱草身眠軟芳英手弄香隨人貪作劇避伴學迷藏
莫撲花蝴蝶宜爲蠟鳳凰塗添雲母粉浴試水沉湯
麟送徐卿宅蘭生謝傳堂愛均看總好年竝比誰長
驥種雖難匹鷓雛已作行欣君得此画真是夢熊祥

翫花池

桃枝兼杏枝春色繞宮池正愛紅繁處還憐綠淨時
花香泛幽汜媚影照清漪垂條看妓折墮萼見魚吹
盃涵明月瀉舟逐彩霞移水流花落盡君王醉不知

送高麗貢使還國

鳳闕層霄上菟城積水東大君方啓運絕域盡朝宗
錫命分青土趨班列紫宮船歸瞻日出帆掛候西風
雨露何沾渥華夷已混同聖心非悅真惟念遠人忠

韓蘄王墓

宋室中興日將軍武略優功宜超賈鄧名恥竝張劉
白馬空南渡黃龍竟北游誓擒諸部種還報兩宮仇

朝使頒金冊邊人識錦裘躍戈衝野陣橫棹截江流
殘虜亡魂走中原指掌收未終藩閫寄已惑廟堂謀
坐散熊羆士甘臣犬豕首和戎詞易屈復漢志難酬
闕聳吳山曉陵荒鞏樹秋廉頗歸未老郭令罷誰留
折檻言徒切藏弓勢可憂俄看星隕壘永使陸沉州
感慨思前代淒涼弔古丘劔花埋虎氣碑蘚剝螭頭
石騎嘶風雨山僧護檟楸鼓旗何寂寂簡冊謾悠悠
父老悲猶在英雄事已休棲霞嶺前墓聞說更堪愁

石井泉

清源生石脉冷逼煮茶亭淨映銀牀色明開玉鑑形

分秋歸客鼎汲月貯僧瓶樹影沉泓碧苔文漬癖清
熱中嘗可滌醉後漱堪醒品第宜居首誰修舊水經

焚香

艾蒹山中品都夷海外芬龍洲傳舊採燕室試初焚
奩印灰縈字爐呈玉鏤文乍飄猶掩冉將斷更氤氳
薄散春江霧輕飛曉峽雲銷遲憑宿火度遠託微薰
著物元無跡游空忽有紋天絲垂裊裊池浪動沄沄
異馥來干和祥霏却衆葦嵐光風卷碎花氣日蒸醺
燈炮宵同歇茶煙午共紛褰帷嫌放早引七記添勤
梧影吟成見鳩聲夢覺聞方傳媚寢法靈著辟邪勳

小閣清秋雨低簾薄晚曛情慙韓椽染恩記魏王分
宴客畱鵷侶招仙降鶴羣曾攜朝罷袖尚浥舞時裙
囊稱縫羅佩篝宜覆錦熏畫堂空搗桂素屏漫塗芸
本欲參童子何須學令君忘言深坐處端此謝塵氛

詠夢

的的緣愁得濛濛與醉和輕隨雲浩蕩暗越嶺嗟峨
夜店嗟偏短春閨想最多關山歸識路江渚去涉波
梁落中宵月樓橫欲曙河隔簾休警鵲近燭任飛蛾
遊遠寧煩載穿深豈畏訶寒驚瑤作障暖戀錦成窩
蝴蝶誰家信鴛鴦別浦歌靜嫌風動竹鬧怯雨鳴荷

寂歷窗扁紙低遲帳捲羅知情唯枕共送恨忽鐘過
縞袂香猶在朱絃字不磨記來還彷彿尋去已蹉跎
宿燼芬餘麝殘妝暈淺螺憂歡情總幻離合事皆訛
池上吟芳草庭前覓舊柯既因思是種復念睡為魔
易斷俄如此難憑竟若何陽臺莫重問千古笑巫娥

荅胡博士畱別二十韻

世緒名臣後聲華俊士前棘場曾中的芹水舊鳴絃
遠道秋風褐空齋夜雨瓊倦遊驚齒暮多難喜身全
孤客愁王粲諸生老鄭玄未應心戚戚還是腹便便
杜曲無歸業成都有卜錢我方辭闕下君尚隱江邊

久話燈催剪頻過榻解懸擇鄰欣得地結友愧忘年
牧逕依門轉漁梁近渡連舊盟尋白鳥餘俸買烏捷
流水空塘樹疎林破屋煙詎憂窮作崇但欲醉成仙
政爾交歡密俄然別恨牽湖山入苑路雞犬載家船
離索方堪歎分攜益可憐殊鄉難託主薄俗易輕賢
寒浦通潮處春城罷雪天梅花未宜折持送只詩篇

高季迪先生大全集卷之十四

聯句

舞劍聯句

與會稽張憲夜飲觀銅臺季壯士舞劍而作

晚陌息鳴鑣憲秋城起嚴柝登堂欣有會啓顧座歎

無樂豪賓奉觴壽憲壯士掉箏作韻生飈拂鐔啓文

綴星輝鏗拭土色纔動憲暎火光轉爍寒瀉走澗泉

啓明懸潘簷澤徒誇刁瑩膏憲漫詫七淬藥腥疑人

血乾啓威攝鬼踪鑠雄聞莊子說憲醉想王郎斫聯

翻條鴻騫啓奮迅仍雀躍來如龍出淵憲去若蛇赴

壑疾驚雷破山啓怒訝風捲漠初馳帆縱張憲忽注

弩弛曠陰陽變開闔啓潮汐隨進却高步赴節同憲

奇形分狀各斜廻象翼蔽啓曲踊肯拏攫歛驚西方

帝憲凜怖東海若屋翻影紛綸啓地殷勢揮霍亂思

突騎奔憲低見饑隼掠旁分萬矢斷啓前拉千槍拓

出堪劫齊壇憲立可當蜀閣澤聞蛇嫗啼啓路遇猿

翁搏斬關豁然判憲擊柱鏗爾著陸疑濤涌牀啓宵

駭虹闖幕警棲已翻翻憲墜搞俄索索顛旭曾悟書

啓俠軻記爭博目花匪酒酒憲膚粟似裘薄忠義氣

盡張啓奸邪膽俱落不從玉玦計憲欲定銅臺約未

數大娘強啓終勝處女弱季路袖手欽憲斐旻汗顏

乍疾視誰敢當啓不成我慙學勇夫怒生癭憲恐僕

戰戎瘡功收刺虎奇啓志感聞雞惡暫停月徘徊憲

既罷天寂寞崆峒詎必倚啓氛稜行可廓馘妖正思

今憲斷佞猶慕昨會合固有期啓死生良欲託寧憂

武庫災憲但俟凶門鑿慷慨勿悲歌啓淋漓且酣酌

憲

劍池聯句

與張憲金起王隅同賦

飛梁上當空憲直聳下插水兩樹交古陰啓孤亭倒

清泚初至意已愜憲再陟神亦靡氣銷淵龍藏起骨

朽山鬼死蒼崖出仙詩隅金藏閔僧史伯圖渺何在

憲世事倏如此佳遊信難遭啓壯志良未已凭欄瞰

神州起樹羽訝軍壘未覩煙塵清隅且耽林壑美臨

風揮一觥憲憩石脫雙履鸚啄朱果殘啓蜂抱黃英

委琴咽斜陽蟬憲棋戰欲雨蟻溽暑避松篁啓輕涼

透藤椅瞑目思黑甜憲潛心翫玄旨籟響破虛寂啓

香飄聞旖旎飯鐘隔煙來憲樵笛呼月起整轡戒僕

夫啓揖鞭謝釋子尾聲吠喧呵起騎影歸地運餘戀

尚眷然隅重來那復爾明發抗塵容何由繼芳趾

病柏聯句

與青城杜寅郟郡徐賁遊白蓮寺見病柏而

作

抱質雖輪菌託根何坎壈寅死色見已深生意存猶

頗啓老栢焦半身餘葉禿偏髻賁恩謝漢陵春災非

陸渾火寅柯傾痺待扶節漏瘡思裏啓下窾封虬蟬

上穴綴螺羸賁風欺聲告哀雨冒汗憎顛寅蟄空虺

喜容攀脆猿愁墮啓將斲豈中梁欲割詎宜舸賁蓋

瘁缺青蔥梢枯辭倚儼寅乏子供爐焚無陰庇牀坐

啓 蠹盡啄鳥飢巢傾躓雛跛賁臞形慘若疋突腹腫
如果寅藤纏偶假妝薜剝每慙裸啓主惜覲匠顧樵
窺避僧邏賁土瘠力易衰巖危勢難安寅殺懼苦霜
仍醫期甘露可啓成器未爲福不材反逃禍賁依林
尚支撐亞石猶磊砢寅閱歲失貞姿承陽愧纖朶啓
掠辜孔語稱名負杜吟播賁敢要秦樹封孰效禹梅
鎖寅蟠深漫欲踞架重寧堪荷啓氣同生固均數異
測誠巨賁膏乾燃不明屑墜掃還夥寅客憐弔賦悲
童棄培功惰啓終護竟煩誰今看幸遭我賁

尚卷熱風雨聯句

與會稽張憲在報恩佛寺遇風雨而作

旨風簸天興憲凍雨翻海瀉魚鰕落半空啓蛟龍鬪
中野勢吞九河黃憲功潤千里赭怒疑決沙囊啓振
訝摧屋瓦橫行天兵駛憲大笑電母哆乾坤發生多
啓 道路暍死寡潦漲濤涌川憲早去煙滅冶谷號竟
誰噓啓木撼不自把神靈真恍惚憲造化非苟且初
占月離畢啓又駭泗沒社必變其聖乎憲弗迷唯舜
也陰岑氣如炊啓高葉聲若打陽烏韜不見憲乾鵲
噤皆啞重翳晦復明啓餘點歇還灑雖悅灌園人憲
應愁渡江者侍王笑楚賦啓及我慙周雅避思泰山

顛憲戰憶昆陽下雄夫七易失啓各士蓋難假既霑
想大田憲廣庇思巨厦桔槔向晚停啓純扇未秋捨
亂號官私蛙憲莫辨來去馬卧驚浪喧耳啓歸恐泥
沒踝勿憂卷茅屋憲且喜憩蘭若民期歲有登啓國
荷天錫蝦沛澤宜載歌憲新篇試姑寫啓

虎丘聯句

與潯陽張羽太原王行剡郡徐賁遊虎阜用
騁間顏魯公韻作

山遊期屢阻風雨過今春羽偶遂林泉賞仍同里開
親行樹重迷卓午花盡謝芳辰啓事往非前代僧逢

是故人賁金精銷虎氣寶藏衛龍神羽妖魄憐埋玉
仙詩看勒珉行年登廚有供村遠寺無鄰啓池古寒
泉定林暄夏果新賁井名猶記羽樓姓尚題陳羽步
策方循澗廻橈已待津行緣雖喧寂異妄本去來均
啓摩躡追高韻應慙繼後塵

蓮房聯句

與金華宋璪張孟兼作

露冷鏡湖秋璪波涼練塘曉盤翻綠雲稠兼錦破朱
霞少新苞顆微綻啓餘葩莖尚嫋瘦繭綴寒蠶璪尖
喙啄青鳥下惟玉龍眠兼中有瓊絲裊擎重柄欲折

啓含深晴尚官璵孤懸類覆杯兼雙立疑擢表啓初
成欣雨滋兼漸老怯風掉啓多子同根榮啓獨婦專
房悄璵妝卸失娉婷啓歌來逢窈窕璵剖心效諫忠
兼竝頭呈瑞兆啓裏蹄密竅剌璵魚目微光皎啓珠
珥落槃多啓瑤軫貯囊小璵空實外莫辨甘苦中自
了剝殘星滿地采盡香餘沼啓雕筵飮戢戢玉蟲攢
擾擾送看出小艇薦喜對清醪兼新嘗勝江芡遠覓
迷水蓼褰芳想夏初啓感物傷秋杪聊茲發吳詠啓
一覽煙水渺璵

六言律詩

夫差女瓊姬墓

夢別芙蓉殿頭墮釵零落誰收土昏清鏡忘曉月冷
珠襦恨秋麋鹿昔來廢苑牛羊今上荒丘香魂若怨
亡國莫與西施共遊

江村樂

荷浦張弓射鴨柳塘持燭叉魚天隨子宅同里陶朱
公祠近居

其二

一犬行隨餉榼羣蛾飛繞縹車江邊女去摘芡城裏
人來賣茶

其三

層掛漁郎舍外船
維酒媪橋邊煙
波五湖朝渡風雨
孤村晝眠

其四

日斜深塢牛卧潮
落平沙蟹行秋
社未開綠醞夜炊
初碓紅秔

甫里即事

長橋短橋楊柳前
浦後浦荷花人
看旗出酒市鷗送
船歸釣家風波欲
起不起煙日將斜
未斜絕勝茗中
剡曲金齏玉鱠堪
誇

讀道旁舊冢碣上題曰宋黃澹翁先生之墓

古路斜陽廢城斷
碑荒草殘塋莫
嗔童豎樵牧不識
先生姓名

楊氏山莊

斜陽流水幾里啼
鳥空林一家客去
詩題柿葉僧來
供煮藤花

陶秘書廣陵送別圖

暮雨潮生瓜步春
山樹繞蕪城惆悵
離舟欲發江南
煙寺鐘聲

七言律詩

大駕親祀方丘選射齋宮奉次御製韻

奠璧方壇曉祝釐豹竿風動從靈祇獻符多士歌昌
運扈蹕諸蕃覩盛儀郊射貫侯初復古汾祠獲鼎未
云奇山川效靜年多穀神荅皇心定有期

奉迎車駕享大廟還宮

鳴蹕聲中曉仗迴錦裝駟象踏紅埃半空雲影看旗
動滿道天香識駕來漢酎祭餘清廟閉舜衣垂處紫
宮開禮成海內人皆慶獻頌應慚自乏才

晚登南岡望都邑宮闕

落日登高望帝畿龍蟠山下見龍飛雲霄雙闕開黃

道煙樹三宮接翠微沙苑馬閒秋獵罷天街車鬪晚
朝歸明朝欲獻昇平頌還逐仙班入瑣闈

其二

秦金不厭氣佳哉紫蓋黃旗此日開殘雪已銷鳩鵲
觀浮雲不隱鳳凰臺山如洛下層層出江自巴中渺
渺來六代衣冠總成土幸逢昌運莫興哀

奉天殿進元史

詔預編摩辱主知布衣亦得拜龍墀書成一代存殷
鑒朝列千官備漢儀漏盡秋城催仗早燭光曉殿卷
簾遲時清機務應多暇閣下從容幸一披

九日陪諸閣老食賜糕次謝授經韻

叨陪講席按詞曹曉禁霜花點素袍院貯圖書西掖
靜雲連宮殿北山高故園莫憶黃花酒內府初嘗赤
棗糕最愛鳳毛今復見便令池上一揮毫

送沈左司從汪參政分省陝西汪由御史中

丞出

重臣分陝去臺端賓從威儀盡漢官四塞河山歸版
籍百年父老見衣冠函關月落聽雞度華岳雲開立
馬看知爾西行定回首如今江左是長安

吳僧日章講師赴召修蔣山普度佛事既罷

東歸送別

萬人擁座聽潮音寶刹曾迂玉駕臨佛法曉敷三藏
秘帝恩春及九原深鐘山坐處花頻雨練浦歸時樹
欲陰擬問楞伽嗟已別楚江飛錫暮沉沉

其二

故鄉未解識清容却在金陵闕下逢中禁曾分齋鉢
飯上方時叩講筵鐘一帆細雨迢迢浦半塔斜陽靄
靄峰相送師歸忽多感飛雲亦戀舊依松

清明呈館中諸公

新煙着柳禁垣斜杏酪分香俗共誇白下有山皆繞

郭清明無客不思家下侯墓上迷芳草盧女門前暎
落花喜得故人同待詔擬沽春酒醉京華

金陵喜逢董卿併送還武昌

兵後匆匆記別離兩年音問不相知武昌樓下初來
日幙府門前忽見時上國花開同醉少大江潮落獨
歸遲莫嗟握手還分手此會從前豈有期

送易左司分省廣西

朝廷特念遠岷深畫省分官出桂林油幕乍開依漢
節卉衣時到貢蠻金四時花發山多暖半日嵐開市
尚陰虞帝祠前黃竹裏相思莫聽鷓鴣吟

送王檢校錡赴北平

半年同舍客京華看遍龍河寺裏花纔進史書朝日
下便紆官綬去天涯平蕪遠塞秋驅騎衰柳遺宮晚
噪鴉莫道窮邊成久別待君歸草玉堂麻

京師秋興次謝太史韻

柳外秋風起御河京華客子意如何伎同北郭知應
濫俸比東方愧已多梁寺鐘來殘月落漢宮砧斷早
鴻過不材幸得同趨闕幾度珊瑚候曉珂

送祠江瀆使者

源發岷峨萬里通甬香迢遞問齋宮神馳白馬靈光

近祝奉玄牲禮秩宗驛下換船潮湧日廟前沉璧水
迴風重煩使者徼多福南國無疵黍稷豐

送葉判官赴高唐時使安南還

銅柱崖前使節過貢隨歸騎入京多一官暫遣陪成
璿片語曾煩下趙陀曉拜賜衣辭絳闕秋催征棹渡
黃河政餘好賦登臨詠聞說州人最善歌

行師見訪鍾山里第

風雨孤舟寄一僧遠煩相覓到金陵青山愧逐塵中
馬白拂看麾座上蠅事去南朝猶有恨夢歸北郭已
無憑文章何用虛叨祿只合從師問上乘

寄題安慶城樓

層構初成百戰終憑高應喜楚氛空山隨粉堞連雲
起江引清淮與海通遠客帆檣秋水外殘兵鼓角夕
陽中時清莫問英雄事回首長煙滅去鴻

送鄭都司赴大將軍行營

上公承詔出蓬萊立馬風煙萬里開賜履已分無棣
遠舞戈還見有苗來牙前部曲多收績幙下賓僚更
倚才後夜軍門知子到郎星應是近三台

送朱謝二博士進賀冬至表赴京師聽宣諭

畢還吳

驛騎雙馳捧祿章都門逢舊喜洋洋小儒方幸瞻天
近遠使初來賀日長仗下丹墀晴雪盡朝回紫陌曉
塵香承宣歸去難畱駐乞報平安到故鄉

送丕上人還四明育王寺

解夏還尋舊寺棲滿船黃葉過長溪袈裟影入秋山
遠舍利光懸夜塔低鶯識講時常繞聽猿知定後不
驚啼却慚擾擾城中客覺路如今去尚迷

送吳生赴汴省其父指揮

都亭槐雨淨朝埃彩服逢秋試剪裁定遠未歸雙節
在孝廉初去一船開城依梁苑煙中閉河繞隋堤樹

裏來家慶拜餘尋舊跡夕陽騎馬過繁臺

客舍夜坐

樓角聲殘鎖禁城燈花半落夜寒生啼鴉井上驚風
散殘雪窗前助月明清世莫嗟人寂寞中年漸怯歲
崢嶸酒杯詩卷吾家物客裏相親倍有情

送鄭山人聽宣諭後歸東陽

閣門傳詔山人拜清曉蓬萊望彩霞布褐朝天纔赴
闕蒲帆帶雨又還家沈侯詠罷樓沉月婺女妝殘廟
掩花無限朝廷仁恤意殷勤歸向老農誇

春來

客愁擬向春來減春到愁翻倍舊時走馬已無年少
樂聽鶯空有故園思日光晶晶濃熏草風力颺颺緩
墮絲辟歷溝南酒家路共誰來往問花枝
送賈文學以郡薦赴禮部試畢歸吳天
匹馬都門候曉開吳公新薦賈生來郡中方待傳經
業闕下先稱射策才寒食杏花江店雨春衣柳絮驛
程埃慚予東掖叨陪講難把長干送別杯
休沐欣逢一日閒擬邀禪客共登山兩筇未許尋蘿
逕孤枕應須掩竹關歷歷遠峰塵土外蕭蕭深屋草

萊間安眠却勝清遊樂覺看斜陽燕子還

送內兄周誼還江上

憶奉綸音趣赴朝曾煩遠送過楓橋雲山方恨成睽
阻雪夜俄來伴寂寥吳苑疎鐘沉晚樹楚江歸榜逐
寒潮情親海內如君少敢惜離魂爲一銷
夜聞吳女誦經
雲窗月帳散花多閒讀金經夜若何嬌舌乍彈鶯學
語芳心已定井銷波尼師曾教青蓮偈女伴徒爲白
苧歌聽處若迷空色相應須愁殺病維摩

送趙使君致仕歸別業

久仕江湖白髮長今年得許乞身章吏收封印朝辭
郡人賀懸車晚在鄉家篋已添新著稿官衫未歇舊
熏香南風別墅初歸處應坐肩輿看種秧
雲窗月遊南峰寺有支遁放鶴亭
每向人間望碧峰石門今得問幽踪路緣風磴泠泠
策寺隔煙蘿杳杳鐘窗下鳥來多墜果亭前鶴去只
高松一龕願借依香火莫道詩人非戴顓
計本倫送鄰僧淡雲歸笠澤
往來海上獨離羣雅稱身名是淡雲經院葉深秋講
散香臺鳥下午齋分坐間山偈曾同說別後鄰鐘不

共聞笠澤到時尋舊業菱池漠漠雨紛紛

次韻楊署令雨中卧疾

雙桐分蔭曉池清乍喜新晴覺病輕蛛曳林風吹欲
斷鷺經沙雨洗偏明吟多稍怯臨窗寫卧久渾忘出
市行不道春歸踰一月起聞歌鳥尚疑鶯

送呂秀才入道

學禮茅君便入山黃冠初著稱清顏杏園不羨龍頭
貴蓬島應思鶴背閒窗下棄檠辭婦去壇前受籙拜
師還白雲知勝青雲好揮手從今謝世間

送胡簿之陽朔

幾年挂管去人稀白髮憐君獨遠違過海定尋廻估
舶出京纔脫舊儒衣祠羞荔子傳巫語縣閉榕陰放
吏歸亦欲移居嗟未得謾看鴻鵠向南飛

謁甫里祠

衣冠寂寞半塵絲想見江湖獨卧時道跡虛煩明主
詔感懷猶賦散人詩釣魚船去雲迷浦鬪鴨闌空草
滿池芳藻一杯誰爲奠鼓聲只到水神祠

送恩禪師弟子勤歸開元寺

寺有二石佛自海上浮至

山衲經寒補雜繒白雲高寺遍尋登法身已見浮來
佛宗旨曾傳化去僧歸過江城誰施飯定依舊院自

懸燈明朝應恨千峰阻欲問楞伽已不能

送何記室遊湖州

暮雨關城獨去遲少年心事劔相知故人當路輕貧
賤倦客逢秋惡別離疎柳一旗江上酒亂山孤棹道
中詩水嬉散後湖亭廢此去煩君弔牧之

江上寄丁校理昆季

望裏煙生是子家草堂應近鵲鷓沙江汀每恨無舟
渡野墅空憐有酒賒半雨暮成風外雪孤梅春動臘
中花相思尚隔前村遠獨倚柴門數去鴉

送顧軍咨歸梁溪

新柳休攀短短條，離愁似雪未能銷。春迴廢苑還芳草，人渡空江正落潮。德曜宅前今獨去，平津門下舊相招。重來莫在花開後，擬聽狂歌醉幾朝。

白蓮寺次韻杜進士喜余見過話舊之作

不辭鳴棹遠相尋，欲向江齋伴旅吟。百事未成年已長，幾時纔別夏將深。萱雷倦蝶連池綠，樹帶殘鶯滿寺陰。恐被老僧嫌滯礙，舊遊休說更傷心。

期徐七遊雲巖

憶與青山別幾時，雲僧應恨鶴歸遲。少知學道貧非病，閒愛談禪偈是詩。女浣曉江煙淼淼，人行暮苑麥

離離。明朝風雨還同往，恐負高僧石上期。

賦得寒山寺送別

楓橋西望碧山微，寺對寒江獨掩扉。船裏鐘催行客起，塔中燈照遠僧歸。漁村寂寂孤煙近，官路蕭蕭衆葉稀。須記姑蘇城外泊，烏啼時節送君違。

聞朱將軍戰歿

江浦戈船赤幟稀，孤軍落日陷重圍。鏡中蛇墮占應驗，牙上梟鳴事已非。殘卒自隨新將去，老親空見舊奴歸。聞雞此夜誰同舞，西望秋雲淚灑衣。

送何明府之秦郵

何淮東人已三為縣令

馬前風葉助離聲楚驛都荒不計程一令尚淹三縣
事幾家曾見十年兵夕陽遠樹煙生戍秋雨殘荷水
繞城父老不須重歎息君來應有故鄉情

過野寺次韻徐廉使琰舊題

使節城東按部廻曾將從吏到香臺秋林數騎蕭蕭
去晚澤孤鴻噉噉來蘿雨溼衣溪路轉柏風吹燭殿
門開當年物色雖畱與題辭慚無子美才

送榮陽公行邊

風卷雙旌雪覆鞞遠騎白馬出行邊兵馳空僻三千
幟客宴高堂十萬錢屏裏舊圖魚腹陣燈前新著豹

韜篇功成他日論諸將只有荀郎最少年

登涵空閣

滾滾波濤漠漠天曲欄高棟此山顛置身直在浮雲
上縱目長過去鳥前數杵秋聲荒苑樹一帆暝色太
湖船老僧不識興亡恨只向遊人說往年

婁江寓舍喜王七隅見過却送還郭

送君只過孝廉橋不似君來訪我遙路未同歸鴻杳
杳門方孤掩竹蕭蕭遠愁忽與鐘聲至殘醉微兼燭
燼銷莫道扁舟難重過寒江日日有廻潮

送葉卿還隴西公幙兼簡周軍咨

落日關城動鼓笳遠遊憐汝尚無涯壯身謾託三公
府歸夢難尋萬里家投驛暮山燈照葉待潮秋渡棹
粘沙軍中記室如相問只說愁吟對菊花

范文正公祠

開閣陳書對御筵共言天子得時賢才陪上相趨廷
內遽撫豪羌出塞邊松柏自依先隴廟稻禾猶滿義
庄田古來直道難終合何必深歎慶曆年

丁令威宅

令威作仙上天去舊宅畱在青山阿千年宅廢但遺
井何處更聞華表歌南陌黃塵足去客東流碧海絕

迴波鶴歸重覽應惆悵地上丘墳今又多

辭戶部後東還始出都門有作

詔貳民曹出禁林陳辭因得解朝簪臣材自信元難
稱聖澤誰言尚未深遠水江花秋艇去長河宮樹曉
鐘沉還鄉何事行猶緩爲有區區戀闕心

寄余左司

何處吹愁角一聲大江東岸呂蒙營天隨流水茫茫
去月共長庚耿耿明虜意有圖秋暫息客魂無定夜
還驚欲陪醺酒樓船座借問風潮早晚平

聞家兄謫壽州

別來未省去何投書到方知謫壽州覽俗自堪傷遠
客聽音誰解釋羈憂長淮波浪應愁渡故國江山只
夢遊未有萬回飛往術魂銷空望楚雲秋

吳城感舊

城苑秋風蔓草深豪華都向北銷沉趙陀空有稱尊
計劉表初無弭亂心半夜危樓俄縱火十年高塢漫
藏經廢興一夢誰能問回首青山落日陰

喜幼文北歸

風塵萬里損光輝舊面相逢却訝非在路定畱經處
詠還家猶著去時衣久畱遠土蟲蛇雜忽解高羅鴈

鵠飛尚念梁園三二客與君同去不同歸

送宋君南康葬親

長揮客淚楚雲東故國江山一戰中遺柩十年嗟未
掩歸舟千里喜纔通遠途敢避風濤惡舊隴應知草
樹空料得南岡廬宿處夜深猿鳥泣西風

送王孝廉遊京回錢塘

客遊南北再逢春幾驛煙花一騎塵觀國舊逢朝闕
使還家今作渡江人雪迎酒氣消應早柳逐歌聲發
更新此日腰間垂赤組不須猶愧故鄉親

感懷次蔡參軍韻

擊筑無人識漸離客依孤館獨淒其著書未解成新
語把酒聊因覓舊知燕塞風多寒水急梁園雪早凍
雲癡年來只念江東去下馬碑陰看色絲
寄錢塘方員外
尋常此別事難同不意音書得再通君病尚畱多難
後我吟方向亂愁中殘煙廢郭山猶在落日空城歲
欲窮借問西湖舊梅樹如今還剩幾多叢

秋日江館詠懷

十年世事漸多更自歎而今豈復生未有佳兒書漫
讀既無俗客酒頻傾煙生遠塢聞雞唱潮落平沙見

蟹行秋後思歸凡幾度夕陽江上望高城

得亡友周記室在繫所詩次韻

擬出罝羅再卜鄰死生俄判兩吟身百年豈料逢今
日四海何由見此人吳地有園花已盡楚山無塚草
空新一篇幽憤時時讀風雨寒燈夜獨親

得呂山人見寄

一罷僧房看竹期行吟何處復相隨煙波遠渚難尋
路風雨幽窗忽送詩故舊誰非嗟別者鄉園同是憶
歸時莫愁孤館春寥落且向江干避亂離

送殷孝章赴咸陽教諭

獨抱遺經出董幃秋風送騎入關遲用儒幸際千年
會造士欣爲一縣師鴻鴈雲低秦壘角牛羊草沒漢
陵碑宦遊兼得觀形勝莫向尊前歎別離

送僧希載赴天界

水郭春寒壓柳絲扁舟遙送道林支日邊金界曾遊
地雪後滄江欲渡時座近香爐朝聽法窗傳鉢韻夜
談詩龍河舊日棲禪侶想拂雲牀正待師

寄永寧丁期府兼簡先生永寧屬洛陽丁近

布平盜浚渠之功達君前進士寓其邑

政成百里自材優莫厭青袍映白頭盜散山棚城少

閉渠通田澮水多流陸渾莊上雞鳴午緱嶺祠前鶴
去秋沽酒更須煩縣令洛中時伴玉川遊

江山晚眺圖

一髮青山斷鴈邊渚宮樓閣暮雲連煙波彷彿江南
意風柳依稀峽外天釣艇歸時風動葦僧鐘起處日
沉煙觀圖忽起滄洲想身墮黃塵又幾年

江上春日遣懷

江上逢春已兩回客中時序苦相催蛛營戶網蟲初
出雀借簷巢燕未來年少即閒真信拙詩成雖好可
言才如今欲向南鄰叟旋乞垂楊繞舍栽

別江上故居

家具初移借釣船
臨行魚鳥亦悽然
城南徙舍惟三里
渚北閒居已二年
花墅回看春水外
草堂畱掩夕陽邊
多慚父老相畱意
來去聊隨大化遷

永樂禪寺

鬢隨鶴羽總秋零
幾日江行思渺冥
夜卧客舟聞咏史
朝過僧榻共談經
沙洲雨足蓴初紫
林塢霜遲橘尚青
後欲尋公曾到處
畱詩應共竹間亭







高季迪先生大全集卷之十五



七言律詩

送人出鎮

家出山西負勇名
擁旌方見去專城
風生曉帳旌旗動
月落寒譙鼓角清
麟閣封侯初受任
鴈門擒虜舊功成
如今四海無征戰
雅詠投壺樂太平

送周省郎之海虞判官

黃茅連野邑城荒
佐邑初煩舊省郎
鴈起海風吹暮角
雞鳴關月照晨妝
讀書臺下逢人少
濡墨廳中憶

尉狂君到官曹無事日一尊爲我酌斜陽

次張子宜園居

見山岡下竹蒙籠亂後池塘野水通
身影步隨花影日鬢絲吹傍釣絲
風已知處世愁無益更覺全生醉
有功誰道閒官貧去甚春來未典舊焦桐

其二

早回高步謝天衢應戀閒園景趣殊
養鶴堦除長得伴種魚池沼不輸租
官曹自古皆詩客家世當年本釣徒
苦欲相尋阻泥潦滿林煙雨聽啼鴣

遷城南新居

辛苦中年未有廬東西長寄一囊書
未能避俗還依俗堪信移居更索居
葉滿鄰園煙冪冪竹連僧舍雨疎疎
何須許伯長安第此屋翛然已有餘

贈醫師王立方

醫得河間第五傳尋師曾上海門船
龍方試後應多驗鶴骨癯來已欲仙
渡澗斲苓朝帶雪隔林蒸朮午生煙
詩人亦有相如渴願乞丹砂舊井泉

吳縣庠訓導徐君善醫常起人疾求詩贈之

解榻高齋晝日遲坐談周孔雜軒岐
仙人方在應藏枕博士經橫每下帷
池上採芹風起處階前晒藥雨

收時病痊不使人栽杏只要新題滿卷詩

挽瞿隱君

壯志蹉跎爲亂離蒼天不肯見清時樓前鶴去飛雲
遠墓上人來宿草衰親老還揮思子淚弟愁長詠哭
兄詩兩年頻送交遊死不似夫君最可悲

次韻靈隱復見心長老見寄兼簡泐禪師

高堂鐘鼓毒龍驚曾布架裳海上城廬嶽禪師傳法
印道園學士許詩名幾趨北闕瞻天近獨坐南屏對
月明書到喜聞雙徑老雨華新散滿瑤京

稚齋爲陳山人賦

華屋雖存忍獨居愁瞻松柏倚踟躕夕陽馬下高人
墓夜雨烏啼孝子廬地掩衣冠魂去後家畱圖籍手
編餘元方應有無窮意陌上何年重駕車

追次唐人韻

任俠平生慕灌夫每思鳴劍起伊吾歌調錦瑟初移
柱笑擲金盤已作盧買妾競誇燕地女求官不事党
家奴灞陵獵騎歸衝雪笑殺詩人撚凍鬚

喜聞王師下蜀

蜀國兵銷太白低將軍新拜漢征西浮橋已毀通江
鷁進鼓初鳴突水犀不假五丁開道遠俄看萬甲積

山齊從今險阻無人恃夷貢南來盡五溪

逢倪徵士

數千里外久相違十八灘頭偶獨歸自說病來辭幙
府只因愁絕念庭闈吳歌重把還鄉酒蠻布猶穿過
嶺衣話盡三年遊歷事滿庭風雨送斜暉

贈林泉民張夢辰次張貞居韻

雨船幾度載狂客詩卷平生隨老翁林下自成麋鹿
友世間相去馬牛風曉窗炊熟露葵紫秋寺寫殘霜
葉紅他日誰修耆舊傳著君應在隱淪中

倚樓

西館樓前見鴈行桂花初白柳枝黃凭欄有客迎秋
思捲箔誰家出晚妝未放離魂尋楚雨已看歸鬢點
吳霜自憐對酒還惆悵不及分司御史狂

其二

漠漠疎煙丹樹開火經城苑減樓臺雨初過處千山
出人正愁時一鴈來秋色自隨砧杵動夕陽又被鼓
鐘催詩成未盡登臨意獨向蒼茫首重回

闔閭墓

水銀爲海接黃泉一穴曾勞萬卒穿謾說深機防盜
賊難令朽骨化神仙空山虎去秋風後廢榭烏啼夜

月邊地下應知無敵國何須深葬劍三千

西塢

空山啄木聲敲鏗花落水流縱復橫松風吹壁鶴翎
墮梅雨過溪魚子生尚有人家機杼遠更無塵土衣
裳輕斜陽已沒月未出樵子歸時吾獨行

過海雲院贈及長老

衲擁寒雲老一丘遊方無夢轉悠悠茶香吹過前林
晚菜葉流來別澗秋舊拂講餘懸壁上殘經定後落
牀頭紫藤塢裏歸逢雪煨芋曾煩慰客愁

送錢塘守

繁華莫歎異昇平到郡初煩露冕行
幙下吏書能署字湖中妓舫歌聲潮來兩渡皆侵岸日落諸山半
入城休沐南屏煩一到松間尋我舊題名

張山人見訪畱宿草堂

夕陽欲沒靜沙虛喜子能來慰索居生事蕭條慙客
裏交情契濶歎兵餘買魚急喚臨江艇炊黍深開暎
竹厨屈指故人能幾在莫辭同醉卧田廬

陪臨川公遊天池

騎馬尋幽度嶺遲老僧不識使君誰門開紅葉林間
寺泉浸青山石上池殘果已收猿食少枯松欲折鶴

巢危壁間不用題名字無限蒼苔沒舊碑

詞風客舍歲暮

空江寒雨送淒涼離舍無多即異鄉井臼尚勤慙德
曜音書未至憶平陽心輕別歲憑年少夢喜還家及
夜長自笑病來詞賦拙懶從枚叟客遊梁

江上晚眺懷王著作

渡頭西望足離情晚水寒山雪後清鷗立斷冰涼漸
遠鴉隨殘照去還明漁人笛過風生浦估客帆迴樹
絕城范蠡祠前春意連此君欲放酒船行

答徐七記室病中作

空齋孤枕積書間清瘦憐君變舊顏累少亦憂今日
亂病多應賴此身閒朝辭鄰友看花去晚候家僮買
藥還知是苦吟猶未廢水邊深樹掩柴關

遊雲巖值雨

深殿幽廊映竹開鳥聲忽斷雨聲催蘚生偏上題詩
壁花落還臨說法臺林下聞鐘諸客散磴邊汲水一
僧來晚晴更好看山色西閣憑闌獨未迴

送張徵君南遊

故人多去不堪留况復看君更遠遊流落正逢搖落
景亂離還值別離愁夕陽亭上匆匆酒寒雨江邊渺

渺舟此後衡門應獨掩詩篇寂寞有誰酬

宿張氏江館

極浦荒雲一棹行遠投江館駐宵程客中得酒銜悲
喜亂後逢人說死生木葉未空寒鳥聚海潮欲上曙
雞鳴政憐此地無驚擾歸夢如何又入城

再遊南峰

放鶴亭前落葉重吟身獨上夕陽峰遠村近浦分諸
樹後嶺前山應一鐘高閣倚殘歸鳥過空林行盡老
僧逢支公駿馬嗟何處石上莓苔沒舊蹤

送李使君鎮海昌

州有雙廟

海風千里捲雙旌按轡初聞屬部清人雜鳥夷爭午
市潮隨山雨入秋城鳴狐不近睢陽廟突騎猶屯廣
利營肯掃帳中容我醉夜深燃燭卧談兵

賦得惠山泉送客遊越

雲液流甘漱石牙潤通錫麓樹增華汲來時冷和山
雨飲處春香帶澗花合契老僧煩每護修經幽客記
曾誇送行一斛還堪贈往試雲門日注茶

寄題張著作菁山隱居

霞映青山似赤城歸樓聞已謝時名半湖殘雨收虹
影幾樹斜陽帶鳥聲竹下逢僧投杖揖蘿間候客抱

琴行平生應笑王夷甫末路方言少宦情

送胡孝廉布東遊

春色偏傷楚客心日斜芳草鷓鴣吟山遮故國千重影雲度長江一片陰少婦自挑燈下錦諸侯誰贈橐中金送行只恨華觴淺不似同袍別意深

夜雨不寐

雨窗燭盡漏迢迢秋滿牀幃酒易消蟋蟀催寒輸絡緯梧桐鬧雨勝芭蕉漸知老去非前日豈信愁來是此宵莫聽曉鐘聊穩睡久居閒退罷趨朝

煮雪齋爲貢文學賦禁言茶

自掃瓊瑤試曉烹石爐松火兩同清旋渦尚作飛花舞沸響還疑灑竹鳴不信秦山經歲積俄驚蜀浪向春生一甌細啜真天味卻笑中冷妄得名

晚香軒

不畏風霜向晚欺獨開衆卉已凋時地荒老圃苔三徑節過重陽雨一籬秋色蒼茫人醉少寒香落漠蝶先知山翁獨念同衰晚坐對幽軒每賦詩

次韻倪雲林見寄

老來詩陣尚堂堂過宿曾畱讓大牀病驥可堪迷遠道孤松只合在高岡蕭蕭塵鬢驚寒色渺渺雲山斂

夕光莫道欲歸無好處便尋勾漏與華陽

其二

草滿當年食客堂一身投老寄僧牀秋風吟怨哀蘭浦暮雨行愁苦竹岡任廣豈能諧薄俗養和且爲駐頽光酒錢十萬今誰送獨嗅黃花對夕陽

答韓長司用韻見贈并柬滕用衡

昔年載橐侍明堂每見論邊近御牀入幕乍參飛騎將還家新卜卧龍岡秦山暮隔關雲遠吳樹秋涵海日光共語東西宦遊事里中今喜有南陽

答張文伯用韻見贈

早年說法已升堂夜雨長連聽雨牀珥筆便堪趨禁省振衣何必上重岡半簾藥氣疎煙退滿屋書聲落月光愧我飄零荒舊學酒徒相逐醉高陽

喜逢賀叔庸送還錢塘

暫來還去獨翩翩賀監清狂已欲遷三日小樓延解榻幾人還浦送回船鴈呼舊侶投雲外梅試初花在雪前歸去西湖柳邊宅定娛鶴髮慶新年

子祖授生

他日愚賢未可知眼前聊復慰衰遲人間豚犬應誰子天上麒麟豈我兒夢兆先占神媪送啼聲還得使

君奇樂天從此休長歎已有人傳柏匱詩

喜張太常謁告歸途見訪雨中畱宿話舊

長嗟遠別望京城忽喜相逢駐驛程問舍求田慙我
鄙還家上冢羨君榮寒廳聯句圍爐坐晚陌趨朝竝
轡行舊事重談真若夢江湖夜雨一明燈

御溝

春含禁柳綠相和縈貫天津若絳河派出宮牆流葉
斷源通靈沼躍魚多曲迂月下龍舟轉清照雲間雉
扇過行客何須問深淺長流不盡似恩波

雲巖訪蟾公值雨畱宿次周記室僻間韻

日暮松間雨屐過懶殘不出近如何鐘聞下界歸人
少燈照空林落葉多別後有思還是妄定中無想不
成魔山靈盡意相畱客暗雨斜風滿薜蘿

送任兵曹赴邊

少年恥着惠文冠幙下時時把劔看官燭未銷雞送
曉軍笳忽動馬嘶寒關連雲樹征途迴塞接霜蕪戰
地寬見說長平門下客奇材唯有一任安

吳下聞梁賓客子天爵復送還會稽

識君京國暫相從別去堪憐此再逢共把一盃官市
酒初聞半夜客船鐘吳洲鴈落潮痕淺越嶠猿啼樹

影重曾作尊翁舊僚屬臨分離恨倍人濃

次韻俞士平見寄

一棹滄浪兩鬢絲豫章老客苦相思作歌幾日空招
隱載酒何人爲問奇吳苑舊遊山色在楚江歸夢月
明知莫言別後音塵絕長倚東樓憶紫芝

登天界寺鐘樓望京邑

朝罷登樓賞晚晴三山二水總分明人間地湧黃金
界天上雲開白玉城宮樹遠連江樹色寺鐘微荅禁
鐘聲憑高空此觀形勝深愧無才賦帝京

十二月十九日雪中

舟絕寒江凍不潮縈沙拂柳影脩脩纔從漁浦磯邊
積還向樵村竹外飄撲馬憶從年少樂點袍曾逐侍
臣朝如今獨坐吟詩句茅屋茶煙冷未消

過僧舍訪呂敏

幾欲相尋與願違今朝始得過禪扉磬聲穿竹山房
遠屐齒粘苔石徑微幽鳥每同馴鴿下高人閒與老
僧依談詩說偈俱堪喜坐覺茶香上薜衣

新篁

南池雨後見新篁裊裊煙梢漸出牆風度亂翻交籜
響露垂微挹粉痕香簾前嫩色初含暝琴畔疎陰已

送涼野飯休燒林下筍畱添碧玉嫩竿長

南風雨初夏江村

輕衣軟履步江沙樹暗前村定幾家水滿乳鳧翻藕
葉風疎飛燕拂桐花渡頭正見橫漁艇林外時聞響
緯車最是黃梅時節近雨餘歸路有鳴蛙

江村

南園薰風吹葛衣汀花未露岸花稀水神廟下莎侵
路江叟門前柳映磯犢卧已知耕耒歇鷗驚長見釣
船歸天隨宅畔吾曾住畱得閒罾掛夕暉

田園書事

西園春去綠陰成已覺南窗枕簟清簾捲斜陽歸燕
入池生芳草亂蛙鳴葉過穀雨花猶在衣近梅天潤
易生獨坐正知閒晝永吟餘消盡篆煙輕

梅雨

江南煙雨苦冥濛梅實黃時正滿空灑竹暗連湘女
廟隨雲遠渡楚王宮窗寒頓使拋紈扇衣溼頻催換
火籠幾度欲晴還復暝簾前不放夕陽紅

送衍師還相川

江樹湖波繞相川南風巾錫去翩翩村中乞米晨畱
鉢城外聞鐘夜泊船昔向名林曾說法今歸舊院定

安禪道心深悟俱浮幻不奈詩名滿世傳

萱草

幽華獨殿衆芳紅
臨砌亭亭發幾叢
亂葉離披經宿雨
纖莖窈窕擢薰風
佳人作佩頻朝採
倦蝶尋香幾處通
最愛看來憂盡解
不須更釀酒多功

雨過舟中看山

風雨山前暗荔蘿
滿蓬涼思入滄波
沙鳴正厭秋聲急
峰出還憐景趣多
溪上雲收開遠樹
田中水滿發新禾
舟人不用催歸速
卧看青巒次第過

齊雲樓

境臨煙樹萬家迷
勢壓樓臺衆寺低
斗柄正垂高棟北
山形都聚曲欄西
半空曾落佳人唱
千載猶傳醉守題
劫火重經化平地
野鳥飛上女垣啼

靈巖寺

間上香臺望下方
漁村樵塢盡蒼蒼
傾城人遠苔生逕
歸寺僧稀葉滿廊
雲散池邊畱塔影
雨來閣外失湖光
廢興皆幻何須問
獨自吟詩送夕陽

孤園寺

欲問南朝常侍宅
已爲西域化人宮
山僧歸帶漁舟雨
湖鳥來聞粥鼓風
橘柚垂簷秋殿暗
波濤驚座夜

堂空給孤長者誰曾見應在煙雲杳靄中

開元寺石鉢

寶石當年琢帝青浮波不異木盃輕傳靈已歷乾陀
國乞食曾來舍衛城漁父得時初洗獻法王在日每
擎行寺僧見客休頻出恐有藏龍此內驚

垂虹橋

行人脚底響波濤驅石神鞭是孰操影落蛟龍朝窟
暗形垂蟠螭暮天高煙中去憶鴟夷遠月下吟誇長
史豪幾度憑欄賞秋色鱸魚新買繫歸舸

聞潮州遷客消息

瀧吏相迎渡惡灘到時應是幾旬間猿啼嶺下梅花
白鰲去祠前荔子斑名姓未看兵籍落音書忽附估
船還莫言久作炎荒客會逐陽和返故山

秋日江居寫懷

每看搖落即成悲况在漂零與別離為客偶當鱸美
處思兄正值鴈來時天邊暝為秋陰早江上寒因歲
閏遲莫把丰姿比楊柳愁多蕭颯恐先衰

其二

葭菼連秋渺渺長歸舟猶歎滯江鄉客衣欲冷鄰機
急農事初成野飯香千里斷雲隨鴈鷺半村殘照送

牛羊有愁不解登高賦空使頻迴宋玉腸

其三

舌在休誇術未窮且將蹤跡託漁翁芙蓉澤國瀰漫
雨禾黍田疇掩冉風身計未成先業廢心懷欲說舊
交空楚雲吳樹無窮恨都在蕭條隱几中

其四

風塵零落舊衣冠獨客江邊自少歡門巷有人催稅
到鄰家無處借書看野蟲催響天將夕籬豆垂花雨
稍寒終卧此鄉應不憾只憂飄泊尚難安

其五

桑苧翁家次近居人煙沙竹自成墟移門欲就山當
榻補屋唯防雨溼書貧爲湖田長半沒拙因世事本
多疎當時亦有求名意自喜年來漸已除

其六

喪亂將家幸得全客中長恥受人憐妻能守道同王
霸婢不知詩異鄭玄借得種蔬傍舍地分來灌菊別
池泉却欣遠跡無相問一棹秋風笠澤邊

其七

秋塘門掩竹穿沙爲客鄰醅未易賒閒裏壯年慙白
日愁中佳節負黃花漁村靄靄綠江暗農徑蕭蕭入

圃斜薄俗相輕吾敢怨魯人猶自笑東家

漫成

柴門藥浦小江邊早得閒居是偶然兩岸晚風黃鳥
樹一陂春水白鷗天悠悠往事空書卷碌碌浮生只
釣船猶記京華爲客日幾回聽雨憶歸田

其二

已分棲遲不自疑江邊林下儘幽期病惟好懶寧須
藥心未忘機偶對碁閒館雨聲花落夜深塘草色燕
飛時春來頗喜囊中富添得新成幾首詩

喜徐山人與浩師見過

遠煩支許問棲遲正是山家橘熟時爲吏得閒非是
隱學禪有解只能詩潮聲驚客江三里秋色畱人菊
一枝莫怪相逢意偏喜碧雲紅樹久相思

端陽寫懷

去歲端陽直禁闈新題帖子進彤扉大官供饌分蒲
醕中使傳宣賜葛衣黃繖回廊朝旭淡玉爐當殿午
薰微今朝寂寞江邊卧閒看遊船競渡歸

寄倪隱君元鎮

名落人間四十年綠蓑細雨自江天寒池蕉雪詩人
畫午榻茶煙病叟禪四面荒山高閣外兩株疎柳舊

庄前相思不及鷗飛去空恨風波滯酒船

與杜進士寅登白蓮閣對雨
遠愁高樹共離離風送潮聲上浦遲海客市中煙起
處江僧閣外雨來時船歸杳靄唯聞榜店隱蒼茫不
見旗回首南朝今幾寺可堪重詠牧之詩

喜宋山人見過

攜琴遠赴渡江船煩覓幽蹤浦樹邊別久忽看梅又
發話長應讓鴈先眠一冬多煖天無雪半夜初寒月
有煙回首舊遊君莫念歸來好共種吳田

與姪常遊東菴

水樹圍菴綠幾層陰中敲戶晝登登十年重到猶爲
客半日纔閒且訪僧舊履塵生趺後席亂幡風颭供
餘燈高齋對作忘言坐此事堪憐汝亦能

謝周四秀才送酒

不忍醒愁只欲眠幾日花發自江邊欲沽百錢未易
得忽送一壺真可憐梳頭好鳥語窗下洗盞流水到
門前今朝得醉已無恨不使春光空一年

上巳有懷

春寒渾未減征衣愁對佳辰坐掩扉江上琴書畱滯
久水邊車馬祓除稀閒園細雨梨花落廢苑平蕪燕

子飛欲覓蘭亭會中友幾人遷謫未能歸

徐記室賁北歸見訪南渚復送還城

初辭楚澤到吳村訪舊嗟君古道存欲治匆匆歸後
計難畱款款坐中論雪遲似讓梅先白月早如愁樹
已昏此別終非前別遠孤舟江上莫銷魂

被召將赴京師畱別親友

長送遊人作遠行今朝還自別鄉城北山恐起移文
誚東觀慙叨議論名路去幾程天欲近春來十日水
初生只愁使者頻催發不盡江頭話別情

過故將軍第

甲第如雲紫陌東當年得意負邊功美人笑客登樓
上假子將兵衛閣中深計謾誇三窟固遊魂難返九
原空門前車馬今誰到零落槐花向晚風

雨中寄劉沈二別駕

漠漠春寒水繞城誰家可作看花行一盃不得三人
共二月都能幾日晴夢逐鶯聲風外斷愁兼草色雨
中生畫船載妓南湖上不似年時放浪情

丁校書見招晚酌

正坐羈愁不自聊遠煩舟楫暮相邀江懸落日猶三
尺風折垂楊定幾條流水入花村杳杳幽人對酒屋

脩脩此鄉不得君同客應是春來更寂寥

杜二年四十鬚已多白戲作是詩

覽鏡憐君感歎深年來頷下忽霜侵未衰自計方強
仕早白應緣只苦吟雖失家中嬌婢喜還招座上遠
朋欽到頭此物須當見好染虛消買藥金

愛姬祠

錦雲陣陣落紅衣波冷雙蓮慘夕暉故國草侵金輦
跡荒祠塵掩畫羅幃共哀艷質軍前歿誰見香魂月
下歸惆悵無人來酌酒綠楊惟有暮鴉飛

雲山樓閣圖爲朱守愚賦

白雲窈窕楚天陰半露樓臺出遠林簾幙捲時秋雨
歇鼓鐘鳴處夕陽沉鶴從遼海天邊下猿隔巴山樹
裏吟爲問仙家在何處欲穿謝屐一登臨

夏夜

銀河欲轉漏聲稀坐詠閒齋夜掩扉鵲影頻翻窗竹
起螢光每拂逕莎飛風生漸抖齊紈扇露下猶沾楚
葛衣自據胡牀相待月爲憐池上夜涼微

池亭晝卧

曲闌虛幔映滄浪長日宜眠夢蝶牀波影細搖侵簟
影荷香遠遞雜爐香不知道路方愁暑只愛池亭可

納涼何處鳴蟬驚睡起高槐陰外未斜陽

姑蘇懷古

麋鹿來遊客過稀消沉伯業在斜暉遊帆自向湖邊
落鳴屨誰聞月下歸烏喙計成楳柵至娥眉舞罷綺
羅非如今始悟牽衣諫荆棘遺宮淚滿衣

宿山寺

蓮宮借榻喜涼生疑到天台近赤城風度回廊秋欲
動河窺高閣曙初明泉聲正與松聲合僧夢頻同鶴
夢驚最喜此宵無熱惱莫教月落又鐘鳴

泛舟西湖觀荷

雨晴南浦錦雲稠晚待湖平蕩漿遊狂客興多惟載
酒小娃歌遠不驚鷗半湖月色偏宜夜十里荷香已
欲秋爲愛前沙好涼景滿身風露未回舟

馬璘画

燕睡簾前夜未深羅衣應怯嫩寒侵風傳漏板還堪
數月混梨花不易尋翠館紅樓猶裊裊華燈繡闥正
沉沉畫中一片春宵景寫出閨人悵望心

曉涼

驕陽未出曉涼生滿櫺春風細髮輕荷上露華翻曲
沼樹頭河影落高城自舒清簟臨窗坐又聽疎鐘隔

寺鳴却喜閒身無事役不須早逐市人行

蘆花簾

葵茸織出緯蕭機未許蝦鬚獨銜奇寒雪照庭晴不
捲白雲當戶晝長垂恍疑桺絮風穿早不管梨花月
到遲自是楚江秋一片移來不使白鷗知

雨中

二月水長折磯頭茅屋恐隨江夜流雨聲鳴瀨稍欲
歇雲氣出峽未能收鷓鴣鷓鴣晚爭喜楊桺杏花春
自愁幾日鄰家斷來往出門應恨無扁舟

王徵士東里草堂

久客因爲東里人年來移竹有僧鄰時名頗患緣詩
得野性惟知向酒新林下煙生門掩夕園中雪罷鳥
鳴春相期歲晚爲同社隔屋歌呼定不嗔
客舍寒食次周著作見寄韻
寒食江頭客未還獨臨流水見愁顏故園芳草斜陽
外空館疎華細雨間亂世求田雖自笑少年當路竟
誰攀主人莫折門前桺多病無書倦入關

新春次余左司韻

雪晴稍稍見花枝書閣朝眠日影移酒到好懷傾輒
盡詩逢高韻和應遲今朝閒豈尋春得前夜愁因送

客知走馬南園芳草綠憑君莫問少年時

次韻楊禮曹秋日見贈

殘雨脩脩映彩虹憐君獨詠楚臺風遠江帆影秋蕪
外故苑砧聲晚樹中壯歲漸如辭幙燕閒身猶作蠹
書蟲雅音自古無能好莫向人誇瑟最工
如何天與出塵姿不得芳名入楚辭春後春前曾獨
採江南江北每相思微雲淡月迷千樹流水空山見
一枝擬折贈君供寂寞東風無那欲殘時

其二

雪中無伴只孤芳倚竹元非翠袖妝馬上忽逢臨水
驛鶴邊俄見向山房春愁寂寞天應老夜色朦朧月
亦香此地一尊聊自戀揚州回首已淒涼

過吳淞江風雨不可渡晚覓漁舟抵松陵官

館

風雨方知客路難飛鴻相逐渡江湍港收漁市舟歸
晚門掩官廳燭對寒此地昔年曾遠宿何人今夕共
清歡枕邊不爲江聲急夢寐憂時未得安

次韻酬張院長見貽太湖中秋翫月之作

洞簫聞處似黃州月色惟過一半秋兔闕何年丹桂

種龍宮今夜白蓮浮露沾席上縱橫醉天落舟前浩
蕩遊若上洞庭看玉鏡兩山應是勝三洲
暫宿行營舟中

蒹葭霜露冷侵船落鴈驚鳥總未眠戍卒獨明高柵
火居人同宿廢村煙醉中遠夢欺長夜亂裏窮愁折
壯年莫問身閒何到此久思提劍學防邊

其二

角聲未起大星低夜靜寒營獨馬嘶樹葉蕭蕭霜後
堞河流汨汨露中堤一軍睡枕誰能穩數里歸舟自
欲迷起望此時憂更切邊烽不隔遠峰西

首春感懷

初春風日自妍華客意登臨只感嗟陌上驚塵隨去
馬城邊遺柳斷棲鴉亂來未覓無兵地愁在空思有
酒家咫尺苑西誰解問早梅還發去年花

次韻楊禮曹雨中卧疾

堦前曝藥雨來收寒似人情戀故裘壯歲間關元屬
命荒城蕭索不因秋憶君我最相憐病問汝誰能獨
免愁清坐自能消鬱結古方休向篋中求

其二

門前問疾幾人車曲巷深深樹影斜每愛積書緣有

子不愁聽雨爲無花亂來官俸猶支粟睡起僧書忽
寄茶何事一春頻謁告只應來辨酒中蛇

次韻王孝廉過澄照寺

汝向山中住十日題詩幾度見經過彈琴只向寺前
石放棹每遊湖上波空林雨過虎跡大古屋雲生龍
氣多山僧好客未容去落日更聽樵牧歌

次韻王七仙

不從道士覓鴛鴦羣薰沐清朝謁老君龍氣雙騰含景
劍蠹魚三食內篇文山石髓青如鐵海上琪花白
似雲知子從來有仙骨吹笙擬共接飛裙

岳王墓

大樹無枝向北風千年遺恨泣英雄班師詔已來三
殿射虜書猶說兩宮每憶上方誰請劍空嗟高廟自
藏弓棲霞嶺上今回首不見諸陵白露中

早春寄王行

江水江花只自春不知容易解愁人山川寂寞衣冠
淚今古銷沉簡冊塵草草逢人空識面匆匆爲客莫
容身十年憂患誰相慰賴得君家是近鄰

次韻僧懷德見貽

風雨兼愁過盡春愧煩問訊社中人牀頭檀與青山

舊門外車隨白日新說法空林三竺士誦詩清夜五
臺賓相思雖覺鐘聲近猶隔城東十丈塵

寄海昌李使君

海上波濤夜不驚使君雖老尚能兵荒煙白鹵家家
竈落日黃岡處處營人雜島夷爭小市潮隨山雨入
孤城明朝硤石山頭路我欲停車聽頌聲

次韻金文學送弟往海上

小陸賢如大陸賢亂離爲客最堪憐橫金海上知虛
席打鼓津頭看發船麥氣曉晴田雉鬪懷香春暖野
鶯眠明朝夢斷生芳草風雨孤舟過練川

過海昌贈使君李兼鎮禦

海上觀書逐使車將軍雙廟有遺墟已看田父迎苗
鬼未遣溪人射鱷魚日出鹽生沙地白潮來波動縣
城虛故人相識登樓意不是懷歸畏簡書

送王僧母入道

江夏千年有故家至今喬木哺慈鴉里聞賢子初名
憲世說仙姑舊姓麻壽酒淋漓傾醴露舞衣零亂拂
飛霞不須三釜稱榮食自有金盤棗似瓜

荅蘄丘聶才子

聞道詩狂復酒狂少年鞍馬鬪輕妝百金已醉名姬

館一劔還登俠士堂
鳥起夜啼吳苑月
鴈來秋帶薊門霜
亂餘零落無人識
相逢向路傍

廉上人水竹居

水西分土一袈裟
拄杖竹滿家
掃石安禪無落葉
過溪送客有浮槎
龍吟夜應潮生海
鳥過寒驚月在沙
林下本來參玉板
不須更煮趙州茶

梅花九首

瓊姿只合在瑤臺
誰向江南處處栽
雪滿山中高士卧
月明林下美人來
寒依疎影蕭蕭竹
春掩殘香漠漠苔
自去何郎無好詠
東風愁寂幾回開

其二

縞袂相逢半是仙
平生水竹有深緣
將疎尚密微經雨
似暗還明遠在煙
薄暝山家松樹下
嫩寒江店杏花前
秦人若解當時種
不引漁郎入洞天

其三

翠羽驚飛別樹頭
冷香狼藉倩誰收
騎驢客醉風吹帽
放鶴人歸雪滿舟
淡月微雲皆似夢
空山流水獨成愁
幾看孤影低徊處
只道花神夜出遊

其四

淡淡霜華溼粉痕
誰施綃帳護香溫
詩隨十里尋春

路愁在三更掛月村飛去只憂雲作伴銷來肯信玉
爲魂一尊欲放羅浮客落葉空山正掩門

其五

雲霧爲屏雪作宮塵埃無路可能通春風未動枝先
覺夜月初來樹欲空翠袖佳人依竹下白衣宰相住
山中寂寥此地君休怨回首名園盡棘叢

其六

夢斷揚州閣掩塵幽期猶自屬詩人立殘孤影長過
夜看到餘芳不是春雲暖空山栽玉徧月寒深浦泣
珠頻掀篷圖裏當時見錯愛橫斜却未真

其七

獨開無那只依依肯爲愁多減玉輝簾外鐘來初月
上燈前角斷忽霜飛行人水驛春全早啼鳥山塘晚
半稀愧我素衣今已化相逢遠自洛陽歸

其八

最愛寒多最得陽仙遊長在白雲鄉春愁寂寞天應
老夜色朦朧月亦香楚客不吟江路寂吳王已醉苑
臺荒枝頭誰見花驚處嫋嫋微風簌簌霜

其九

斷魂只有月明知無限春愁在一枝不共人言唯獨

笑忽疑君到正相思歌殘別院燒燈夜妝罷深宮覽
鏡時舊夢已隨流水遠山窗聊復伴題詩

臺荒外歸吳至楓橋舊有塔今廢

遙看城郭尚疑非不見青山舊塔微官秩加身應謬
得鄉音到耳是真歸夕陽寺掩啼鳥在秋水橋空乳
鴨飛寄語里閭休復羨錦衣今已作荷衣

半紙別送徐山人還蜀山兼寄張靜居

我因解紱遠辭京君爲修琴暫入城偶爾相逢春酒
熟飄然忽去暮煙生山頭學嘯猶聞響世上畱詩不
寫名西礪煩詢張靜者年來註易幾文成

雙綰雲鬟作髻髮

雙綰雲鬟作髻髮小姑當日嫁誰家雲滋細草頭梳
髮風動奇芳髻插花鸞鏡夜憑松掛月鳳釵春待竹
生芽行人莫起陽臺念雲雨無情路更賒

石牛

一拳怪石老山巔頭角崢嶸幾百年毛長紫苔春夜
雨身藏青草夕陽天中宵望月何曾喘盡日看雲自
在眠惱殺牧童呼不起數聲長笛思悠然

飲陳山人園次能翁韻

桃花梨花已狼籍躑躅花開如火炎時過上巳和而

暢人比杜陵清且廉園中雨流水遶砌林下鳥鳴風
滿簾把酒亦知君意好醉多謬語莫相嫌

寄題內弟周思敬野人居

野人何處是幽棲聞在天隨舊宅西半屋圖書春落
蠹一村花柳晝鳴雞分泉自給烹茶水待雨惟耕種
藥畦日暮扁舟欲相訪恐驚鷗鳥過前溪

弔伍子胥

地老天荒伯業空曾於青史見遺功鞭屍楚墓生前
孝抉目吳門死後忠魂壓怒濤翻白浪劔埋冤血起
腥風我來無限傷心事盡在越山煙雨中

弔七姬塚

疊玉連珠棄草根仙遊應逐馬嵬魂孤墳掩夜香初
冷幾帳畱春被尚溫佳麗總傷身薄命艱危未負主
多恩爭妍無復呈歌舞寂寂蒼苔鎖院門

郡治上梁

郡治新還舊觀雄文梁高舉跨晴空南山久養干雲
器東海初生貫日虹欲與龍庭宣化遠還開燕寢賦
詩工大材今作黃堂用民庶多歸廣庇中

萬木堂爲毘陵卞公禮賦

林隱高堂萬木青森然玉立勢亭亭春風送暖花連

砌秋雨生涼葉滿庭坐愛繁陰簾半捲卧聽靈籟戶
深高斧斤未許來樵採要養長材獻大廷

鶴瓢

產自靈苗勝雨胎何須去作鳳匏來壺公本解飛騰
術丁令寧爲蕩落材直上青天身恐繫倒傾碧海服
初開生成自是神仙器肯逐纍纍向草萊

其二

遠隨仙客下青城瘦骨肥來見盡驚藜杖夜懸翻露
影竹尊春瀉飲泉聲園中幾歲形容變海上何時羽
翼成醉聽樹頭風歷歷還疑秋傍九臯鳴

次楊禮曹雨中養疴

午晴書閣暫令開又聽鳴鳩竹外催身到遠山屏乍
展手持明月扇初裁綠芳消砌風前蕙朱果封泥雨
後梅曲巷掩關人寂寂今朝問疾有誰來

咏梅次衍師韻

水郭山村路半交春晴依約見芳苞吳妃舞竟珠鈿
委漢女遊歸玉珮拋愁亂雪來朝片片夢驚風過夜
稍稍人間何處無開落吹簫何須怨老蛟

其二

壓枝何處斷人腸欲問黃家第四娘雞早每驚煙際

色蝶遲那識雪中香林昏有霧籠綃帳江淨無塵染
素裳此地一尊聊自慰揚州回首月荒涼

其三

海天寒 玉人衣密雨疎煙晚漸披春後春前曾獨
看江南江北每相思猿啼古驛征帆宿馬立荒郊酒
旆垂擬折一枝供寂寞東風無那欲殘時

其四

招得清魂句自工長洲春到雪波融未逢人寄千山
外忽訝君來一夜中縱隱荒榛猶的皜若穿深竹更
玲瓏酒空客去愁多處菼菼繁霜嫋嫋風

其五

莫學新妝入漢宮春風多處易枝空遙情尚憶僧房
裏忽見偏憐客路中淡月微雲應萬樹荒山流水只
孤叢夢回一笑僊人遠碧海青天沒斷鴻

示寒此地一尊聊自慰揚州回首月荒涼
其三

江南江北角相思樓閣古碑征託宿馬立荒郊
柳垂擬折一枝供寂寞東風無那欲殘時

孤叢夢回已笑對人盡雙燕青天又滿歡

莫學海無休入襄宮春風多似楊柳空處對前山

疏酒其五
愁處較繁霜
疏酒其五

高季迪先生大全集卷之十六

五言絕句
秋暮塞風三軍齊制制
秋暮塞風三軍齊制制
秋暮塞風三軍齊制制

觀軍裝十詠

胄
胄
胄

黃金冒虎頭乍免走豪酋還有從容處綸巾按壘遊

鎧
鎧
鎧

絲弗鏤文銀高城日照鱗攬來曾攪陣一鏃不傷身

纛

髮亂野牛驚神專大將營師行當禡祭壇下戮番生

刀

大食購千金妖精泣太陰燈前開匣看無限許君心

弓

燕角號良材樓煩擘未開秋風懸臂出何處一鷁來

箭

流星逐飛羽鏃利能穿孔三發定邊歸箬中休滿插

麾

彩帛曳長虹悠悠卷塞風三軍齊陷陣應在一揮中

矛

畫榦似蛇長誰論半段鎗日斜親鬪罷高宴卓沙場

袍

雕錦剪花團三邊總認看尋常不肯著風雪念兵寒

馬

羅帕覆春風連鞍賜有功蹄高騎得稱身出萬軍中

師子林十二詠

獅子峰

風生百獸低欲吼空山夜疑是天日巖飛來此山下

含暉峰

演漾弄清暉江山秋斂霏我吟康樂句日暮澹忘歸

吐月峰

四更棲鳥驚山白初上月起開東閣看正在雲峰缺
立雪堂

堂前參未退立到雪深時一夜山中冷無人祇自知
卧雲室

夕卧白雲合朝起白雲開惟有心長在不隨雲去來
問梅閣

問春何處來春來在何許月墮花不言幽禽自相語
指柏軒

清陰護燕几中有忘言客人來問不應笑指庭前柏
玉鑑池

一鏡寒光定微風吹不波更除荷芰影放取月明多

冰壺井

圓甃夏生冰光涵數星冷窗有定中僧休牽轆轤綆

修竹谷

翠雨落經牀林鳩午鳴後筍出恐人來編籬遮谷口

小飛虹

初看卧波影應恐雨崇朝過澗尋師去端如度石橋

大石屋

混沌復輪囷全無斧鑿紋門臨五湖水坐納四山雲

題雜畫

空山萬株木
靄靄秋多晦
屋在白雲中
人歸白雲外
其二

欲尋江寺僧
渡口孤帆發
落日浦風生
不畏春潮潤
其三

叢蒲亂石間
水急魚難罩
欲去尚殘陽
看山一停棹
其四

風急楚江波
佳人罷采荷
離舟孤宿處
淚少夜猿多
其五

孤柳影婆娑
路入秋溪暮
誰家繫榜來
應待歸人渡
其六

驢影夕陽催
空山不見梅
愁腸如客路
一日幾縈迴

其七

夕陽數峰遠
靄靄江南思
煙外有鐘聲
山僧獨歸寺

其八

橋迴綠水斜
春樹隔煙霞
隱處誰云淺
千峰只一家

其九

日出溪霧黃
風迴不成雨
何處趁墟人
侏儻竝沙語

其十

遠岫淡煙光
斜陽在釣航
衆漁歸已盡
獨自過寒塘

其十一

柳葉散空塘菊花明廢苑日暮問垞南舟行何近遠

其十二

山禽欲定棲竹風苦難靜殘雪墮驚梢脩脩一窗冷

和楊禮曹刺客三詠

錐

袖藏出屠市一揮報公子誰言上將雄不異孤豚死

七首

購自徐夫人欲搵秦皇帝銅柱火光飛奇鋒非不利

筑

上醉不知音亭前殺聲起勿輕無目人能為有心鬼

得家兄在遠消息

家將遠人信復報遠人知世亂書難得開緘勝見時

其二

幾日看回鴈今朝尺素開應知在天末亦望弟書來

其三

歲晚各離家憐兄去路賒書來約歸近同看故園花

其四

江上有歸舟傳兄在石頭知安雖暫喜念遠更成愁

為外舅周隱君題雜畫

斜陽榜釣船秋色滿江天彷彿吾家近沙村落鴈邊

其二

白鶴忽飛還松杉靄然暝明月出溪橋照見支筇影

其三

風雨過蒼嶠秋色渺江海白鷗期不來沙上人相待

其四

落葉帶回吹荒筠冒幽石池上鳥鳴時閒齋掩秋夕

其五

山深氤氣寒高齋掩窗卧林間踏葉聲知有樵人過

效陰常侍

滿江煙水綠幾里到巴州音書不堪寄一寄一沉浮

歎牆下草

青青牆下草經霜未枯槁雖是見春遲還免逢秋早

草堂梵僧

禮塔老番僧唐言已漸能夜無還國夢石室坐懸燈

新月

纖纖掛柳西斜影低窺閣黃昏難久看初生是將落

尋胡隱君

渡水復渡水看花還看花春風江上路不覺到君家

西寺晚歸

遠寺別僧歸隨鐘出煙嶺犬吠竹林間斜陽見人影

淵源堂夜飲

懸燈照清夜葉落堂下雨客醉已無言秋蛩自相語
和陳左司夜泊桐江

月出釣臺樹長灘秋更喧渾如宿巫峽唯少一聲猿

過師子林

雨餘鳥語涼斜陽竹深見頻來非看花借讀高僧傳
薔薇露盟手

蠻估海帆廻銀鬕玉汞開盥餘香滿手恰似折花來

西陂

芳草水東西春風路欲迷歸時不覺晚山與夕陽低

園中梨花唯開一枝

闌外見春遲朝來雪一枝不知初發處誤道已殘時

江上酒家

門戶暎垂楊春槽酒聲瀉幾度望高帘歸帆雨中下

過舊送別處

前時送画船西港柳株邊別處愁猶在鴛鴦不肯眠

懷陳寅山人時居西山昭明寺

聞看西澗月秋閣與僧開正是相思夜鐘聲君處來

略上人房竹

幽篠半梢橫山窗颭月明上人禪定久不怕有秋聲

聞鴈

江寒月黑夜定宿蒹葭裏叫叫過燈前却是誰驚起
晚坐水上

潭島去向深斜陽樹半陰偶來臨水坐非有羨魚心

聞謝恭夜詠詩

我非李太白君是謝楊兒夜半江樓雨高眠聞詠詩

題馬遠画醪醖

池冷畫闌幽芙蓉伴晚愁金盤承露重彷彿漢宮秋

黃葵

春晚獨餘芳風回帶酒香美人偏愛看因似御衣裳

余客雲陳山人居西山相望因有懷寄贈

深竹晝鳴鳩微涼滿寺秋老僧雖不在風雨自相留

睡足

風雨落梅村鳩啼正掩門今朝無事役睡足亦君恩

題雲林小景

歸人渡水少空林掩煙舍獨立望秋山鐘鳴夕陽下

題芭蕉

叢蕉倚孤石綠映閒庭宇客意不驚秋瀟瀟任風雨

春溪獨酌圖

春水鱖魚肥垂綸坐斷磯羊裘人易識好着舊蓑衣

池亭

虛檻枕池波，閒凭看浴鴛。
秋荷知幾葉，添得雨聲多。
聞鐘

日暮遠鐘鳴，山窗宿鳥驚。
楓橋孤泊處，曾聽到舫聲。
桂花

風露浥清香，清陰別院涼。
誰能呼白鳳，花下舞霓裳。
鴈

初到別胡沙，樓頭度影斜。
江南秋月好，隨意宿蒹葭。
紅葉

霜染滿林紅，蕭疎夕照中。
曾供寫秋怨，流出未央宮。

秋雨

瑟瑟復蕭蕭，燈前滴此宵。
秋聲自難聽，况復近芭蕉。
月夜飲酒

月照綠樽深，清歌桂影陰。
嫦娥畱伴我，莫向画樓沉。
遊山

自著林間屐，來聽石上琴。
老僧畱客久，西嶺日將沉。
聞笛

橫吹發哀聲，江樓月正明。
伊州不堪聽，都是故園情。
秋聲

砧韻雜鳴蛩，梧邊雨帶風。
千聲秋作意，都入夜窗空。

秋夜宿僧院

竹動鵲頻驚秋河閣外橫
談禪貪坐久莫遣曙雞鳴
登樓望虎丘

秋霽倚層樓孤峰是虎丘
香臺紅樹裏佳處記曾遊
外舅周隱君齋竹

秋思與秋聲閒齋對夕清
幽人夢回處煙鳥月中鳴
寧真道館夜觀茅隱君畫

看山如見君君家在山下
仙館憶君時明燈對圖畫
竹林高士圖

竹深斜日在獨鶴見扉開
誰顧閒居者惟應二仲來

詠水邊桃花

一片欲隨流殘妝照影愁
誰來唱桃葉風雨送離舟

芭蕉美人圖

琴罷詠春朝餘醒吸露銷
詩成無落葉聊爲寫芭蕉

王主簿小園

夏葉風苗長秋瓜雨蔓新
誰言趨府客却似灌園人

晚尋呂山人

小艇載琴行松花落晚晴
君家最可認隔樹有書聲

黃氏延綠軒

蔥蔥溪樹暗靡靡江蕪溼
雨過曉開簾一時放春入

喜從兄遠歸

聞汝歸舟到相迎只恐遲方當見時喜還憶別時悲

送人遊湘中

離恨挂帆檣隨君遠入湘飛花蕩春影江水不勝長

訪丁校書不至

獨坐無與語出門聊訪君空回轉惆悵芳草日將曛

答陳山人

賣畚君當返修琴君已歸無為嫌寂寞世事意多違

杏園

春紅雨後繁孤墅啼鶯曉聞道曲江園遊人近來少

瓜圃

傷瓜莫傷蔓傷蔓子生稀畱待經霜露盈筐採得歸

菊蹊

獨行林下路望望南山暮無酒掇英嘗寒香已零露

梅塢

春暗雲如雪難招落漠魂空林酒醒處月墮客敲門

題許瀾伯画

望秋倚高閣隔江望層巘不見度僧歸煙深暮鐘遠

除夕客中憶女

別家非願久回首已徂年今夜寒齋雪何人聽折絃

歲暮

已嗟求道晚復省濟時難碌碌成何事天涯又歲闌
題攜琴訪友圖

孤騎復孤琴披嵐入澗陰遠尋君莫訝城市少知音

鴛鴦

兩雨蓮池上看如在錦機應知越女妒不敢近船飛

題張校理畫

寒色初凝野秋聲忽在林遙山不能見祇爲晚煙深

題湘南雨意圖

南禽暮啼起門掩湘祠裏脉脉半江陰春雲與春水

題扇上竹枝

寒梢雖數葉高節傲霜風寧肯隨團扇秋來怨篋中

題李迪畫犬

護兒偏吠客花下卧晴莎莫出東原獵春來兔乳多

天平山五丈石

勢危撐月直影瘦倚雲平彷彿峰頭并蓮花一半生

別呂隱君

孤舟晚溪口欲去重回首不忍別青山况此山中友

林下

樹涼山意秋雲澹川光夕林下不逢人幽芳共誰摘

不寐懷徐記室

齋寒掩孤燭城遠沉雙杵憶爾忽長吟驚散牀頭鼠
雪中自雲巖晚歸西村客舍

乍與諸僧別還依一叟鄰柴門閉風雪誰候暮歸人

其二

隔浦煙墟遠侵沙雪樹稀行人緣底事不及鳥先歸

立春前十日寄會稽周軍咨

的的玩芳樹依依懷遠人千山雖隔郡十日共逢春

柳燕圖

柳上銜蟲立春風似有情和枝吹裊裊方覺爾身輕

隔簾聞歌

葉逐散聲飛湘雲隔妓衣誰能偷卷看認是小叢非

訪張司馬不值書園亭壁

亭午鸛鳴雨果園花已稀偶來因忘去非待主人歸

壺中插緋碧桃花既而碧桃先落

白嫩倚紅嬌朝看訝獨飄應緣霞氣暖烘得雪先銷

優人李州僑乞米

曾稱富貴客粉墨尊前面憔悴立窮途渾非舊時見

其二

戲場鼓笛靜人無太平樂爾莫怨飢寒梨園亦零落

綵索

臂頭長命縷百結更雙蟠怕有痕生肉教依玉釧寬
釵符

靈篆貯紗囊薰風綠鬢傍從今能鎮膽不怯睡空房
燒筍

幽人嗜燒筍出土不容長林下孤煙起風吹似竹香
江寺雨中訪杜二

幾日纜歸舟同君野寺遊舊懷言未盡不是雨相畱
寒夜與家人坐語憶客中時

茶屋夜燈青竹庭寒雪白不對室中人依然去年客

題楞伽山寺壁

惆悵空山裏寒梅應自開雪中何處覓須待雪晴來

贈僧本空

了性本來空遊方不復東月明秋澗靜趺坐一山中

聞霰

初訝驚沙過復疑疎葉落寒霰夜聞時窗空人寂寞

江上漫成

春色到江濱江花樹樹新行吟憔悴客誰道亦逢春

雨中過玉遮山

松頭急風迴飛雨不到面何處豁清愁千山一人見

其二

尋鐘入蒼茫一澗復一崦落葉去方深山扉雨中掩
畫花鳥

語倦立還欹花垂裊裊枝美人妝閣靜斜日下簾時

種瓜

縣縣花蔓縈颯颯風煙灑秋來子正多不似黃臺下

摘瓠

輪困卧霜露秋曉摘初歸自笑詩人骨何由似爾肥

懷蜀山人

靄靄衆山暝秋禽鳴澗竹知君高詠餘聽鐘掩窗宿

諸君會宿鶴瓢山房題畫賦詩予將赴召不
得預明日補題其上

偶趨蘭省召不預竹林歡山水圖中景明朝在路看

山中夜行

登隴日已沉出谷月初上夜行畏虎聞無奈車聲響

赴京道中逢還鄉友

我去君却歸相逢立途次欲寄故鄉言先詢上京事

泐禪師室中晚坐

綠陰欲滿寺禽鳴春雨餘聊因簡牘暇窗下閱僧書

白葵花

素彩發庭陰涼滋玉露深誰憐白衣者亦有向陽心
馬氏東軒

陽和受最多爽氣看應少晞髮此窗前雞鳴海天曉
得家書

未讀書中語憂懷已覺寬燈前看封篋題字有平安
期陳則不至聞宿清隱蘭若

幽禽雨中響門掩春塘綠思君暮不來應伴山僧宿
碧筩飲

綠觴卷高葉醉吸清香度酒瀉正何如風傾曉盤露
曉發山驛

風殘杏花曉馬上聞啼鳥茅店未開門山多住人少

焚香

斜霏動遠吹暗馥畱微火心事共成灰窗間一翁坐
榴花

日炙態常醺香生若自焚夜來端午宴淡却美人裙
階前苔

莫掃雨餘綠任滿閒階路畱藉落來花春泥免相汗
僧舍訪呂隱君爲學上人題墨竹

山房竹雨過簾影靄春雲得與幽人會何殊見此君
題孫卿家小畫

高山嶺冒層嵐疎林逗殘照何處覓孫登雲間聽長嘯
其二

前林遠杵歇別院疎鐘起行人與居人同在秋雲裏
久別幼文偶見其畫遂題

幾疊蜀山雲秋林半夕曛畫中藜杖者相見只疑君

題榮悴竹圖

嫩葉與殘枝相依暮雨時莫將榮悴看節在不曾移
叢竹圖贈內弟周思敬就題

窈窕復蒙茸千山萬竹中幽人夜驚起秋雨共秋風

題張來儀畫贈張伯醇

風起澗聲亂景寒雲氣深山人歸卧晚詩意滿秋林

次韻及禪師懷王水曹

千峰一寺遠雲滿跣趺處無客伴孤禪懸燈照深樹

其二

鐘動雲壑冷鶴歸人不歸應思躡金策同向海天飛

夜聞雨

窗燭冷殘夜聞蛩更聞雨秋館總多愁猶勝在羈旅

大癡小画

溪水雖多曲舟行不憚賒山山秋樹赤猶復似桃花

吳仲圭枯木竹石

叢篠倚喬柯秋陰雨尚多風霜莫搖落畱蔭石邊莎
題倪雲林畫贈因師

含暉峰下路樹石盡垂藤欲認莓苔迹相尋行道僧
題徐山人畫贈內弟周思恭

復澗兼重嶺雲嵐處處生君家還可認為有讀書聲
訪因師而師適詣余兩不相值

我去尋幽院師來訪小園休言不相見相見本無言
題畫贈別

扁舟暮歸去別路江南樹愁指楚山遙明朝望君處
龍門飛來峰

風吹峨眉雲東依此山住我來不敢登只恐還飛去
待渡

渡子未迴舟立傍沙頭樹天寒雪欲來莫滯人歸去
西澗訪行上人

日暮冒餘雪望煙西澗陰不因師住遠何事到山深
蔡村田家

田中耒聲歇煙火西林起獨立候歸人柴門夕陽裏
夢中作

悠悠衆擾去寂寂孤吟歇雨過滿窗涼高林上明月
要離墓

弱夫殺壯士誰敢嬰餘怒今日古城邊
畊人肆侵墓
顧野王墓

南朝舊碑倒墓近樵蘇道應與讀書堆
離離總秋草
卓筆峰

雲來初似墨鴈過還成字千載只書空
山靈恨何事
硯池

山骨誰鑿破一泓自深黝醉後欲濡毫
蜿蜒見蚪蚪
千人石

池上無陀石千人列坐曾如今跌夜月
唯一山僧
五塢山

飛泉塢

山空響更遠雨過流還急餘沫灑迴風
一林紅樹溼
修竹塢

色映溪沉沉秋雲生夕陰無限楚山意
鶴鳴風滿林
丹霞塢

遙聞丹霞塢中有餐霞者絳彩發朝朝
還同赤城下
白雲塢

雲開見山家雲合失山路聞語知有人
欲尋已迷悞
芳桂塢

欲攀淮南樹人去山寂寞嫋嫋涼風生
疎花月中落

芹

飯煮憶青泥羹炊思碧澗無路獻君門對案增三歎
萼菜

紫絲浮半滑波上老秋風憶共香菰薦吳江葉艇中
芭蕉

靜掩綠陰行閒聽雨聲卧還有高秋詩窗前書葉破
中秋

此夕月華流應分一半秋誰能尋庾亮吹笛上南樓
九日

攜壺還采菊惆悵獨登高憶在詞林日華筵食賜饅

題畫贈許瀾伯

冷冷風中絃渺渺雲間鴻秋懷不可寫日暮青山空

病酒

日高頭未櫛困卧對山花暫謝高陽侶窗間獨飲茶

九全其卷六
評掩綠障行晴觀雨聲時遠有商秋
日高照未憐困相健山林博博高
此夕月疎酒應分一半秋誰能尋
今今風中越越雲間然越對不可
攝壺遠眼蒼嶺信斷山高憶在詞
林日華莫食賜

高季迪先生大全集卷之十七

七言絕句

馬周見太宗圖
封事朝聞夕拜官
新豐無復客衣寒
書生未有鳶肩相
只說君臣際會難

聞舊教坊人歌

渭城歌罷獨淒然
不及新聲世共憐
今日岐王賓客
盡江南誰識李龜年

山中別寧公歸西塢

一上香臺看落暉沙村孤樹晚依微老僧不出青山
寺只有鐘聲送客歸

秋柳

欲挽長條已不堪都門無復舊毵毵此時愁殺桓司
馬暮雨秋風滿漢南

送賈麟歸江上

別淚紛紛逐斷猿貧交無贈只多言離愁正似蘼蕪
草一路隨君到故園

秋夜同周著作宿婁浦

小解寒依竹浦雲酒闌相對說離羣一聲新鴈誰先

聽今夜江南我共君

大崖師画

画圖忽見白雲峰茶屋香臺樹幾重身若在師行道
處晚來唯訝不聞鐘

送陳秀才歸沙上省墓

滿衣血淚與塵埃亂後還鄉亦可哀風雨梨花寒食
過幾家墳上子孫來

送呂卿

遠汀斜日思悠悠花拂離觴柳拂舟江北江南芳草
遍送君併得送春愁

答陳校理尋花已落之作

君來春去不相期
空有新愁繞舊枝
總得花看能幾日
最難畱惜是芳時

與諸君飲吳別駕園

春來幾度醉無涯
不似今朝向汝家
四海弟兄俱在座
好風吹出棣棠花

舟中聞歌

水柵孤燈照客舟
江南誰解唱甘州
尋常醉賞尊前曲
何事今朝聽得愁

題画雨竹

巫峽雲連湘水低
行人路滑畏深泥
不見朝陽鳴鳳至
春陰日日鷓鴣啼

挽楊隱君

纔歌招隱又招魂
故老于今有幾存
他日我來應下拜
寒山流水竹間墳

春思

愁兼楊柳一絲絲
客舍江南暮雨時
自入春來才思減
杏花開過不題詩

入郭過南湖望報恩浮屠

雨過春陂柳浪香
布帆歸緩怕斜陽
漁人爲指江城

近一塔船頭看漸長

廢宅芍藥

昔年花發要人催今日無人花自開猶有園丁憐國色時容閒客借看來

登江閣遠懷徐記室與杜進士同賦

憑闌兩客怨斜曛此日同吟只欠君江閣雖高猶不見幾重山水幾重雲

夏夜宿西園酒醒聞雨

飛蟲繞燭夢翅遲荷葉齊鳴雨一池不為素紈猶在手定疑秋夜乍寒時

其二

人睡蕭蕭院落空未秋愁已怯梧桐夜長猶幸西軒雨一半聽時在醉中

靈巖琴臺

美人玉琴何處遊遺譜寫入風泉秋落葉無人登舊榭滿山明月烏啼夜

聞笛

橫吹纔聽淚已流寒燈照雨宿江頭憑君莫作關山曲亂世人人易得愁

慰周著作悼亡

笑披紗扇憶當年只有卿卿最得憐今日料應花不住
夜燈相伴室中禪

山寺冒雨還西郭
粟葉翻翻滿寺秋出門風雨未全收自慙騎馬非閒
客可是山僧不解畱

蘇李泣別圖

丁零海上節毛稀幾望南鴻近塞飛泣盡白頭相別
淚少卿畱虜子卿歸

江上偶見

阿姬不畏晚寒多綠舫紅衣柳下過滿浦秋荷已零

落如何猶唱采蓮歌

過保聖寺

隔江煙霧隱樓臺遠逐鐘聲放艇來亂後不知僧已
去幾堆紅葉寺門開

王七招飲余遊紫藤塢值雪失期

孤舟山水雪晴時看到梅花一萬枝東崦題詩西崦
醉等閒忘却故人期

江上送客

春風江上蕩舟過垂柳垂楊拂浪波惆悵今年頻送
客長條欲折已無多

期諸友看范園杏花風雨不果
欲尋春去怕春休又值春陰不得遊寂寞西園風雨
裏杏花比客更多愁

宮女圖

女奴扶醉踏蒼苔明月西園侍宴迴小犬隔花空吠
影夜深宮禁有誰來

逢張架閣

花落江南酒市春逢君歸騎帶京塵一盃相屬成知
已何必平生是故人

山中春曉聽鳥聲

子規啼罷百舌鳴東窗卧聽無數聲山空人靜響更
切月落杏花天未明

與親舊飲散出抵城西客舍賦寄

吳王廢苑草青青一騎今朝發野亭誰道別君行路
遠去時人醉到時醒

過山家

流水聲中響緯車板橋春暗樹無花風前何處香來
近隔崦人家午焙茶

雲山樓閣圖

碧樹香臺錦繡連画師應見亂離前如今風景那堪

寫廢寺空山鎖暮煙

始自西山移寓江渚夜聞雨有作

客身移宿浦雲東孤館殘燈與舊同夜靜空江無落
葉雨聲驚不似山中

晚過浦西橋

春水何長春日短沙鴨交眠綠莎暖晚過橋西不見
人野梅零落江雲斷

歎庭樹

偶移弱質傍庭臯風露離離已便高翻笑園中栽樹
者十年猶未出蓬蒿

雨中春望 時在園中

郡樓高望見江頭油壁行春事已休落盡棠梨寒食
雨只應啼鳥不知愁

夜齋見螢火

拂竹緣莎復點苔夜窗無月見飛來舊書亂後都拋
却懶就微光更展開

湖上見月憶家兄

望月思兄意轉迷孤帆應宿楚雲西夜深愁向湖邊
立為有寒鴻相竝棲

逢吳秀才復送歸江上

江上停舟問客蹤
亂前相別亂餘逢
暫時握手還分手
暮雨南陵水寺鐘

十宮詞

吳宮

芙蓉水殿麝廊東
白苧秋來不耐風
教得君王長夜醉
月明歌舞在舟中

楚宮

雨去雲來十二峰
渚宮樓閣暮重重
細腰無限空相妒
不覺瑤姬夢裏逢

秦宮

宮閉驪山靜
管絃翠華巡狩去
經年掖庭無用恩
難報願上蓬萊采藥船

漢宮

酒醒金屋曙
河流願賜銅盤一滴秋
他日君王作仙去
瑤池猶幸得同遊

魏宮

翡翠明珠入貢頻
承恩長占鄴宮春
至尊莫信陳王賦
那得人間有洛神

晉宮

盡日南風永巷開
羊車去後玉階苔
誰知天上無人

地亦有城南小史來

齊宮

帖地黃金襯襪羅苑中市罷合笙歌有人解誦西京賦
賦添得樓臺火後多

陳宮

春風臺閣繡參差狎客爭陳辭月詞幾度醉濃嬌不
起景陽樓上曉鐘時

隋宮

五斛青螺一日銷迷樓深貯萬妖嬈衆中誰解留車
駕風浪如山莫渡遼

唐宮

玉笛聲殘禁漏長雲屏月帳醉焚香五王宴罷皆歸
院大被空閒一夜涼

次韻春日謾興四首奉酬外舅達翁

老去風情似樂天恨無張態抹朱絃一春酒病稀遊
賞啼鳥鶯花共悵然

其二

水邊簾幙遠籠花遊女時時出浣紗記得橫塘沽酒
處画船明月載琵琶

其三

雨多池館草氤氳酒色寒銷舊舞衫燕子似憐花落
地殷勤長帶軟泥銜

其四

菖蒲葉老芷花新地暖鴛鴦護水紋不上高樓無遠
恨江南春盡草如雲

回文

風簾一燭對殘花薄霧寒籠翠袖紗空院別愁驚破
夢東闌井樹夜啼鴉

春日懷江上

一川流水半村花舊屋南鄰是釣家長記歸篷載春

醉雲籠殘照雨鳴沙

其二

新蒲正綠乳鳧鳴水沒魚梁宿雨晴看近清明沉種
日野人何事不歸耕

醉仙圖

酒滿長生瘦木瓢花開仙館宴春宵飛瓊何事堅辭
飲應恐清都誤早朝

觀奕圖

錯向山中立看碁家人日暮待薪炊如何一局成千
載應是仙翁下子遲

江村即事

野岸江村雨熟梅
水平風軟燕飛回
小舟送餉荷包飯
遠旆招沽竹醞醅

詩題

竹間門掩似僧居
白豆花疎片雨餘
一榻茶煙成偶
睡覺來猶把讀殘書

舟歸江上過斜塘

漫漫村塘水沒沙
清明初過已無花
春寒欲雨歸心
急嬾駐扁舟問酒家

西齋庭前海棠

寂寥銀燭與金盤
睡足簾前怯曉寒
不是詩人賞幽
獨雨中深院有誰看

次韻張仲和春日漫興

蘇小墳前柳似煙
秋千人靜夕陽天
獨騎欵段尋詩
去嬾逐看花衆少年

與內弟周思敬晚過鴈蕩僧舍

同過溪橋日欲晡
遠林殘葉似栖烏
照公院裏堪畱
宿已有梅花有酒無

白傅湓浦圖

相逢淪落總天涯
舟泊湓江近荻花
逐客青衫自多

淚傷心不用怨琵琶

陶穀驛亭圖

酒闌使騎趣歸時羞殺江南一曲詞借問驛亭相見者風流何似党家兒

客夜聞女病

歲盡歸期尚杳然不知汝病復誰憐隔鄰兒女燈前笑客舍愁中正獨眠

秋江晚渡圖

鷓鴣飛盡一洲蘋帆帶秋雲度遠津底事愁看畫中景昨朝曾送渡江人

夜中有感

少壯無歡似老時身窮寧坐苦吟詩卧思三十年來事一半間關在亂離

其二

倦僕廚中睡已安吹燈呼起冒霜寒酒醒無限悲歌意不覓書看覓劒看

徐記室謫鍾離歸後同登東丘亭

同上高亭一賦詩喜逢君是謫歸時不然此日登臨處應望天涯有遠思

將赴金陵始出閩門夜泊

烏啼霜月夜寥寥回首離城尚未遙正是思家起頭
夜遠鐘孤棹宿楓橋

其二
煙月籠沙客未眠歌聲燈火酒家前如何纔出閭門
宿已似秦淮夜泊船

舟次丹陽驛
沽酒來尋水驛門鄰船燈火語黃昏今朝始覺離鄉
遠身在丹陽郭外村

正月十六日夜至京師觀燈
天街爭唱落梅歌絳闕珠燈萬樹羅莫笑遊人來較

晚春風還似昨宵多

夜聞雨聲憶故園花

帝城春雨送春殘雨夜愁聽客枕寒莫入鄉園使花
落一枝畱待我歸看

早至闕下候朝

月明立傍御溝橋半啓宮門未放朝騶吏忽傳丞相
至火城如晝曉寒銷

春日寄張祠部

烏衣巷口燕來時楊柳風多颭酒旗遠客金陵遊伴
少看花慙比去年遲

左掖作

小殿珠簾散柳絲東宮初退講筵時不材未敢修封
事把筆閒題應教詩

雨中登天界西閣

青山樓閣楚江東身在蒼茫晚色中故國自遙難望
見不關春樹雨溟濛

吳中親舊遠寄新酒

雙壺遠寄碧香新酒內情多易醉人上國豈無千日
釀獨憐此是故鄉春

其二

為念春來客思悲欲教一醉對花枝那知飲量新來
減不似江亭看妓時

宿圓明寺早起

客起燈前夢尚迷滿城殘月曉峰西應知野寺非山
店只聽鐘聲不聽雞

送葛省郎東歸

金陵女兒踏春陽金陵客子正思鄉一盃况復送君
去目斷飛花江水長

其二

桃葉渡頭聞唱歌孤帆欲發奈愁何君歸是我來時

路山水無多離思多

四月朔日休沐雨中

送春風雨苦潺潺得告今朝免綴班卧聽鳩啼花落
盡此身如在故園閒

戴叔鸞入江夏山圖

歸隱初辭薦辟章西風黃葉滿車箱青牛只識山中
路不是無心向洛陽

送哲明府之新淦

花落春衫試剪裁石頭城下楚帆開憑誰為報清江
吏麥雉鳴時縣令來

逆旅逢鄉人

客中皆念客中身唯汝相逢意更親不向燈前聽吳
語何由知是故鄉人

寄丁二侃

江頭斜日草初曛目斷歸鴻隔楚雲舊宅因君相近
住每思家處即思君

題虞文靖公書所賦鶴巢詩後

玉堂罷直鬢如絲華蓋岡頭戴笠時丁令去來滄海
變人間零落鶴巢詩

客中憶二女

每憶門前兩候歸客中長夜夢魂飛料應此際猶依
母燈下看縫寄我衣

晚晴遠眺

楚天無物不堪詩登眺唯愁動遠思秋樹江山人別
後夕陽樓閣雨晴時

寄徐記室

徐久客京師
余至已東還

惆悵江東日暮雲我來君去苦離羣不知此日君思
我還似當時我憶君

寄家書

時客
越城

底事鄉書累自修路長唯恐有沉浮還憂得到家添

憶不敢多言客裏愁

期袁卿見過因出失值寄詩謝之

非關遠出負幽期自是江邊枉棹遲誰道空廻君恨
切未應如我到家時

宿蟾公房

一禽不鳴深樹煙明月下照高僧禪獨開西閣詠清
夜秋河欲墮山蒼然

陌上見梅

陌頭一樹帶風沙零落寒香日欲斜車馬紛紛誰暇
看當年只合種山家

東歸至楓橋

故人當日送登畿
此地停舟醉落暉
慙愧臨河舊攀
柳尚畱青眼看人歸

江行

家家魚網映廻橋
春水初生沒樹腰
客路江南煙雨
裏綠蕪芳草恨迢迢

戲和徐七見寄卧聞鄰槽酒聲之作

春瀉鄰槽入夜聞
遠疑泉響隔松雲
題詩爲問醒眠
客幾滴還能醉得君

見燕至

初來如報社前春
好宿茅簷伴客身
莫入江南舊庭
院杏花風雨總無人

背面美人圖

欲呼回首不知名
背立東風幾許情
莫道画師元不
見傾城雖見面難成

對梨花

素香寂寞野亭空
不似秋千院落中
卧對一枝愁病
酒清明今日雨兼風

和楊余諸君在謫中憶往年西園聽歌

花落名園罷醉遊
故人無復舊風流
異鄉莫歎無歌

聽若使聞歌意更愁

重過南寺尋悟公不值

我是鈞天夢覺人憶來松下似前身老僧何去袈裟
在落葉斜陽滿室塵

過流通院

僧懶開門見客遲空林流水日斜時欲畱詩句知曾
過我後來看竟是誰

其二

橘柚林中薜荔垣幽尋幾度入秋園雖然老衲無聞
見猶勝相逢俗客言

聞人唱吳歌

楚人不解聽吳歌我獨燈前感慨多記得通波亭下
路画船歸去雨鳴荷

雨中過山

春雲晻靄澗奔渾風雨行人過一村不似山家深竹
裏乳鳩啼午未開門

讀史

晏嬰

一裘身着久經年祿米分炊幾戶煙盡說大夫能養
士却于尼叟惜封田

商鞅

徒誇闡戟衛華軒渭水何能洗衆冤想到出亡無舍
日應思不用趙良言

儀秦

二子全操七國權朝談從合暮衡連天如早為生民
計各與城南二頃田

藺相如

危計難成五步間置君虎口幸全還世人莫笑三閭
懦不勸懷王會武關

平原君

朝歌長夜館娃春總為妖姬戮諫臣何事邯鄲貴公
子能因嬖者殺佳人

范雎

紛紛傾奪苦多謀得勢還懷失勢憂丞相不須嗔蔡
澤此時當問老穰侯

范增

不識興王自有真尊前示塊謾勞神當時誰道翁多
智不及王家老婦人

張子房

不握兵權只坐籌苦辭萬戶乞封畱縱令不早尋仙

去天子終無賜醢謀

賈誼

凶吉何由鵬鳥知才高暫謫未須悲秋風不灑梁園
淚宣室寧無再見時

董仲舒

奏文章直殿廬茂陵還復訪遺書寂寥猶抱春秋
傳誰問江都老仲舒

李廣

猿臂將軍本自賢灞陵醉尉竟難全不聞當日王孫
貴重到淮陰賞少年

田千秋

功名何必任才謀遇合逢時便可收高寢郎官頭已
白一言悟主即封侯

王章

外家勢重直言稀京兆書陳蹈禍機合浦老妻須莫
怨絕勝卧病死牛衣

揚雄

執戟三朝老從臣從來無意據通津如何晚祀玄經
筆却為新都著劇秦

馬援

浪泊歸時憶少遊
炎蒸終復困壺頭
漢庭豈少英年將
衰老南征苦自求

洛下人家懶去干
閉門僵卧雪漫漫
立朝不附薰天勢
應爲平生耐得寒

荀彧

晚惜彤弓勢已難
空期魏武作齊桓
猶緣死沮奸雄意
竊鼎遷延到五官

孔明

莫恨流星墮渭濱
出師未捷已沾巾
天應畱取生司

馬歸作他年取魏人

張昭

長史難忘昔受遺
塞門投老苦憂時
孝廉猶有當年意
不遣真從介子推

王猛

軍門被褐異隆中
抱策歸秦竟事戎
猶喜遺言真有識
不教畱馬向江東

謝安

談笑新亭鼎不移
坐籌強虜在枰棋
平生事業從容得
莫道無心屐折遲

韓子

自古南荒竄逐過佞臣元少直臣多官來瀧吏休相
謂天要潮人識孟軻

題宋徽廟畫眉百合圖

百合無殘六合塵汴宮啼鳥怨無人不知風雪龍沙
地還有圖中此樣春

題湘君圖

祠前修竹楚山青風珮時來過洞庭月夜莫彈瑤瑟
怨夫君不見有誰聽

題洛神圖

晚步芳洲拾翠歸不愁風浪溼仙衣彩雲一滅無尋
處應逐陳王去馬飛

二喬觀兵書圖

共憑花几倦新妝玉女陰符讀幾行銅雀那能鎖春
色解將奇策教周郎

風雨早朝

漏屋雞鳴起溼煙蹇驢難借強朝天却思春水江南
岸閒聽篷聲卧釣船

雨中曉卧

井桁烏啼破曙煙輕寒薄被落花天閒人晴日猶無

事風雨今朝正合眠

其二

香斷牀幃冷未開
雨窗寥落滿樵苔
休輕一枕江邊
睡拋却腰金換得來

久雨

水長已到折磯頭
江天雨來殊未休
鷓鴣鶻鶻曉爭
喜楊柳杏花春自愁

閏三月

不須愁寫送春詩
花比常年落最遲
添得一分春色
在天應憐我惜芳時

晚立西浦渡

鬢絲微映釣絲輕
水葉驚風細浪生
誰見晚涼人立
處數株楊柳一蟬鳴

題孟浩然騎驢吟雪圖

西風驢上倚吟魂
只到龐公舊隱村
何事能詩杜陵
老也頻騎叩富兒門

江上雨中

江漲隨漚欲到門
溼雲依樹易黃昏
幽居常日無來
客何況蕭蕭雨滿村

客館夜見亮師画上有余呂二山人詩

上人圖畫故人詩相見燈前夜雨時無限雲山與煙
樹總含秋色是相思

海上逢王常宗雨夜同宿陳氏西軒
故人散盡獨君存風雨相逢海上村尊酒飲闌言不
盡更畱餘燭照黃昏

過北莊訪友

淺水平沙凍鴨眠秋聲和過石橋邊尋君兼得尋詩
興野樹江雲欲雪天

題画

落日青山影在沙鏡湖波淨過荷花雲間樹底參差

屋借問誰家是賀家

得故人書知未入京因寄

曾約春深到鳳臺君今不到只書來滿絨離恨牀頭
放一度相思一展開

題王翰林所藏画蘭

春到懷王舊渚宮沙棠舟去水煙空孤叢不有幽香
發應沒江邊百草中

不見花

看花無計作閒身塵土餘杭暗度春不見花開莫惆
悵花飛還得免愁人

錦帆涇

水繞荒城柳半枯錦帆去後故宮蕪窮奢畢竟輸漁父長保秋風一幅蒲

楓橋

畫橋三百映江城詩裏楓橋獨有名幾度經過憶張繼烏啼月落又鐘聲

烏鵲橋

烏鵲南飛月自明恨通銀漢水盈盈夜來橋上吳娃過只道天邊織女行

兩妓

李娟張態兩嬌姿傳得香名在白詩當日樽前漫歌舞使君家自有楊枝

短簿祠

下馬空林問廟扉衣冠寂寞掩塵幃不能復使桓公怒莫怪年來祭客稀

聞王翰林使蕃

碎葉城邊積雪明彈箏峽水遠人行已聞贊普知臣順不似前朝作舅甥

那不知前腹於真勝

卒禁地對對君臣野草如水豈入林以聞贊音味白

間王倫林山暮

然莫對年水

不無空舟問陳氣水

同聽

轉對

李散

高季迪先生大全集卷之十八

七言絕句

京師同宿左掖朱嘗約至江上見訪

風雪京華憶舊逢候朝同聽鳳樓鐘還鄉何事翻離

阻春樹春雲隔九峰

其二

曾期訪舊到江沙惆悵參差過落花大樹村中休重

問野人求食已移家

宣和所題畫

御翰親題賞畫工
疎枝野鳥怨秋風
那知回首宣和殿
物色淒涼與畫同

曾賦題張太常金華白玉山房圖
大樹林中木重石氣春生化
白雲滿林瓊草卧羊羣
太常他日歸來日身老應同萬石君

次韻遜菴春日漫興
風雲
春事匆匆過海棠
只愁春去欲顛狂
雜英滿地憑誰拾
合作熏爐百和香

送徐山浩師還郭

欲共歸舟懶入城
再三難判別時情
聊題詩卷投君

袖相伴秋江此日行

其二

客巾僧衲影翩翩
同逐秋風上別船
賴得江帆無樹隱
相望直到暮城邊

和遜菴效香奩體

揚州夢斷十三年
底事猶存未了緣
不見擁鬟簾下立
斷腸騎馬過門前

其二

曾看梳頭傍玉臺
後堂春曉翠屏開
重尋未省雙文去
只道羞郎不出來

東丘蘭若見枇杷

落葉空林忽有香
疎花吹雪過東牆
居僧記取南風後
雷箇金丸待我嘗

夜雨

不是羈人是木腸
怕愁不敢憶思鄉
醉來獨滅青燈卧
風雨從教滴夜長

題画

滿壑春陰滿澗苔
茶煙起處薜帷開
山童頻報敲門客
總爲催詩索画來

紅梅

春暈冰綃倚竹低
羅浮却似武陵溪
詩人從此來相覓
雪滿空山不復迷

瓶梅

竹外相逢見素花
手攜數朶喜還家
雨窗今夜無明月
暫托寒燈照影斜

池亭對竹

秋陰弄色護池亭
羣玉山橫翡翠屏
鳴鶴迎風時一唳
先生高枕夢初醒

題三香圖

羅浮洛浦與瀟湘
三處離魂一本香
夢斷月明秋渺

渺縞衣何似翠裙長

西山幻住期看梅花雨雪不呆

詩人本似道人閒偶負幽期不出山只有梨花舊時
夢夜隨明月到林間

其二

梅花宜向雪中看屐滑翻愁雪未乾惆悵山房深竹
裏一樽誰與破春寒

其三

翠竹休啼怨不來滿林風雪滿身苔此花不是繁華
種只合空山獨自開

題桂花美人

桂花庭院月紛紛按罷霓裳酒半醺折得一枝攜滿
袖羅衣今夜不須熏

雪中喜劉戶曹見過

滿城春雪禁花開愁對寒窗欠酒盃喜子遠能來慰
我扁舟不肯過門回

春暮西園

綠池芳草滿晴波春色都從雨裏過知是人家花落
盡菜畦今日蝶來多

雨中閒卧

牀隱屏風竹几斜，卧看新燕到貧家。閒居心上渾無事，聽雨唯憂損杏花。

其二

青氈素榻小窗空，慙愧安眠感歎窮。多少人愁泥滑滑，曉衝風雨客途中。

晚陪張水部過西橋，隔城望見諸山。歸來感
晚上西橋送客行，隔城遙見衆山晴。望山還恐山相
笑，坐守書幃不出城。

送李丞之歸安

茗花微雨落秋汀，一路青山棹幾停。預喜哦詩無俗

吏兩松相對縣丞廳

春日憶江上

柳下春潮沒舊磯，草堂猶在掩荆扉。如今歸夢休爲蝶，化作輕鷗度水飛。

金進士宿江館阻雨連夕

落花風急野無舟，喜爲茅齋幾日留。却愧江邊春酒薄，不能慰子客中愁。

其二

莫辭同宿掩書幃，兵後蕭條故舊稀。預恐明朝風雨歇，滿江春水送君歸。

江館夜雨

尋常夜雨睡冥冥底事今宵只自醒
一枕蕭騷孤獨暗此聲元在客中聽

田舍夜春

新婦舂糧獨睡遲夜寒茅屋雨來時
燈前每囑兒休哭明日行人要早炊
獨兒初長尾茸茸行響金鈴細草中
莫向瑤階吠人影羊車半夜出深宮

登白蓮閣貽幼文

思君曾此望西州誰信歸來得共遊
只是當時舊山水如何重看不勝愁

讀周記室荆南集

生別猶疑不再逢楚天雲樹隔重重
愁來讀盡荆南藁風雨空齋掩暮鐘

贈真上人

花下攜琴見此僧自言開法在金陵
十年江海遊應遍老去空山對一燈

寄沈侯乞貓

許贈猫奴白雪毛花陰猶卧日初高
將軍內閣元無

用自有牀頭却鼠刀
劍解相日味高
梁軍內閣六無

青城先生戴笠圖

暫脫朝冠白髮輕
南村羣犬莫相驚
行吟不覺逢山雨
但聽瀟瀟葉上聲
言開去去金刻十
年五我並熟

夢歸

何事頻頻夢裏歸
只緣未慣客天涯
覺來不見家人面
恰似前朝始別時
天雲樹副重重愁
來處盡隴南

其二

忽夢還家上楚船
來時舊路只依然
家人不識關山遠
有夢何因到我邊
計就來歸共幾日
是當却善山

蜀山書舍圖

山月蒼蒼照煙樹
碧浪湖頭放船去
隔林夜半見孤燈
知是幽人讀書處

寒夜逢徐七

寒夜逢徐七
羊風雨不坐苔山
窗外半聽
松下柴門密雪封
故人驚喜夜相逢
明朝歸棹還當別
莫聽楓橋寺裏鐘

題文靖公墨蹟後

題文靖公墨蹟後
寒與清翁入客無
入筆時
清朝文雅孰稱雄
我已生年後此公
今日亂離江海
上獨看遺墨涕秋風

虎丘

望月登樓海氣昏
劔池無底鎮雲根
老僧只恐山移去
日落先教鎖寺門

道傍忽見為躊躇
流落饑寒喪亂餘
久客無人解相念
傷心思廣絕交書

林下柴題道上人
画梅喜喜亦時宜
肥腹臃臃乾瘦當
笛裏寒梢蕊自開
幾年風雨不生苔
山窗夜半禪初定
應喜無香觸鼻來

山行師以懷幼文詩見寄因次其韻
題詩為我謝湯休
莫作人間遠客愁
未報歸期須記

取松陵江上鱸鱸秋

獨畱鐵面傲霜遲
秋蝶來尋莫自疑
須信陶翁醉歸後
西風塵土滿東籬

池上

擬向江潭夜放舟
却成騎馬習池遊
但逢有酒皆堪醉
月色初無兩樣秋

春日次北郭故人寄韻

風多舟小滯歸人
飛絮茫茫暗晚津
酒滿壚頭花滿

店今年不見洛陽春
讀半山絕句有感因效其作

寺裏園中總倦行
閒眠看得燕巢成
豈無酒伴同騎馬
落日風吹花滿城

立春試筆

九十日春今日始
春盤春勝巧同新
從今日日尋春去
似我閒人有幾人

薔薇花

黃葉林中絳藥開
窮陰不道艷陽回
空房雨裏看如笑
應喜今朝有客來

元夕聞城中放燈寄諸友

江邊殘雪閉寒扉
坐戀梅花未解衣
却憶今宵滿城月
看燈人醉踏歌歸

次金二彥正韻

孤榜逍遙欲入城
柳風莎雨暗江程
煩君別後殷勤記
莫更逢人道我名

得袁卿書知赴湖廣

聞君去歲客昇州
近得書來却倍愁
自說去程今又遠
望鄉應上武昌樓

過保聖寺贈隆上人

湯公寺子陸公鄰把菊畦荒夜雨頻莫訝相過偏不
厭白頭禪客是詩人

讀徐七北郭集

一卷忻看故友詩詩畱人去喜還悲西窗夜雨燈前
讀不似連牀對咏時

題理髮美人圖

桐風朝動內園枝吹亂花前髮幾絲石後理梳羞未
出怕人猜是倦妝時

託流人寄書家兄

不遇流徒謫戍邊家書那得去人傳今朝信發何時

到路隔鵲原有幾千

和婁秀才看梅

聞將瘦影伴吟身水際黃昏竹外春莫訝此翁偏賞
戀愛梅自古屬幽人

行樂

冠觸花梢露濕衣曉因行樂到南圻日高霧散春江
曲綠滿平田雙雉飛

寒食逢杜賢良飲

揚柳無煙江水長鄰家風雨杏餠香逢君共把金陵
酒忘却今朝在異鄉

晚過清溪史言隋人殺張麗華於此

王謝池臺兩岸空
水禽爭唳夕陽中
麗華妖血流難
盡化作荷花別樣紅

黃荃子母兔

陽坡日暖眼迷離
芳草春眠對兩兒
誰道姮娥曾作
伴廣寒孤宿已多時

吳別駕宅聞老妓陳氏歌

白髮相邀出後廳
莫辭為唱雨霖鈴
如今人盡憐年
少誰肯同來特地聽

出郭舟行避雨樹下

一片春雲雨滿川
漁蓑欲借苦無緣
多情水廟門前
樹遮我孤舟半日眠

過湖舟中望寺

出浦平波忽遠開
隔湖煙樹有樓臺
歸舟未得尋僧
去空聽鐘聲寺裏來

江上晚歸

渺渺雙鳧落晚沙
一江秋色艷明霞
逢人不用停舟
問大樹村中即我家

題瀑布泉

千山雲頂一泉飛
仰面時驚雨溼衣
彷彿香爐峰下

看滿溪紅葉訪僧歸

美人圖

秋千庭院閉青春背立誰曾見得真莫道不言思憶
事欲言還說與何人

春暮

春寒樓上下簾齊鶉鶻偏臨客耳啼淡月殘燈天欲
曉故園歸路夢中迷

深院

風細桐花落井欄池荷新長大如盤閉門無客搖鈴
索半篋閒詩讀易殘

春睡圖

妝殘嬌睡帶餘醒鸚鵡當窗不敢驚誰信上陽宮內
女一春愁絕夢難成

題芭蕉士女

秋宮睡起試生羅閒向芭蕉石畔過怪底早涼欺匣
扇夜來葉上雨聲多

題董卿圖

花落吳王故苑西客亭風雨聽鶯啼今年又負行春
約畫裏看山不忍題

題趙魏公馬圖

校尉當年執策迎千金遠購貳師城一歸天廡嗟空
老立仗元來不用鳴

題妓像

不見秋娘今幾年楚雲湘雨思悠然月明樓外天如
水猶憶梁州第二篇

和王畊雲與愚菴倡和詩

灌花移石不辭勤苔潤流泉雨後新一塢綠楊雞犬
靜老來欣作太平人

其二

欲望城西禮白雲數峰蒼翠晚粼粼誰知邂逅東歸

客亦是香山社裏人

夢余唐卿

路隔城臯萬里關何由得見故人還燈前夢裏匆匆
見猿叶楓林月在山

離江館一月有感

憶得離家一月期天邊明月半圓時遙知此夜閨中
望比着他宵分外悲

過湖南舟中卧作

野客分攜水店前浪平舟穩稱酣眠午雞啼處前村
近過盡平湖幾曲天

疎竹三禽圖

棘枝疎瘦竹枝低三鳥寒多每竝棲月落山空秋夢
斷不知誰箇最先啼

見花憶故園

春色先從天上來花枝盡發鳳凰臺不知別後鄉園
樹寂寞書窗開未開

贈杜進士兒端

骨琢清冰目剪波生兒若此豈須多杜郎還作真男
子愧我無才爲作歌

其二

不貪梨栗自相親識是君家舊友人更待十年應長
大功名當見太平春

城南謾興

春冷園林未到鶯初晴稍稍綻山櫻懶夫不負東風
意也起尋芳入寺行

其二

錢墅韓園處處池盡多芳草少花枝眼看新第皆蕪
沒何況將軍出許時

題張雲門画竹

臨池書罷換鸞文餘墨猶堪寫此君一段湘娥廟前

意淋漓秋雨共秋雲

題松雪翁臨祐陵草蟲

宣和遺墨畫難工
唯有王孫筆意同
莫問吳宮與梁苑
一般草露覆秋蟲

巨然小景

隔溪山閣映秋開
坐久鐘聲度水來
遙指石橋村樹杪
一僧歸處是中台

中秋無月無酒

桂樹香寒掩画樓
江雲黯淡蔽中秋
道人莫喚嫦娥出
照見空樽却轉愁

茆翁畫雙竹

不學篔簹滿谷栽
兩竿斜拂楚煙開
應緣茆叟吹橫玉
喚得雙飛碧鳳來

卧病夜聞鄰兒讀書

月淡梧桐雨後天
伊吾聲在北窗前
誰知鄰館無兒客
病裏聽來轉不眠

題紅拂妓

花枝不鎖後堂春
夜半長安旅邸貧
棄去老奴從此客
可憐小妓亦知人

柳塘飛燕

身輕不奈晚多風春盡迴塘落絮空楊柳陰迷三十
里畫樓何處捲簾櫳

千里歸來首簪春五花和汗滾香塵青絲暫解從天
性多謝黃門老圍人

仙山樓觀圖

霧閣宵閒脉望飛月明露重溼珠衣仙人莫入芙蓉
館花暗迷人不得歸

春陰

風雨將殘雪又來春陰二月未能開紅花白蕊都妨

却只有青青一院苔

送僧震赴京省師

孤雲飛傍五雲遙京國尋師興去饒明日春寒江上
路雪花應雜雨花飄

題徐熙三蟲圖

雌蝶雄蜂各冶心逐香窺艷競相尋南園雨過紅芳
歇輸與鳴蜩占綠陰

題荔枝練帶

雨後蠻枝錦果肥華清貢罷驛塵稀山禽自繞枝頭
啄疑是宮中舊雪衣

題陸掾

風送書聲出晚林始知隱士在雲深抱琴入谷那辭
遠欲覓幽人一賞音

題許瀾伯三蟲圖

蜜脾未滿報衙頻蠹化初成傅粉新誰道爭花羣隊
裏長吟還有獨清人

閭門舟中逢白范

十載長嗟故舊分半歸黃土半青雲扁舟此日楓橋
畔一褐秋風忽見君

田家慶壽圖

花滿茅堂映綵衣開門曉放鶴雛飛鄰翁壽畢共扶
醉恰似春來社飲歸

題山水

一塢茶煙隱翠微漁樵來慣客來稀溪頭樹暗飛花
盡初聽人家響杼機

十二月十七日夜偶成

一牀詩思繞梅花月墮西窗欲起鴉可是年來無遠
志夢魂中夜不離家

聞諸友遊城北女冠院看杏花

聞踏春晴覓彩霞鳳笙吹向女仙家劉郎醉後殷勤

看不是玄都觀裏花

雨後偶讀王待制詩

客窗疎竹雨淒淒把卷燈前讀舊題此日殷勤如會
面不知君在夜郎西

池上納涼

畫欄斜度水螢光荷葉荷花各有香團扇不搖風露
下秋應先借一宵涼

客舍春暮

酒醒閒寫送春詩細雨殘花尚一枝莫向天涯望芳
草客愁多似去年時

四皓圖

高山深谷事悠哉何事猶思太子來擬向秋風歌一
曲紫芝黃鵠總堪哀

題湘君圖

悵望南巡竟不還淚和湘雨暮斑斑須知竹死愁方
盡莫恨秦人便赭山

倪元鎮墨竹

倪君好画復耽詩瘦骨秋來似竹枝前夜夢回如得
見紙窗斜影月低時

王架閣家畫馬

草草髯奴紺綠衣王家好馬詫新肥解鞍閒立斜陽裏應是城南賭射歸

已酉初度

時年三十四

風雨空齋誦蓼莪今年初度客中過人生七十尋常壽未過還憐一半多

過北塘道中

未得看春愁不禁此日聊復試幽尋行人入村花宛宛吠犬隔水樹深深

其二

春水滿田如一湖入田放艇看鶯雛女郎祠下野花

雜老子門前沙樹孤

其三

苦欲看春春色稀亂後何處有芳菲晚鶯啼歇野寂寂雙樹家邊人獨歸

其四

渺渺一逕兩陂間楊柳初發水潺湲驚魚忽散人影近啼鳥時來春意閒

夜雨江館寫懷

愁解尋人不得辭小窗疎竹雨來時江湖今夜全家客猶勝飄零兩處思

其二

漠漠春寒水遶村有愁無酒不開門青燈画角黃昏
雨客共梅花併斷魂

讀韋蘇州詩

掃閣焚香晝卷帷綠槐疎雨夏初時客憂何物能消
遣一帙蘇州刺史詩

送丁孝廉之錢塘就簡張著作方員外

江邊同客亂離餘遠客那堪近歲除若見故人詢旅
况知君解說不煩書

金徵士玫雨中見過畱宿

夜窗同聽雨中猿風物淒涼異故園舊事堪愁今懶
說相看不是解忘言

東臯林下

荒徑空林落葉平尋常唯有野人行如何授簡梁園
客詩句時來此處成

遊幻住精舍

寒扉斜向竹間推此日重來是幾迴行遍空林僧不
見慰人憐有半枝梅

效香奩

青瑣初空別恨長繡茸畱得唾痕香簾前月出無人

拜只有秋千影過牆

其二

開過東窗百葉桃琵琶塵滿縷金槽欲呼小字敲妝閣誰出相迎放剪刀

江上逢舊妓李氏見過

玉箏紅燭艷春羅慣向高堂聽汝歌今夕相逢爲重唱孤舟江冷月明多

其二

多謝停舟共一卮石州歌罷各低眉南園舊日同聽客零落如今定有誰

其三

誰識能歌舊散聲愁中聽處尚分明玲瓏酒罷休催去月落江湖尚未平

其四

平常歌舞不能閒多在青春甲第間借問年來還到否朱門風雨幾家關

九月八日對菊

預向籬邊把一盃黃花多意已能開不憂風雨明朝阻懶逐時人鬪折來

舟行晚過張林

望山幾欲去尋幽此日雖來不暇遊
一棹黃昏過山下疎燈絡緯滿林秋

送葉山人

歲晚麻衣冒雪寒高歌欲去醉長安
山瓢行負知何有半是詩丸半藥丸

冬盡無雪連日大風苦寒

枯桑鳴曉北風乾舊曆闌珊欲罷看
幾日凍眠猶望雪野人憂麥敢憂寒

慰徐參軍喪子

天上麒麟去莫羈千秋亭上夕風悲
勸君不用情鍾

甚即是當年未有時

醉後贈張架閣歸自京師

山雪灑虎皮韉萬里歸來動隔年
莫說中原

事相逢且共酒家眠

看梅漫成

江草初生江水流便覺春色惱人愁
雪晴家家叩門去不見梅花應不休

其二

江邊寺裏一梅樹幾度勞人相候開
無情今日未肯發有興明朝還看來

其三

野人不省愛梅好棄在荒籬荆棘邊
細雨東風欲零落我來相見一潸然

夜至陽城田家

東津渡頭初月輝南陵寺裏遠鐘微
主人入夜門未掩蒲響滿塘鶩鴨歸

送劉將軍

朔風吹沙復吹雪笑解吳鉤初欲別
酒酣擊筑和悲歌將軍出關車騎多

贈醫師徐亨甫

錄得龍君舊獻方杏花春雨閉山房
病家幾度來相覓林下遙聞煮朮香

慰人悼亡

朱字筵篔委網塵月明不見理絲人
鏡臺窗下櫻桃樹應是當時折剩春

杏園圖爲沈日新先生題

絳雪紛紛滿翠條扣門都是病家邀
如今不用施方藥聞得花香疾自消

閏三月有感

非關騎馬踏塵埃病眼昏昏自懶開
江上酒徒應共

笑經春不作看花來

其二

綠樹殘鶯偶一鳴聽來方解憶山行今年不是逢餘
閏已過春光半日程

癸卯九日

酒熟如何菊未開小園荒徑獨徘徊不隨賓客登高
去只恐愁因望遠來

題畫送人歸觀

相望益遠益傷神落葉浮雲暗度津底事過江柔櫓
急故鄉知有倚門人

樓上

古寺閒窗映竹開雨聲初斷鳥聲來春風似念無花
看遠送飛紅到硯臺

管夫人墨竹

晨開妝鏡有青鸞寫得當年舞影看零落綵雲何處
夢鷗波亭上正春寒

荅王仲廉

我遊山寺山能迴君卧園廬不肯來惆悵歎冬花樹
下一樽今日共誰開

吳王井

曾聞鑑影照宮娃玉手牽絲帶露華今日空山僧自
汲一甌寒供佛前花

消夏灣

涼生白苧水浮空湖上曾開避暑宮清簟疎簾人去
後漁舟占盡柳陰風

雞陂

吳王不解報朝盈空養鳴雞滿別城畢竟餘杭西走
日五更誰唱出關聲

苦酒城

酒城應與酒泉通長夜君王在醉中兵入館娃猶未

醒越人宜賞釀夫功

三高祠

祀范蠡張翰陸龜蒙

功名不戀上將軍一舸歸遊笠澤雲載去西施豈無
意恐畱傾國更迷君

其二

洛陽忽憶膾鱸肥便趁秋風惠釣磯猶恨季鷹歸未
早不邀二陸共船歸

其三

鴨羣無食水田荒風雨孤篷載筆牀猶有新詩驚太
守醉中揮翰木蘭堂

織女廟

農祭頻來水廟扉
銀河東望失星輝
天孫秋夜應相憶
一去人間竟不歸

